

Inon unca hual quichihuajque Jesucristo ilanahuatinijmes

Yahui huala in Espíritu Santo

1 Teófilo, tehual hual moxtin quimatilo mitzpililo lamajtilisli, nimitzjcuiluilía in amal nican. Pa in oc se noamal calica nicpehualtic nolapuhualisli, nimitzjcuiluilic inahuac mochi inon hual pehuac quichíac huan quimaxtic Jesús. Nicpuhuac in hual mitzmachiltic quiman pehuac huan quinami lachijtiahuiaya innojen xixihuil pa quiman ajsic in tonali hual cataya la'ajcoquili pin cielo.

²Ma yojque, pan tonalijmes quiman ayamo cataya la'ajcoquili pin cielo, quinmachiltic pan ipampa in Espíritu Santo yehuanten hual quinlajtultic pa yelosquiaya ilanahuatinijmes, quinmachiltic mochi hual quipialoaya pa quichihualosquiaya yehuanten.

³Quiman panuc Jesús ilacocoltilisli huan miquic, yihual yulic oc sejpa. Monextic neli yultataya ca míac nesilisli ca yehuanten ilanahuatinijmes huan yehuanten neli quimatiloaya pampa yuliaya. Huan pan cuarenta tonalijmes yojque monextitinemiaya ca yehuanten huan quinmiliaya quinami Dios huelitía.

⁴Pan tonalijmes quiman ayamo quisac Jesús capa yehuanten, quinmilic pa mocahuasi pa Jerusalén, quinmilic:

—Amo ximohuicacan pa quiahuac Jerusalén. Nepa xicchiacan yihual hual

anmitztilanilía noTajtzin. Nehual noje annimitzilic sejpa huan oc sejpa pampa yihual hualas. ⁵Juan Lacuayatequini neli lacuayatequiaya ca al. Jan yoje, amo panusi míac tonalijmes pejticate axcan huan anyahui ancaya lacuayatequili ca in Espíritu Santo. Pampa in, xicchiacan pa Jerusalén, xicchiacan in tonali hual hualas.

Jesús unca la'ajcoquili pin cielo (ilhuicac)

⁶Cuaquinon, quiman ca Jesús monechiculoaya, quilajlanijque, quilijque:

—Tata, ¿axcan tía ticmaca tolali Israel ilahueliltisli pa huelitis ihufan pa tolali oc sejpa quinami cataya pa yina?

⁷Huan quinnanquilic Jesús, quinmilic, quil:

—Amo unca anmoyaxca pa anquimatis inon. ToTajtzin Dios, jan yihual san unca iyaxca huan quipía lahueliltisli pa quilis calfa tonali yahui panúa inon. ⁸Ma yoje, in tonali hual hualas in Espíritu Santo ca amhuanten, yihual anmitzmacas lahueliltisli huan anquisas pa anquinnahuatis lacames nolamaxtilisli nehual, anquinlaquetzilis inahuac inon pa Jerusalén huan pa mochi in lalticpan Judea huan pin lalticpan Samaria huan pa mochi in lalticpan ca capic unca niman huejca.

⁹Lamic quinmilic inon, lejcuc Jesús ca yehuanten ilanahuatinijmes quitzataloaya. Cuaquinon hualac se mextemil, quitzacuulic, huan yajmo quitajque. ¹⁰Yojque mocahualoaya lachixtataloaya pa pani pin cielo, monextitiquisajque ca yehuanten ome lacames, yehuanten cataloaya lalaquentili ca tzotzomajli iztac.

¹¹Quinmilijque:

—Lacames galiletecos, ¿leca anmocahua anlachixtica pa in cielo? In Jesús, yihual hual lejcutíac pa in cielo, hualas oc sejpa. Huan quinami anquitac la'ajcoquili, jan yojque anquitas yihual quiman temujtihuallas oc sejpa.

Quilajtultilo Matías pa quichihuas itequipanulisli Judas

¹²Cuaquinon quisaje pin lomita (tepetzindi) itoca Olivos, uyaje pa Jerusalén, amo huejca cataya, jan huejquita quinami quijtúa inminlajtol in judíos pa huil nejnemis se pan tonali quiman mosehuilo in judíos.

¹³Ajsije pa Jerusalén, calaquije pin cali, lejcuje pa pani capa chantiloaya. Yehuanten cataloaya Pedro huan Jacobo huan Juan huan Andrés huan Felipe huan Tomás huan Bartolomé huan Mateo huan Jacobo ixolol Alfeo. Noje cataya Simón, yihual se ca inminlanechiculisli lacames hual quinequinijme moanalo ca in romanos pa quinlaluxtisi pa quiahuac inminlali in judíos. Inminlanechiculisli motocani cananistas. Huan noje cataya Judas, yihual icni Jacobo. ¹⁴Yehuanten moxtin molaliloaya ca se lajtulisli pa lajlanilosquiaya Dios. Ca yehuanten cataloaya in sihuames huan María inantzín Jesucristo huan noje cataloaya nepa icnían Jesucristo.

¹⁵Innojen tonaliijmes moquetzac Pedro lajco capa in laneltocanjmes, yehuanten cataloaya quinami ciento

veinte (chicusepuhuali), huan Pedro quinmilic:

¹⁶—Nocnían lacames, quipiaya pa lamis mochías inon hual quijtuc in Espíritu Santo inahuac Judas. Yihual quinlaicanac yehuanten hual hualaje pa quihuicasi lailpili Jesús. In Espíritu Santo technextilfa inon pan ipampa in hual quijcuiluc in hué David pa yina. ¹⁷Judas yec se ca tehuanten imonextilinijmes Jesús, cataya iyaxca pa tequipanus ca tehuanten. ¹⁸Huan mocuhuulic se cuajmili ca in treinta tomin lachihuali ca plata hual quilaxlahuije Judas pa in niman amo cuali hual quichíac. Cuaquín huetzic in lacal pa itzontecon, xopunic icuerpo (inacayo) huan quistiquisaje mochi ilaijtic (icuilaxcol). ¹⁹Quiman quimatijque inon yehuanten hual chantiloaya pin Jerusalén, quitocayaltijque in cuajmili Aceldama. In quinequi quijtúa iCuajmili Esli pa inminlajtol yehuanten. ²⁰Huan yojque unca lajcuiluli inon inahuac Judas pa iamal in Salmos, quijtúa:

Ma ye lacajcahuali icali,
huan ma camo chanti amaqui pa icalijtic.

Huan quijtúa noje:

Ma tequipanu oc se capa yihual tequipanuni.

²¹Pedro laqueztiahuiaya, quinmiliaya, quil:

—Pampa inon, ma tijcalactican ca tehuanten oc se lacal pa quichijtías Judas itequipanulisli. Quipías pa yes se hual itequi ca tehuanten quitocaya Jesús. ²²Quipías pa yes se hual ca tehuanten cataya quiman tipehuaje, quiman Juan quicuayatequic Jesús. Quipías pa yes se hual mocahuaya ca tehuanten pa in tonali quiman tiquitaje Jesús la'ajcoquili pin cielo. Yoje cayas ca tehuanten oc se lacal hual huil quijtúa neli pampa Jesús yulic oc sejpa.

²³Cuaquinon quinlajtultijque ome hual cataloaya ca yehuanten, se ca

itoca José Barsabas, noje itocaya Justo, in oc se ca itoca Matías. ²⁴Cuaquinon, moxtin quilajlanijque Dios, yoje quilijque, quil:

—Tata, tehual tiquinmiximati inminyolo moxtin. Xitechnextili axcan calía ca in ome lacames tehual ticlajtultic. ²⁵Yoje, pa yihual cayas iyaxca itequipanulisli Judas. Yihual quicahuac itequipanulisli quiman quichíac in niman amo cuali. Pampín uyac ca capic cataya iyaxca pa yahuisquiaya.

²⁶Cuaquinon quilalijque cuajtzindis lacuixtili huan quisac icuajtzindi Matías. Yojque quilajtultije Matías, huan yihual yec lanahuatini ca in oc sequin once lanahuatinijmes.

Huala in Espíritu Santo

2 Ajsic in tonali itoca Pentecostés, moxtin cataloaya pan se cali, lajtuloaya pa inminyolo quinami se san.

²Huan jan ajnaxcan hualajtquisac se xahuanielisli, quisac pin cielo (ilhuicac) quinami se ijyecal chicahuac. Mocaquic pa mochi in cali calijtic capa cataloaya.

³Cuaquinon nesiloaya capa yehuanten len quinami sequin tixuxlimes. Mochi sejse cataya chicuenta se inejnepil hual cataya laxiluli. Huan moxiluje mochi sejse innojen tixuxlimes, molalije sejse pan mochi sejse ca yehuanten.

⁴Calaquic in Espíritu Santo ca moxtin inminyolo, huan yehuanten pehuaje lajtuje ca oc sequin lajtomes quiman in Espíritu Santo quinhueliltiaya pa lajtusi.

⁵Innojen tonalijmes hualajque pa Jerusalén judíos hual chantiloaya pa mochi in lalimes pin lalticpan, hual axcan chantitataloaya nepa pin caltilan. ⁶Yehuanten quicaquiloaya inminxahuanielisli in lanahuatinijmes laquezatataloaya. Pampín monechicujtihalaloaya ca capic cataloaya in lanahuatinijmes, moitaloaya ca lamajtilisli pampa

quicaquiloaya in lanahuatinijmes lajtutataloaya ca ilajtol mochi sejse hual lajtuya pa calía yes lali capa lacatic. ⁷Huan momajtitihualaloaya huan moiztihalaloaya ca lamajtilisli moiljitaloaya:

—Xiquitacan. In lacames cate moxtin galiletecos, innojen hual laqueztcate.

⁸¿Quinami tiquincaticate yehuanten lajtulo tolajtol tehuanten hual tilajtulo pin lali capa tilacatiye? ⁹Sequin ca tehuanten tichantilo pin lali Partia, sequin tichantilo pin lali Media, oc sequin tichantilo pa Elam. Sequin ticate judíos hual tichantilo pin lali Mesopotamia huan in lalticpan Capadocia, huan pin lalticpan Ponto huan pa Asia. ¹⁰Tichantilo noje pin lalticpan Frigia huan pa Panfilia. Tichantilo pa Egipto huan cajcapa pin lali Libia nepa pa itenco in lali itoca Cirene. Sequin ca tehuanten tichantilo pin caltilan hué Roma, nican tichantiticate se ome tonalitos san. ¹¹Sequin tilacatiye judíos, oc sequin amo tilacatiye judíos, mas que timochihuaje lacames hual ticmolancuacuetzililo Dios quinami in judíos. Sequin tichantilo pin lali Arabia. Ma yoje tiquincaticate innojen galiletecos laqueztcate ca tolajtol mochi sejse ca tehuanten, techilijtcate innojen hual Dios quinchía, innojen hual techmolachialtilo ca lamajtilisli.

¹²Yojque molapoluloaya moxtin, amo quimatiloaya len yahuiloaya quijtulo, moililoaya se ca oc se, quil: —¿Len yes inon?

¹³Huan quinhuitzquilijtinemiloaya oc sequin, quijtuje:

—Yehuanten lahuanticate ca iayo uva tzopelic huan yancuic.

Pedro quinnotza in lalalera

¹⁴Cuaquinon moquetzac Pedro ca in once lanahuatinijmes, quinnotzac in lalalera ca lajtol chicahuac, quinmilic:

—Lacames hual anmolali unca Judea huan anmoxtin hual anchanti pa Jerusalén, xicmatican inon, xijcaquican cuali len nía annimitzilía. ¹⁵Amo lahuanticate in lacames quinami anquijtutica. Amhuanten anquimati pampa nican amo lahuanalo pa huajtzinco, huan jan ticate chichnahui horas san pa huajtzinco. ¹⁶No, inon hual anquita panujtica unca in hual quijtuc pa yina Joel, yihual yec Dios ilajtuni. Nía annimitzilía len quijcuiluc. Quijtuc:

¹⁷Huan pin tonalijmes quiman mochijchías in lalticpan pa lamis, quijtúa quil Dios, niqinacalactilis noEspíritu ca lajtic inminyolo moxtin.

Yoje quijtusqui nolajtomes anmoxolomes lacames huan sihuames.

In lacames yajyancuic quinmitasqui laixotocalisli hual Dios quinnextilis,

huan in abuelojmes quintemiquisi lajtemijquimes.

¹⁸Quema, pa in tonali niqinacalactilis noEspíritu ca lajtic inminyolo nolapalehuinijmes lacames huan sihuames, huan laquetzasqui nonahuac nehual.

¹⁹Huan nehual niquinchihuas pin cielo lejlen hual lamajtilo, huan nicnextis nolahuellitlisli pa latzindan pin lalticpan.

Cayasi esli huan tixuxli huan pocli tetzahuac, se popucalisli niman hué.

²⁰Mopalas in tonali, laticumactis, mochihuas chichiltic in mesli quinami esli.

In yahui panúa quiman ca nadita ajsis in tonali quiman in Tata quinmacas ojli in lacames,

In yes se tonali hual laixpelas míac, lahuis chichahuac.

²¹Huan yoje cayas ca aqui yes quinotzas itoca in Tata, yihual

yes laquixtili pin ipolehuilislil ilaijlaculisli.

Inon unca len quijtúa Dios pan ipampa ilajtuni Joel hual quijcuiluc inon.

²²Cuaquion Pedro quinmilic:

—Xijcaquican, lacames israelitos, in hual nía annimitzilía. Jesús hual yulini pin caltilan Nazaret yec se lalac hual Dios anmitznextilic pampa yihual Jesús yec lalac hual yihual Dios quitilanic. Huan yoje Dios anmitznextilic inon pan ipampa innojen hual anmitztlachialtijec ca lamajtilisli. Innojen yihual quinchíac anmoyampa amhuanten pan ipampa quinami Dios quihueliltic Jesús pa quinchías. Inon amhuanten anquimati.

²³Huan yihual anquimictic pan se cuahuil pan inminpampa lacames hual amo quineltoalac tolajtol. Inon quipanuc, pampa quiman Dios quipehualtic mochi, yihual quilalic pa quipanusquiaya, quimatic pampa yahuiaya quipanu. Huan amhuanten anquitemacac pa quimictilosquiaya.

²⁴Ma yoje, yihual Dios quiyuliltic, quimacahuac pa camo mocahuasquiaya mictataya Jesús. In miquilislil amo huil quisulahuac Jesús pa camo yulisquiaya oc sejpá. ²⁵Yoje lajtuc pa yina tohué David inahuac yihual Jesús, quijtuc, quil:

Mojmosta niqitaya in Tata pa nolaixpan, pampa yihual nechlachilía cuali pa camo nicpías len hual nechmajtis.

²⁶Pampa in, paqui noyolo huan quijtúa nocamac ilajtomes ca paquilislil hué,

huan quema, nocuerpo yuli cantica len cuali hual nicchixtica.

²⁷Pampa amo ticmacahuiltis pa nehual nimocahuas capa in mijquimes.

Huan amo ticmacahuiltis pa palanis nocuerpo nehual, quema, nehual hual ticlajtultic pa nihuelitis.

²⁸ Tinechmaxtis pa nicanas in ojli
capa amo nimocahuas pa
niyultías, nicayas ca niman
míac paquilisli quiman niunca
moyampa.

Yojque quijtuc David hual yec tohué pa yina.

²⁹ Nocnían lacames,
animitzlaquetzilía inahuac tocní hué
David hual yulini pa yina. Nehual huil
annimitzilía ca lajtol melahuac, David
in hué miquic huan quilalpachuje,
tiquitalo tehuanten axcan capa
quilalpachuje. ³⁰ Ma yoje, in hué David
yec se ilajtuni Dios hual huil quijtuc len
yahuiaya panu, pampa Dios quihueliltic.
Quimatic David quinami Dios quilic
in ca lajtol hual amo mopala. Quilic
pampa yihual Dios yahuiaya quichía
hué se imiahuil David hual yahuiaya
lacati. Yahuiaya ye hué capa David
huelitini. ³¹ Huan David quimatic inon
pa yina quiman ayamo panuc. Pampín
lajtuc de quiman yahuiaya yuli oc
sejpa yihual hual Dios quilalic pa yes
tohué, quema, in Jesús hual moscaltic
pa Nazaret. David quijtuc pampa amo
yahuiaya ye lacajcahuali yihual capa in
mijquimes, huan amo yahuiaya palani
icuerpo. ³² In Jesús Dios quiyuliltic
oc sejpa, huan tehuanten ticate
hual tiquitaje timoxtin innojen hual
antimitzlaquetzilijiticate. ³³ Axcan, Dios
quichíac in Jesús pa yes niman hué.
Quilalic pa huelitis, axcan unca pa ima
cuali Dios pa huelitis. Noje Jesús canac
ilahueliltisli Dios pa techtilanilis in
Espíritu Santo. Axcan anquitzica huan
anquicactica quinami lahueliltía in
Espíritu Santo. ³⁴ Xiquitacan. David
in hué amo lejcuc pin cielo. Ma yoje
yihual ihuán quijtuc:

Dios in Tata quilic noTata:

“Ximolali pa noma cuali,

³⁵ xicaya nepa pa quiman

niquinsulahuas molacocolinijmes.

Niquinneltocaltis tehual.”

³⁶ Cuaquinon Pedro quinmilic:

—Pampa inon ma quimatican inon
moxtin yehuanten israelitos huan
ma camo quimahuilican pampa amo
melahuac: In Jesús hual amhuanten
anqipiluc pan in cuahuil, yihual Dios
quichía pa yihual yes in Tata huan in
Cristo.

³⁷ Quicaquijque inon, quincocuc
niman míac inminyolo, quinlajlanijque
Pedro huan in oc sequin
lanahuatinijmes, quinmilijque:

—Tocnían lacames, ¿len ticchihuasi?

³⁸ Pedro quinnanquilic:

—Xicpalacan anmoyolo pa
anlajnamiquis quinami Dios quinequi,
ximocuayatequican anmoxtin pa
anquinextilis quinami anquineltoca
in hual Dios axan technextilic
inahuac Jesucristo. Yoje anquinextilis
moxtin pampa yihual anmoTata. Yoje
quinpupjuhuas anmolajlaculisli,
noje anmitzmacas in Espíritu Santo
pa anmoyolo. ³⁹ Dios quijtuc neli
pampa yahuiaya anmijchihuili inon
pa amhuanten huan pa anmoxolomes
huan pa moxtin hual chantilo huejca,
moxtin hual Dios toTata quinnotzas.

⁴⁰ Huan ca in lajtomes huan ca míac
oc sequin lajtomes, Pedro quinmilic
in melahualisli. Quinmilic quinami
monequi pa laneltocasqui yehuanten,
quinmilic:

—Ximoquixtilican pin polehuilisli
capa anunca ca yehuanten hual yulilo
quichijiticate amo cuali huan yalo
polehuilo.

⁴¹ Cuaquinon, aquinojen quinmixtocaje
ilajtomes Pedro cataloaya lacuayatequili.
Huan pa in tonali miaje quinami ye mil
lacames hual pehuaje quineltocape Cristo.

⁴² Huan monechiculoaya mojmosta
pa quicaquisi len quimaxtiloaya in
lanahuatinijmes. Moxtin chantiloaya
quinami cataloaya inmicién moxtin,
monechiculoaya pa quicualosquiaya
pan pa quijnamiquisqui in Tata. Huan

yehuanten amo quicahualoaya pa quilajlanisqui Dios mojmosta.

Yoje yulinijme yehuanten hual ipehuayan quineltocajque Cristo

⁴³Huan Dios ilahuelilitisli quinmomajtiltic moxtin pampa quitaje miaje mochi hual Dios quichífac pan inminpampa in lanahuatinijmes. Pampa inon lachialoaya momajtitataloaya, quiztataloaya innojen hual quinextiloaya Dios ilahuelilitisli. ⁴⁴Chantiloaya monechicujticate in laneltocanijmes huan mochi hual quinpialoaya quinxiluililoaya ca moxtin in oc sequin laneltocanijmes. ⁴⁵Quinamacaloaya len quipialoaya huan len inminyaxca, cuaquín quixiluililoaya mochi sejse hual monequiaya pa quipiasquiaya len yesquiaya. ⁴⁶Huan mojmosta yahuiloaya sejpa huan oc sejpa pin tiopan hué pampa lajtuloaya pa inminyolo ca se lajtulisli. Quinlapanililoaya in pan quiman quicualoaya ilacualisli in Tata. Lacuajtinemiloaya pa calijtic inminalimes yehuanten, monechiculoaya pa lacualosquiaya ca paquilisli. Mocahuaya ca paquilisli mochi sejse ca iyolo, pampa quimatiloaya Cristo cataya ca yehuanten. ⁴⁷Quijtuloaya lajtomes huejué pa Dios, huan moxtin in oc sequin quinmixtocaloaya. Mojmosta in Tatita quinmiactiaya yehuanten hual quinequiloaya quilalilo inminlaneltocalisli ca in Tata. Huan pehualoaya monechiculo ca yehuanten hual axan quineltocajque Cristo. Monechiculoaya ca yehuanten pampa quinequilosquiaya moquixtililo pin ipolehuilisli inminlaijlaculisli.

Unca lapajtili se hual amo huil nejnemiaya

3 Panquisaloaya Pedro huan Juan pin tiopan hué pan ye horas

pa tiolac. Cataya in hora quiman quilajlaninijme Dios. ²Cataya nepa se lalac lahualicali, amo huil nejnemiaya, yojque lacatic. Mojmosta quilalinijme ilaixpan ilalapujquil in tiopan hué, in lalapujquil itocaya Cualtichin. Nepa quilalinijme pa quinmotemachilis tomin yehuanten hual panujtataloaya pin tiopan hué. ³Quinmitac Pedro huan Juan pehualoaya calaquilo pin tiopan hué. Cuaquín quintemachic pa quimacasquiaya se tomin. ⁴Huan mocahuac Pedro quiztataya in lalac, noje Juan quiztataya, huan Pedro quilic:

—Xitechita.

⁵Huan mocahuac quinmiztataya in lalac, quichixtataya yahuiloaya quimacalo len tomin yehuanten. ⁶Huan Pedro quilic:

—Amo nicpía tomin. Ma yoje, inon hual, quema, nicpía, in nimitzmaca: Ximoquetza huan xinejnemi pan ipampa ilahuelilitisli Jesucristo in nazareteco.

⁷Cuaquinon Pedro quiquitzquic ima cuali in lalac huan cajcoquic. Jan axcan momacatiquisaje chichahualisli icxihuajmes huan icayacojmes. ⁸Tzicuinic pani icxihuajmes, moquetzac huan pehuac nejnemic, calaquic ca yehuanten pin tiopan hué calijtic, nejnentífac huan tzicuintífac huan quijtutífac lajtomes huejué pampa Dios quipajtic. ⁹Huan moxtin in lalacera quitajque nejnentiahuiaya huan quijtutiahuiaya lajtomes huejué pa Dios. ¹⁰Quimatijque pampa in se yec yihual hual molalini pin tiopan hué ilalapujquil itoca Cualtichin. Quimatijque cataya in se hual motemachilini tomin. Pampa in, molapolultiloaya huan amo quimatiloaya len quijtulosquiaya inahuac inon hual quipanic.

Inon unca hual Pedro quijtuc pin lasehuán (lasehuayan) huejcanic, itocaya iLanejnemijquil Salomón

¹¹Huan in lalac hual pajtic quinquitziaya, amo quinmacahuaya

Pedro huan Juan, huan in lacialera molalujtihualaloaya capa yehuanten cataloaya pin lasehuayan pa nejnemisi, itocaya Ilanejnemijquil Salomón, molapolultitihualaloaya mías. ¹²Cuaquinon quinmitac Pedro yehuanten, quinmilic:

—Lacames israelitos, ¿leca anmocahua antechiztica pampa panuc inon?

¿Leca antechiztica quinami tehuanten ticnejnemiltije in lacial pan ipampa tolahuelilitisli? ¿Leca anquijtutica pampa tehuanten ticpialo lahuelilitisli hual amo quipialo oc sequin lacames?

¿Anquijtutica pampa tehuanten tilacames hual ticchihualo mías pa yoje Dios techhueliltis huan oc sequin lacames amo yoje mías quichihualo? ¹³InminDios Abraham huan Isaac huan Jacob, yihual inminDios totajtitzían, unca yihual hual quilalilic lahuelilitisli hué pa iXolol Jesús. Huan amhuanten anquitemacac Jesús ca yehuanten hual huelitilo, huan amo anquinequiaya pa quimacahuasqui quiman cataya ilaixpan Pilato, mas que Pilato quinequiaya quimacahua.

¹⁴Amhuanten amo anquinequiaya pa yes lamacahuali Jesús in lacial hual amo yec laijlaculi, yihual hual Dios quilajltultic. No, amhuanten anquilic pa anmitzmacahuillosquiaya se lamictini.

¹⁵Huan anquimictic in Cristo hual quinmaca yulilislisli moxtin. Ma yoje Dios quiyuliltic oc sejsa, quiquixtic pa capa cate in mijquimes. Tehuanten ticmatilo inon pampa tiquitaje quiman lamije panuje ye tonalijmes huan yihual quisac pa capa quilalpachuje quiman lamic miquic. ¹⁶Huan in lacial nican hual amo huil nejnemini axan amhuanten anquitzica huan anquiximati. Huan Dios quipajtic pampa ticneltocalo ilahuelilitisli Jesús. Huan pampa ticneltocalo Jesús, pampín axan in lacial moqueztica lapajtili anmolaijpan anmoxtin.

¹⁷Huan axcan, nocnían, nicmati pampa amhuanten amo anquimatiaya

len anquichihuaya pan in tonali anquimictic Jesús, huan amo quimatiloaya in yehuanten hual huelitilo. ¹⁸Ma yoje, quichíac Dios jan quinami yihual quilalilic pa panusquiaya, quijtuc inon quiman ayamo quinchihualtic ilajtunijmes pa lajtulosquiaya quinami iCristo Dios yahuiaya panu lacoccoltilisli. ¹⁹Pampin xicpalacan axcan anmoyolo, huan xicanacan iojli Dios. Yojque yihual anmitzquixtilis anmolaijlaculisli. Yojque anpanus tonalijmes hual nepa Dios anmitzmosehuiltis anmoyolo. ²⁰Huan yoje anmitztilanilis in se hual niman pa quiman anmitzmachtijte. Yihual in se hual Dios quilajltultic, nicnequi niqijtúa, in Jesús in Cristo.

²¹Axan yihual quipías pa mocahuas pin cielo, huan nepa mocahuas pa in tonali quiman Dios yahui quinmelahua huan quinyancuilia mochi. Inon pehuani quijtu Dios quiman pehuac in lalticpan. Quijtuni pan inminpampa ilajtunijmes hual quinlajltultic.

²²Yojque se ca innojen, Moisés, quinmilic totajtitzían, quinmilic, quil: “Anmitztilanilis in Tata anmoDios se hual nesis capa amhuanten anmocnían, se hual yes lajtuni quinami nehual. In se anquineltochas mochi hual anmitztilis. ²³Huan aqui yes amo quineltochas in lajtuni” quijtuc Moisés, “cuaquín in se yajmo cayas ca yehuanten hual iyaxca Dios. Dios quipolehuiltis ca polehuilislisli hual amo quiman lamis.”

²⁴Yoje —quinmilic Pedro—, moxtin ilajtunijmes Dios quijtunijme inon. Pehuac lajtuc Samuel huan cuaquinon lajtuloaya moxtin in oc sequin lajtunijmes hual yulihualaloaya quiman polehuic Samuel. Moxtin yehuanten lamachiltijque inahuac len yahuiaya panu pan tonalijmes capa tiyulticate axcan tehuanten.

²⁵Amhuanten anunca aquinojen hual anquipías innojen hual cuali, pampa

anunca imiahuimes ilajtunijmes Dios. Jo quema, huan in lajtulisli hual Dios quichíac ca totajtzitzían unca pa amhuanten noje. Ca in lajtulisli Dios quilic Abraham, quil quilic: “Momiahuil quinchihuilis cuali moxtin yehuanten pin lalticpan.” ²⁶Dios quiquixtic iXolol Jesús capa cataya ca in mijquimes, huan pejtataya ca amhuanten, anmitztilanilic Jesús pa yoje anmijchihuilisquiaya cuali, pa yojque yajmo anyulis anquichijtica laijlaculisli.

**Pedro huan Juan quijtulo
ilamaxtilisli Cristo inminlaixpan
yehuanten hual huelitilo**

4 Quinmilitataloaya in lalalera inon Pedro huan Juan, huan jan ajnaxcan moqueztiquisaje inminahuac in tiopistas huan ilaicanani ilachianijmes in tiopan hué. Huan ca yehuanten hualaloaya innojen hual quineltocaloaya ilamaxtilisli in saduceos. ²Cualaniloaya pampa Pedro huan Juan quinmaxtiloaya inahuac Jesús. Quinmilitaloaya pampa Jesús miqic huan cuaquinon yulic oc sejpa. Huan pampa in, quil, moxtin yulisi oc sejpa quiman miqulo. ³Yojque, quinqutzquijque huan quintzacuajque pa calijtic pa quiman ajsiaya mostatica, cuaquinon huil quinlajlanilosquiaya. Yojque quichihuajque pampa tiolactiaya huan amo monechicujtataloaya in huejueyenten. ⁴Ma yoje, quineltocaloaya niman míac lacames ca yehuanten hual quicaquijque in lajtol. Yojque miajque in laneltocanijmes. Axcan ajsije yeje quinami macuili mil lacames hual quineltocaloaya Cristo.

⁵Cuaquinon mostatica monechicujque inminhuejueyenten in judíos huan in abuelojmes huan in lamaxtinijmes hual quinmaxtiloaya inminlajtomes in judíos. ⁶Ca yehuanten cataloaya Anás, yihual in tiopista hué,

huan Caifás ilahuical ixolol sihal Anás, huan Juan huan Alejandro huan moxtin in lacames hual yeje inmicnían in tiopistas huejué, inmicnían pa oc sequin calimes. ⁷Quinlalijque Pedro huan Juan inminlaixpan yehuanten, quinlajlanijque:

—¿Ca aqui ilahuelilitlisli anquichíac inon?

⁸Cuaquinon in Espíritu Santo quihuelilitic Pedro pa quinmilis, quil: —Amhuanten inminhueyenten huan inminabuelojmes in israelitos, ⁹antechlajlantica axcan inahuac len cuali ticchihuiliijque in lalal cocoxqui, antechlajlantica ca aqui ilahuelilitlisli yihual pajtic. ¹⁰Xicmatican anmoxtin huan ma quimatican inon mochi Israel: Unca ca ilahuelilitlisli Jesucristo in nazareteco calica in se moqueztica anmolaixpan lapajtili. In Jesús anquipiluc pan se cuahuil huan anquimictic. Ma yoje, Dios quiyulitlic oc sejpa, quiquixtic capa cataya ca in mijquimes. ¹¹Pan ipampa se ilajtuni, yihual Dios quijtuc pampa cataloaya sequin lacames hual quichijtataloaya se cali. Cataya se tixcali hual amo quinequiloaya quilalilo pin cali. Ma yoje iteco in cali quilalic in tixcali capa quipialoaya pa quitequipanulosquiaya in tixcali yehuanten hual quichijtataloaya in cali. Jesús unca quinami in tixcali, unca in itixcali hué in cali. Huan Dios unca quinami iteco in cali. Yoje, Dios quilalic in Jesús pa ima cuali yihual. ¹²Huan amo unca oc se, jan yihual Jesús san hual huil tejchipahuilis toyolo, amo quitlanic Dios oc se pin mochi lalticpan hual quipía lahuelilitlisli pa techquixtilis pin ipolehuilisli tolaijlaculisli, jan Jesús san.

¹³Innojen tiopistas huan in huejueyenten quitaje quinami Pedro laquetzaya amo momajtitataya, huan noje amo momajtiaya Juan. Noje quimatije pampa yehuanten

yeje lacames hual amo uyajque momaxtijque ca in lamaxtinijmes, amo yeje lacames ca laquetzalisli. Pampa in, mopolultiloaya, pehuajque quijnamiqijque pampa Pedro huan Juan cayanijme ca Jesús. ¹⁴Noje quitaloaya in lal hual pajtic, nepa ca Pedro huan Juan moquezataya. Yojque amo huil quijituloaya len amo cuali inahuac in hual quichihuiliijque in lal Pedro huan Juan. ¹⁵Ma yoje, quiman quinmilijque in yeyenten pa quisasqui pa quiahuac capa monechicujtataloaya, molaquetzililoaya, moililoaya:

¹⁶—¿Len tiquinchihuiliisqui innojen lacames? Moxtin hual chantiticate pa Jerusalén quimatilo pampa quipajtijque yehuanten ca se lahueliltilisli in se hual amo huil nejnemiaya. Tehuanten amo huil tiquijtulo pampa islatatijticate, pampa nepa unca in lal hual pajtic. ¹⁷Ma yoje, pa yajmo momachilititas ca in lalera israelito len quipanuc in lal, ma tiquinmajtican tiquinmilijticate pa yajmo quinlaquetzilisqui lacames ilajtol Jesús.

¹⁸Cuaquinon quinnotzajque Pedro huan Juan, quinmilijque pa calaquisqui. Quinmilijque pa camo quiman quilaquetzilijtinemisqui amaqui inahuac Jesús, huan pa camo lamaxtinemisqui ca ilamaxtilisli.

¹⁹Huan quinnanquiliijque Pedro huan Juan, quinmilijque:

—Ximoijnamiquican calía unca cuali ilaixpan Dios pa ticchihuasi. ¿Unca cuali pa antimitzneltocasi amhuanten o pa ticneltocasi Dios? ²⁰Tehuanten amo huil timocahualo pa tilaqueztinemisi inahuac in hual tiquitajque huan tijcaquije.

²¹Oc sejpa in tiopistas huan in huejueyenten quinmilijque pampa yahuililoaya quinpitzililo tixuxli sinda amo quinneltocaloaya. Cuaquinon quinmacahuajque. Momajtiloaya

pa quinmacasqui lacocoltisli pampa in lalera pin caltilan cualanilosquiaya ca yehuanten sinda yoje quinchihuiliiloaya. Moxtin quinmijtutataloaya lajtomes huejué pa Dios huan quisejtataloaya pampa in lal axcan huil nejnemiaya. ²²Cataya pampa lacatic in lal quinpiaya quinami cuarenta y un, dos, tres (ompuhualihuanse, ome, ye) xixihuimes.

Moxtin in laneltocanjmes quilajlanilo Dios pa quinpalehuis

²³Quiman quinmacahuajque Pedro huan Juan, yehuanten uyajque ca capic cataloaya in oc sequin laneltocanjmes, quinmachiltijque mochi inon hual quinmilijque in tiopistas huejué huan in abuelojmes. ²⁴Yojque, quiman quicaquijque in, moxtin quilajlanijque Dios ca se lajtulisli, quilijque:

—ToTata hué, tehual tiquinchíac in cielo huan in lalticpan huan in al huejcalan. ²⁵Huan pan ipampa in Espíritu Santo, tehual Dios ticchíac pa David quijcuiluc molajtomes, quijtuc:

¿Leca mocuajcualantinemiloaya yehuanten hual amo molacames?

Huan ¿leca quijtulo ilacames Israel len hual amo monotza?

²⁶Hualalo in huejueyenten huan in huelitinijmes, monechiculo pa molaquetzilisqui pa quintzacuilisqui Dios huan in lal hual Dios quilajtultic pa yes hué, yihual Cristo.

²⁷Huan neli monechicuje nican pa Jerusalén, monechicuje pa latexpahuisi in huejueyenten pa yoje huil quimictisi motequipanujquil hual ticlajtultic, in Jesús hual ticlajtultic pa yes moCristo. Jo quema, monechicuje in hué Herodes huan Poncio Pilato ca in lacames pa oc sequin lalimes huan ca ilacames Israel. ²⁸Monechicuje pa quichihuasi mochi inon hual tiquijtuc

pampa yahuiaya panu pan tonalijmes quiman ayamo panuc. ²⁹Huan axan, Tata, xiquita quinami quinequilo techmajtilo yehuanten. Xitechmaca tehuanten motequipanujquimes mochi chicahualisli pa ticmachiltisi molajtol. ³⁰Itoca moXolol Jesús hual ticlajtultic pa yes hué quipía lahueliltilisli. Pampín pan ipampa ilahueliltilisli Jesús xitechmaca tehuanten lahueliltilisli pa tiquinpajtisi cocoxquimes, huan pa ticchihuasi míac hual quinmolapolultisi lacames pampa tiqinnextilijtica molahueliltilisli.

³¹Lamijque quilajlanijque Dios, cuaquín molinic in cali capa monechiculoaya, pampa hualac in Espíritu Santo, quinhueliltic moxtin, huan yehuanten quijtuloaya ca lahueliltilisli ilajtol Dios.

Jesucristo ilacames moxiluililo se ca oc se len inminyaxca

³²Huan pa inminyolo quipialoaya jan se lajtulisli yehuanten hual quineltocaloaya ilajtol Dios. Moxtin quijtutataloaya jan yoje, amaqui quijtuaya pampa in hual quiplaya yahuiaya ye pa yihual ihuán. Moxtin quijtuloaya pampa yahuiaya ye pa moxtin laneltocanjmes. ³³In lanahuatinijmes amo mocahuajque pa quijtutinemilosquiaya ilamachiltisli in Tata hual yulic oc sejpa. Laqueztinemiloaya ca ichicahualisli in Espíritu Santo. Huan moxtin in oc sequin quinmixtocaloaya in lanahuatinijmes míac. ³⁴Huan amo cataya amaqui ca yehuanten hual amo quiplaya nindeno, pampa in tecojuan hual quinpioaloaya inminlalimes huan calimes quinnamacajque. ³⁵Cuaquinon quinhualiquilijque in lanahuatinijmes in tomin hual canajque quiman quinnamacajque. Cuaquinon in lanahuatinijmes quixiluililoaya mochi sejse hual monequiaya pa quipiasquiaya

len. ³⁶Cataya se itoca José hual in lanahuatinijmes quitocayaltije Bernabé, itoca quinequi quijtúa lalac hual quimati quinlacahualtía oc sequin. Yihual yec se judío ca imiahuimes Leví. In Leví yec se ca in doce lacames hual quinpehualtije yehuanten in israelitos, yulini pa yina. In Bernabé lacatic pa se lali itoca Chipre hual unca lajco pin al huejcalan. ³⁷Yihual quiplaya se cuajmili huan quinamacac, quinhualiquilic in lanahuatinijmes in tomin.

Inminlajlaculisli Ananías huan Safira

5 Huan cataya se lalac itoca Ananías, quiplaya isihua itoca Safira. In Ananías quinamacac se icuajmili. ²Yihual moajcoquilic se omito in tomin hual quilaxlahuijque. Huan isihua quimatiaya inon huan cataya ca se lajtulisli ca ilahuical. Yojque, Ananías quinhualiquilic in lanahuatinijmes in oc se ilajco in tomin, quinmiliaya pampa quinmacaya mochi. ³Cuaquinon Pedro quilic:

—Ananías, ¿leca ticcháac inon calica Satanás mitztlanilic moyolo pa tislacatic ca in Espíritu Santo? Timoajcoquilijtica se omito in tomin hual mitzlaxlahuijque.

⁴¿Amo cataya moyaxca in cuajmili quiman ayamo ticnamacac? Huan quiman ticnamacac, ¿amo cataya moyaxca in tomin? ¿leca nuso ticlalic pa ticchiasquiaya inon? Amo tislacatic ca lacames, tislacatic ca Dios.

⁵Quincaquic in lajtomes Ananías, hueztiquisac, polehuic. Huan moxtin, quiman quimatijque inon pehuajque momajtijque míac. ⁶Cuaquinon moquetzajque in lacames yajyancuic, quilaquentijque, quihuicajque huan quilalpachujque.

⁷Mocahuac se nadita, quinami ye horas, calaquic isihua, amo quimatiaya len panuc. ⁸Huan Pedro quilic:

—Xichili sinda anquinamacac
anmocaujmilí ca yoje míac tomin.

Huan yihual quinanquílí:

—Jo quema, ca yoje míac.

⁹Huan Pedro quílí:

—¿Leca nuso anmocahuac ca in
lajtulisli tehual huan molahuical pa
anquichías inon? ¿Cuajnesi anquijtuc
pampa huil anquicuajcuamanac in
Espíritu Santo? Xiquita. Mocaqui
capantihualalo pin lalapunquílí
inmicxihuajmes innojen hual
quilalpachuje molahuical, tehual noje
mitzhuicasi.

¹⁰Huan hueztiquisac Safira
pa icxihuajmes Pedro, polehuic.
Calaquijque in lacames yajyancuic,
quitajque mictataya, quihuicajque
yihual noje, quilalpachujque inahuac
ilahuical. ¹¹Pampín momajtiloaya
míac moxtin in laneltocanjmes
huan momajtiloaya moxtin hual
momachiltijque ca innojen hual
panujque.

Quichihualo míac hual quinlapolultilo moxtin

¹²Huan Dios quinnextiliaya
ilahuiltilisli yehuanten ca innojen
míac hual quinchihuaya pan
inminpampa in lanahuatinijmes. Huan
moxtin in laneltocanjmes quipialoaya
se lajtulisli san, monechiculoaya
pin ilanejnemijquil Salomón hual
cataya pin tiopan hué. ¹³Ma yoje, in
oc sequin hual amo quineltoaloaya
momajtiloaya yahuillo capa
monechiculoaya in laneltocanjmes,
mas que quinnixtoaloaya míac
in laneltocanjmes. ¹⁴Huan
mojmosta miajtiahuiloaya aquinojen
quineltoaloaya in Tata Jesús, huan
cataloaya míac sihuames jan quinami
cataloaya lacames. ¹⁵Cuaquion
yoje quinhualicajque pin ojlimes
in cocoxquimes, quinlalijque pan
lapexlimes huan pan pelames. Yojuje

quiman panuaya Pedro, cuajnesi
quinmacasquiaya ilasehuán pan in
cocoxquimes pa yojuje pajtilosquiaya.

¹⁶Noje hualaloaya yehuanten hual
chantiloaya pa innojen caltilan pa
itejtenco Jerusalén. Quinhualicaloaya
in cocoxquimes huan aquinojen
quinpialoaya ijyecames amo cuajcuali,
huan moxtin cataloaya lapajtili.

Quintzacualo pin calijtic in lanahuatinijmes

¹⁷Cuaquion pehuac moxicuc
chicahuac in tiopista hué, yihual
huan moxtin hual cataloaya ca yihual,
yehuanten hual quineltoaloaya
ilamaxtilisli in saduceos. ¹⁸Huan
quinqutzquijque in lanahuatinijmes,
quintzacuajque pa calijtic. ¹⁹Ma yoje,
pa layúa in Tata ilanahuatini pin cielo
quinlapulic in ilalapunquimes in calijtic
capa cataloaya latzacuali, quinlaicanac
pa quiahuaac, quinmilic:

²⁰—Xiacan, ximoquetzacan pin
tiopan hué huan xiquinnahuatlican
moxtin yehuanten mochi
ilamachiltisli cuali in yulilisli hual
Jesús quimaca.

²¹Yojuje, quicaquijque inon,
calaquijque pin tiopan hué quiman
lanestihualaya, huan pehualoaya
lamaxtilo. Lamaxtiloaya in
lanahuatinijmes, hualajque in tiopista
hué huan aquinojen cataloaya ca
yihual, ajsijque pa oc se icalijtic in
tiopan hué. Quitilanijque lajtol pa
monechicusqui moxtin in Lanechiculisli
Hué ca moxtin inminabuelojmes in
lali Israel. Cuaquion quintilanijque
lachianijmes pa quinhualiquilisqui
in lanahuatinijmes hual cataloaya
latzacuali pin calijtic. ²²Huan
ajsijque nepa in lachianijmes hual
quintilanijque pa quinmanasqui in
lanahuatinijmes, amo quinmitajque.
²³Mocuepajque, lamachiltihualajque,
quinmilijque:

—Tiquitaje in calijtic latzacuali cuali huan in lachianijmes moquezataloaya pan lalapujquimes. Ma yoje, techlapulije, amo tiquitaje amaqui calijtic.

²⁴Quicaquijque inon in tiopista niman hué huan inminlaicanani in lachianijmes huan in tiopistas huejué, amo quimatiloaya len quijtulosciaya, quijtujque:

—¿Len panuc, huan len yahui panúa axan?

²⁵Cuaquinon hualac se, quinlamachiltic, quinmilic:

—Xiquitacan. Innojen lacames hual anquintzacuac calijtic axan cate moqueztcate pin tiopan hué, quinmaxticate in lacames.

²⁶Cuaquinon hualajque ilaicanani in lachianijmes huan ilacames huan quinhuicajque in lanahuatinijmes. Ma yoje, quinhuicajque amo quintecuatiahuiloaya, pampa momajtiloaya cuajnesi in lacames hual quincaquiloaya quinlaxilosquiaya tixcalimes sinda quinchihuilijtiahuilosquiaya lacocoltilisli.

²⁷Yojque quinhuicajque, quinlalijque lajco capa in Lanechiculisli Hué, huan in tiopista hué quinmilic:

²⁸—Tehuanten in Lanechiculisli Hué antimitzilijque chicahuac pa camo anquinmilis ilamaxtilisli in se itoca Jesús, huan xiquitacan, moxtin pa Jerusalén quimatilo inon hual anquimaxtítica. Huan anquinctica antechmotexpahuilfa yojque quinami tehuanten ticataloaya hual ticmictijque in lalac.

²⁹Cuaquín quinnanquiloc Pedro ca in oc sequin lanahuatinijmes, quinmilic:

—Ticpialo pa ticneltocasi Dios sinda lacames techililo pa camo ticchihuasi in hual Dios techilfa pa ticchihuasi.

³⁰InminDios totajtitzian cataya yihual quiyuliltic oc sejpa Jesús hual

amhuanten anquimictic. Anlatilanic pa quipilusi pan se cuahuil. ³¹Ma yoje Dios axan quimacac Jesús lahueliltisli hué pa yes laicanani pa huil huelitis quinami Dios huan pa quinquixtis lacames pin ipolehuilisli Dios icualanilisli. In Jesús Dios quimacac lahueliltisli pa quinpujpuhuas lacames inminlajlaculisli, pa quinquixtilis inminlajlaculisli. ³²Huan tehuanten ticmatilo pampa neli cate in lajtomes hual tiquijtucate, huan in Espíritu Santo unca pa toyolo. Yihual in Espíritu Santo Dios quinmaca moxtin hual quineltocaloaya in Espíritu Santo techmaxtia pampa in hual tiquijtulo unca melahuac.

³³Quicaquijque inon yehuanten pin Lanechiculisli Hué, cualanijque niman chicahuac huan quinequiloaya quinmictilo in lanahuatinijmes.

³⁴Cuaquín moquetzac nepa ca in lanechiculisli se ca yehuanten hual quineltocaloaya ilamaxtilisli in fariseos, yihual itocaya Gamaliel. Yihual yec se ilamaxtini inminlajto in judíos, quilasojlaloaya moxtin lacames. Quinmilic pa quinquixtilosquiaya in lanahuatinijmes pa quiahuac pa je nadita. ³⁵Cuaquinon laquetzac ca yehuanten pin lanechiculisli, quinmilic:

—Lacames israelitos, xiclachilican inahuac in hual anyahui anquinchihuilfa innojen lacames. ³⁶In annimitzilfa, pampa monequi pa anquijnamiquis quinami amo quipia mifac xixihuil quiman yulini in se itoca Teudas hual quijtuni pampa yihual yec hué lalac huan quitocanjme quinami nahui cientos lacames. Huan in Teudas cataya lamictili huan moxtin hual quitocanjme mosemanaloaya ca capic yes, huan yojque yajmo nesiaya ilanechiculisli. ³⁷Panuc inon, nesic Judas in galileteco, catanjme in tonalijmes quiman in huejueyenten quinpuhualoaya moxtin. Yihual

quinlaicanac míac lacames hual quitocanjme. Huan yihual noje miquic huan mosemantiaje moxtin hual quitocanjme. ³⁸Huan axcan annimitzilía inon: ximijcuanican pa camo anquintzacuas in lacames. Xiquincahuacan, pampa sinda in hual quichijtcate unca san hual lacames quinchijtcate, cuaquín amo huejcahuas pa mosehuis. ³⁹Ma yojque, sinda unca iyaxca Dios in hual quichijtcate, cuaquín amhuanten amo huil anquintzacuilis. Pampa in, xiquincahuacan pa camo anmoitas anmoantica ca Dios.

⁴⁰Cuaquinon, quixtocajque in hual quinmilic Gamaliel. Yojque, quiman quinnotzajque in lanahuatinijmes, quinhuitequijque, quinmilijque chicahuac pa yajmo quilamachiltinemiilosquiaya Jesús ilamaxtilisli. Cuaquinon quinmacahuajque. ⁴¹Ma yoje, quisajque in lanahuatinijmes, ca paquilisli quisajque pin Lanechiculisli Hué, pampa Dios quinchihuilic len hué. Quinchihuilic hué pampa quinmacahuilic pa panusqui lacocoltisli pampa quineltocaloaya Jesucristo. ⁴²Huan mojmosta amo mocahualoaya pa quimaxtilosquiaya huan pa quinahuatilosquiaya ilamachiltisli cuali Jesucristo. Quichihualoaya pin tiopan hué huan calpanuloaya lamaxtitataloaya pa inminchan moxtin.

Quinlajtultilo chicome lacames lapalehuinijmes pa quinxiluililo in hual quicualoaya

6 In tonalijmes miajque innojen hual quineltocaloaya Cristo. Huan yehuanten hual lajtuloaya griego nadita cualaniloaya ca yehuanten hual lajtuloaya hebreo. Cataya pampa in sihuames inminhuían hual lajtuloaya griego amo quipialoaya míac pa

quicualosquiaya. Amo quinmacaloaya míac quinami quinmacaloaya in sihuames inminhuían hual lajtuloaya hebreo. Inon quinpanuc quiman yes quinxiluililoaya len quicualosquiaya mojmosta. ²Cuaquinon in doce lanahuatinijmes quinahuatijque pa monechicusqui moxtin in laneltocanjmes, quinmilijque:

—Amo unca cuali pa tehuanten in lanahuatinijmes timocahuasi pa ticmaxtili ilajtol Dios pa tiquinxiluilisi len quicuasi. ³Pampín, tocnían, xiquinlajtultican chicome lacames capa amhuanten, lacames hual in Espíritu Santo quinhueliltía, lacames hual quimatilo míac. Tiquinlajtultisi pa quinxiluilisi in lacuali. ⁴Huan tehuanten in lanahuatinijmes ticayasi ticlajlanticate Dios huan tiquinnahuatiltijtcate moxtin ilajtol.

⁵Cuaquín moxtin quitajque pampa cuali in lajtol. Quilajtultijque Estéban, yihual yec lacal hual míac quimatiaya quineltoca ilajtol Dios, huan in Espíritu Santo moyaxcajtiliaya iyolo. Noje quinlajtultijque Felipe huan Prócoro huan Nicanor huan Timón huan Parmenas huan Nicolás. (Nicolás yulini pin caltilan hué Antioquía. Yihual lacatic pa oc se lali, amo yec judío nepa capa lacatic, san pehuac quineltocac in judíos inminlamaxtilisli quinami quimolancuacuetzililo Dios. Cuaquinon pehuac quineltocac Cristo.)

⁶Lamijque quinlajtultijque in chicome lacames, quinhualicajque inminlaixpan in lanahuatinijmes. Yehuanten in lanahuatinijmes quinlalilijque inminmajmajuan pan in chicome lacames huan quilajlanijque Dios pa yehuanten. Yojque lanextilijque pampa yehuanten in chicome lacames yahuililoaya quitequipanuililo Dios quinlaxiluilijtcate in hual quicualoaya.

⁷Huan míac oc sequin pehuajque quicaquijque ilajtol Dios, huan pa

Jerusalén miajtiajque niman míac aquinojen hual quineltoaloaya Cristo. Quema, míac tiopistas judíos pehuajque quineltoajque Cristo.

Quiquitziulo Estéban

⁸Huan Dios quihueliltic Estéban pa quinchíac míac hual pampa innojen molapolulitiloaya moxtin. Innojen hual quinchíac cataloaya hual quinextiaya Dios ilahueliltisli.

⁹Ma yoje, cataloaya sequin lacames judíos hual yehuanten inmintiopan itocaya inmintiopan in tequipanujquimes lamacahuali, huan cataloaya oc sequin judíos hual inminlali itoca Cirene, huan oc sequin hual yulinijme pin caltilan hué Alejándria, huan oc sequin hual yulinijme pin lalticpan itocaya Cilicia huan pin oc se lalticpan itocaya Asia. Huan Estéban quinlaquetziliztinemiloaya inahuac ilajtol Dios, huan yehuanten amo quinequiloaya quineltoalo len quimaxtiaya Estéban. ¹⁰Ma yoje, amo huil quisulahualoaya Estéban ca yehuanten inminlajtomes, pampa in Espíritu Santo amo mocahuac pa quimacas Estéban lajmatilisli huan quimacac lajtol calica quinnanquiliaya. ¹¹Cuaquinon quinmanajque lacames, quinmilijque pa islacatisqui quimotexpahuilijticate Estéban. Quinmilijque pa quijtutinemisqui quinami quicaquijque Estéban quinhuejuecaltitayaya Moisés huan Dios. ¹²Yojque quincualantitinemiloaya in lalalera huan in abuelojmes huan yehuanten hual quimaxtiloaya inminlajtol in judíos. Hualajtiquisajque, quiquitziquijque Estéban huan quihuilanajque pa in Lanechiculisli Hué. ¹³Cuaquinon moquetzajque yehuanten hual yahuiloaya islacatilo pa quimotexpahuilosquiaya Estéban, quijtuque islaticatijticate:

—In lalac amo mocahua pa laquetzas len amo cuali inahuac in lasojli tiopan hué huan inahuac ilajtol Moisés.

¹⁴Ticmatilo inon pampa tijcaquijque yihual quijtutataya, quil, pampa in Jesús, in se hual yulini pa Nazaré, quil, quixitinis in lasojli tiopan hué huan quinpalas in lajtol hual Moisés techtemacac.

¹⁵Huan moxtin nepa hual cataloaya pin Lanechiculisli Hué quitaloaya Estéban, amo mocahualoaya pa quitalosquiaya iixco. Quitajque cahuantataya iixco chicuenta iixco se ilanahuatini in cielo.

Monapatía Estéban inminlaixpan yehuanten hual lahueliltilo

7 Cuaquinon in tiopista hué quilajlanic Estéban, quil:

—¿Unca yojque inon hual quijtulo?

²Huan Estéban quinnanquiloc:

—Lacames nocnían huan notajtzitzián, xilacaquican. In Dios hual quipía mochi lahueliltisli hué monextilic totajtzin Abraham. Cataya pin lali itoca Mesopotamia, cataya quiman ayamo pehuac chantic pin lalticpan itoca Harán. ³Dios quilic: “Xiquisa pa molali huan pa capa cate mocnían, huan xía pa in lali hual nimitznextilis.” ⁴Cuaquinon, quisac pa inminlali in caldeos, chantiaya pa Harán. Huan quiman polehuic itajtzin, hualac Abraham pa chantis nican pin lali capa amhuanten anchantitica axan. ⁵Dios amo quimacac Abraham se nadita in lali nican pa yesquiaya iyaxca. Ma yoje, quilic neli pampa yahuiaya quimaca in lali pa quipiasquiaya. Huan amo mocahuasquiaya pa se inminyaxca yihual huan imiahuimes, mas que ayamo quipiac Abrahám se ixolol. ⁶Yojque Dios quijtuc noje pampa Abraham imiahuimes yahuiloaya chantilo pa oc se lali hual amo inminyaxca. Dios quijtuc

pampa yehuanten pa in oc se lali yahuilooaya quinchihualo imiahuimes Abrahám tequipanujquimes hual amo quilaxlahuilo. Yahuilooaya quinchihuililo amo cuali pa nahui cientos xixihuimes. ⁷Ma yoje, Dios quilic: “Niquincocoltis yehuanten hual quinchihuilisqui yojque. Huan quiman panus inon, cuaquín quisasqui momiahuimes huan nechmolancuacuetzilisqui pin lali nican.”

⁸Cuaquinon quichíac Dios se lajtulisli ca Abraham, —quinmilic Estéban—, huan pa monextis in lajtulisli, quintequilijque naditita inmincuilaxli in xolomes lacames, huan yojque amo timocahualo pa tiquinchihuilisi yoje toxolomes tehuanten in judíos timoxtin. Yojque quiman lacatic Isaac hual yec ixolol Abrahám quichíac chicué tonalijmes, cuaquinon quitequilic icuilaxli. Cuaquinon Isaac quiپیaya ixolol Jacob huan pa Jacob lacatije in doce lacames, yehuanten hual quinpehualtije in doce inminlanechiculisli imiahuimes hual ticate tehuanten in judíos. ⁹Huan moxiculoaya ixolomes Jacob ca inimicni José, pampín quinamaquiltije José icnían oc sequin lacames hual quihuicaje quinami tequipanujquil ilpitataya pa in lali Egipto. Ma yoje, Dios cataya ca José. ¹⁰Quiquixtilic pa mochi icocoltilisli hual panuc. Noje Dios quixtocaltic José in Faraón hual yec in hué nepa Egipto. Quixtocac pampa Dios quimacac José míac lajmatilisli. Yoje Faraón quilalic José pa yes huelitini pin lali Egipto huan pa moxtin yehuanten hual cataloaya pa ichan Faraón.

¹¹Cuaquín ajsic se mayandi pa mochi in lali Egipto huan pa tolali Canaan. Panuloaya míac mayanalisli, amo quitaloaya len quicuajque totajtzitzían.

¹²Cuaquín quilijque Jacob pampa

cataya, quil, trigo pa Egipto, pampín pehuac quintilanic pa Egipto ixolomes hual yeje totajtzitzían, quintilanic pan trigo. ¹³Huan quiman Jacob quintilanic oc sejpa pa Egipto, cuaquinon José quinmachiltic icnían pampa yihual inimicni José pampa ayamo quislacuje. Yojque, Faraón in hué quimatic in lali capa lacatic José huan noje quimatic ca len lacames yihual lacatic. ¹⁴Cuaquín José quintilanic icnían pa quinmanasi Jacob huan moxtin yehuanten pa inminchan. Cataloaya setenta y cinco (yepuhualicaxtuli) lacames huan sihuames. ¹⁵Huan uyac Jacob, quisac pa in lali Canaan pa yas pa Egipto. Nepa polehuic Jacob huan cuaquinon totajtzitzían noje polehujie. ¹⁶Mocuepaje pa Canaan pa quihuicasi in mijquimes pa in caltilan itoca Siquem nican pa tolali Canaan, nepa quinlalpachuje pa in nadita lali hual mocuhuicilic Abraham hual quinamaquiltijque ixolomes Hamor nepa pa Siquem. ¹⁷Ajsitihualaya in tonalijmes pa lamisquiaya mochía len Dios quilic pampa yahuiaya quinchihuilic Abraham imiahuimes, huan miajtiahuilooaya yehuanten imiahuimes Israel. ¹⁸Cuaquín ajsije tonalijmes quiman cataya oc se hué pin lali Egipto. In hué amo quimatiaya in hual quichihuani José. ¹⁹Yihual techcuaajcuamanaya tehuanten in judíos, quinchihuilic niman míac amo cuali totajtzitzían. Latilanic pa quincajcahualosquiaya inminxolomes lacames quiman yes lacatije pa yoje miquilosquiaya.

²⁰Cataloaya in tonalijmes lacatic Moisés —quinmilic Estéban—, huan Dios quixtocac míac. Itajtzin huan inantzin quilachililoaya Moisés pa ye mesli pa inminchan. ²¹Cuaquín quipiyoaya pa quiquixtisi pa calijtic inminchan. Huan ixolol sihual Faraón in hué pa Egipto canac Moisés,

quipiani quinami yec yihual ixolol.

²²Huan quimaxtije Moisés ca mochi inminlajmatilisli yehuanten pa Egipto. Pampín huelitiaya míac, quimatiaya lajtu niman cuali huan quimatiaya quichía míac.

²³Yojque, ajsic yec lalac ca cuarenta xixihuil, quijtuc pampa yahuiaya quinaxaluili icnían israelitos.

²⁴Huan quitac se lalac egipcio quihuitequiaya se lalac israelito. Jan ajnaxcan Moisés uyac quinapatic. Quilacuepilic in lalac egipcio pampa quichihuiliaya inon in lalac israelito, quimictic Moisés in egipcio. ²⁵Moisés quijtuc pampa yehuanten israelitos quimatilosquiaya pampa Dios yahuiaya quinquixti pa Egipto pan ipampa yihual. Ma yoje, yehuanten amo huil quimatiloaya inon. ²⁶Mostatica moitic Moisés paxalujtataya capa yehuanten cataloaya. Quinmitac ome icnían israelitos moanticate. Yihual motoliniaya pa quinsehuic pa camo moanalosquiaya, quinmilic: “Lacames, amhuanten anuncia amocnían. ¿Leca amoantica?” ²⁷Ma yoje, in se hual quichihuiliaya amo cuali icni quitojpehuac Moisés, quilic: “¿Quinami unca moyaxca pa tiyes laicanani huan lamacahuani pa tehuanten? ²⁸¿Huejtica ticnequi tichmicti jan quinami yalhua ticmictic in lalac egipcio?” ²⁹Cuaquín choluc Moisés pampa quijtuc inon in lalac. Uyac chantic pan lali itoca Madián, se lali hual amo yihual ilali. Nepa monamictic, quinpiaya ome ixolomes lacames.

³⁰Mocahuac nepa cuarenta xixíl —quinmilic Estéban— huan se ilanahuatini in cielo monextic ca Moisés capa amaqi chantiaya, cataya capa unca in loma itoca Sinái. Huan ilanahuatini in cielo quinotzac Moisés pa se huitzcuaajtzindi lalatica.

³¹Quitac Moisés inon, quilapolultic in hual quiztataya. Moajxiltiaya pa

quitasquiaya cuali, lajtuc in Tata, quilic: ³²“Nehual niunca inminDios motajtzitzián, iDios Abraham huan iDios Isaac huan iDios Jacob.” Cuaquín pehuac yuyucac Moisés, momajtiaya pa quiztías. ³³Cuaquinon in Tata quilic: “Xiquintoma xiquinquixti ilacsames mocxihuajmes, pampa in lali capa timoqueztica unca lali hual Dios mochipahuilic pa yihual ihuían. ³⁴Niquitac neli quinami panujticate lacocoltilisli nolacames nepa pa Egipto, nijcaquic quinami xahuanticate. Pampa in, nitemuc pa niquinmacahuas. Huan axcan, xihuala tehual, nimitztilanis pa timocuepas pa Egipto.”

³⁵In Moisés in israelitos amo quinequije, quilije: “¿Quinami unca moyaxca pa tiyes tolaicanani huan tolamacahuani?” Ma yoje Dios quitilanic in Moisés, quichíac laicanani. Huan quilajtultic in Moisés pa quimacahuasquiaya in israelitos hual quipianijme pa tequipanulosquiaya amo ca laxlahuilisli. Yahuiaya quinmacahua pan ipampa ilanahuatini in cielo hual yahuiaya quipalehui. Cataya ilanahuatini in cielo hual quimonextilic ca in huizcuaajtzindi hual lalatataya. ³⁶In Moisés quinlaicanac quinquixtitataya in israelitos pin lali Egipto. Quinchihuaya inminlaixpan yehuanten innojen hual quinlapolultiloaya ca lamajtilisli. Quinchihuiliaya pin lali Egipto huan pin Al Huejcalan Chichiltic, huan pa cuarenta xixihuimes pin lali capa amaqi oc sequin chantiaya. ³⁷Yihual unca in Moisés hual quinmilic yehuanten ilacames Israel, quil: “Dios anmitzlacatiltilis se ilajtuni capa amocnían. Yihual yec quinami nehual, yihual anquineltoacas.” ³⁸In Moisés unca aqui cataya capa yehuanten ilacames Israel in xixihuimes quiman monechiculoaya capa amaqi chantiaya. Yihual cataya ca

ilanahuatini in cielo hual laquetzaya ca yihual pin loma (tepel) hué itoca Sinaí. Huan yihual Moisés noje cataya ca totajtzitzían. Canac pan ipampa ilanahuatini in cielo in lajtol cuali hual techyuliltía, canac pa anmitzmacas amhuanten.

³⁹Ma yoje, totajtzitzían amo quinequije quineltocape in lajtol —quinmilic Estéban—, quitojpehuaje Moisés, amo quinequije quicaquije. Ca míac lanequilisli quiqnamiquije Egipto, ca ompic quinequiloaya mocuepalo oc sejpa. ⁴⁰Quilije Aaron; “Xitejchiuili tatadioses hual techlaicanasi pa Egipto oc sejpa, pampa in Moisés, in se hual techhualiac techquixtitataya pa Egipto, axcan amo ticmatilo len quipanuc.” ⁴¹Cuaquín in tonalijmes quichihuaje se mono chicuenta se becerro. Quihualiquilije huendi ilaixpan, huahuaje quiapije paquilisli pampa quichihuajque in becerro ca inminmajmajuan. ⁴²Pampín Dios mocahuac pa quinchihuilis cuali. Quintemacac pa quinmolancuacuetzilisi in tonali huan in mesli huan in silalimes. Yojque unca lajcuiluli pin iamal Dios ilajtuni, quijtua:

¿Annechhualiquilic nehual huendis hual yeje yulijquimes pa cuarenta xixihuimes pin lali capa amaqui chantiaya, amhuanten israelitos?

⁴³No, anquimantíac ilatzacualoni Moloc huan len chicuenta ilucero in dios itoca Renfán. Cataloaya monos hual anquinchíac pa anquinmolancuacuetzilisi. Pampín annimitzjicuanis pa anquisas pa anmolali huan annimitztilanis ca yoje nepa Babilonia.

⁴⁴Pa innojen xixihuimes quiman cataloaya totajtzitzían capa amaqui chantiaya —Estéban quinlaquetzilijthaiuya—, quipianijme

in cali lachihuali ca cuilaxli, nepa calijtic quinpianijme la'ajcoquili in tixcalimes, inminpan cataya lajcuiluli ilajtol Dios. Noje pin cali quimolancuacuetziliniyime Dios. Dios, pan tonalijmes hual laquetzac ca Moisés, quilic pa quichías in cali lachihuali ca cuilaxli jan quinami Dios quinexilic Moisés quiman cataya ca yihual pin loma (tepel) hué itoca Sinaí. ⁴⁵Canaje in cali totajtzitzían, quihualiacaje pa in lali nican in tonalijmes quiman calaquije ca Josué. Quinlaicanac ca niquic Josué pampa Moisés polehuic. Moyaxajtije ca in lali nican. Dios quinquixtiaya in oc sequin lalalera hual cataloaya nican. Totajtzitzían quitaje quinami Dios quinquixtic. Huan in cali lachihuali ca cuilaxli mocahuac nican huan cuaquín ajsije innojen tonalijmes quiman David yec hué. ⁴⁶Dios quichihuilic niman cuali David, huan David quitemachic Dios pa quimacahuiltis quichihuilis se cali hué pa iDios Israel. ⁴⁷Huan Dios amo quimacahuiltic. Cataya Salomón ixolol David hual quichihuilic Dios in cali. ⁴⁸Ma yoje, in Dios niman hué amo chanti pin tiopajmes hual quinchihualo lacames. Unca jan quinami quijtua Dios pan ipampa ilajtuni, quilic:

⁴⁹Mochi in cielo jan unca san quinami capa nimolalía, huan in lalticpan jan unca san quinami capa niqinlalía nocxihuajmes.

¿Len cali annejchihuilis? quil quilía in Tata,

o ¿len anquichías capa nimosehuis?

⁵⁰Amo huil anquichías len pa nehual pampa ca nehual nolahueliltisli niqinchíac mochi innojen.

Yojque quijtuc Dios.

⁵¹iAmhuanten amo quiman anquinequi anquimati —quinnotzac Estéban—, huan mas que anquipía pan anmocuerpos in latequilisli hual quinextía tolajtulisi ca Dios, amo

anquinequi anquineltoaca pa anmoyolo amo cuali! Anmonacajmes amo quinequilo lacaquilo pa anquijnamiquis in lajtulisli. Amo quiman anquinequi anquineltoaca in Espíritu Santo, anunca quinami anmotajtzitzían. ⁵²Ma annimitzili inon. Anmotajtzitzían quintojtocanijme moxtin ilajtunijmes Dios pa quinchihuililosquiaya lacocoltilisli, quema, moxtin. Huan quinmictije yehuanten hual pa yina quinlamachilitoaya pampa hualas in lalac hual amo quipía lajlaculisli hual Dios yahuiaya quitilani pin lalticpan. Huan yihual in lalac hual amo quipía lajlaculisli amhuanten anquitemacac pa yes lamictili. ⁵³Jo quema, ancataya amhuanten hual anquipác in ilajtol Dios pan inminpampa ilanahuatinijmes in cielo huan ma yoje amo anquineltoaca.

Quimictilo Estéban

⁵⁴Quicaquijque inon yehuanten pin Lanechiculisli Hué, cualaniloaya ca mochi inminchicahualisli huan lacuajcualoaya pa Estéban. ⁵⁵Ma yoje, pa iyolo Estéban huelitiaya in Espíritu Santo, huan yihual Estéban mocajtiquisac lachixtica pa pani pin cielo (ilhuicac). Quitac ilaixpelalisli cualtichin Dios, huan nepa moquezataya Jesús pa ima cuali Dios. ⁵⁶Cuaquín quinnotzac in lalacera Estéban, quil:

—iXiquitacan, niquita lapujtica in cielo, huan yihual ilalac in cielo, yihual moquezataya pa ima cuali Dios!

⁵⁷Cuaquín tzajtzijque ca lajtol chicahuac huan motzacuilijque inminnacajmes huan ca se lajtulisli molalujtiquisajque capa Estéban.

⁵⁸Quiquixtitiquisajque pa quiahuac Jerusalén, cuaquinon quilaxilijque tixcalazos. Huan yehuanten hual quimotexpahuilijque Estéban quinmacajque inminnahujmes se

lalach yancuic itoca Saulo pa yihual quinmitilis.

⁵⁹Quimictiloaya Estéban ca tixcalazos, yihual quinoztataya in Tata, quil quilic:

—Tata Jesús, xicana noyulilisli.

⁶⁰Cuaquinon molancuacuetzac, tzajtzic ca lajtol chicahuac, quijtc:

—Tata, amo xiquinmotexpahuili pampa quichihuaje in lajlaculisli.

Lamic quijtc inon, polehuic.

Saulo quintojtoca in laneltocanijmes

8 Huan Saulo quinequiaya pa miquisquiaya, yihual cataya ca inminlajtulisli yehuanten hual quimictijque. Cuaquín in tonali, yehuanten hual amo quineltocaloaya Jesucristo pehuajque quintojtocajque niman míac in laneltocanijmes.

Quintojtocaloaya pa quinchihuilisqui lacocoltilisli yehuanten hual cataloaya pa Jerusalén. Niman míac cholujque mosemantiajque cajcapic pin lalticpan Judea huan pin lalticpan Samaria. Jan in lanahuatinijmes san mocahuajque pa Jerusalén. ²Sequin lacames hual quineltocaloaya Dios ca mochi inminyolo quilalpachujque Estebán huan quichoquilijque niman míac.

³Huan Saulo pehuac motolinic pa quinlami in laneltocanijmes, calpanuaya calactinemiaya pa inminchan, huan quinhuicatihuiaya lacames huan sihuames, quinhuilantiahuiaya pa quintzacuas pin calijtic.

Quinlaquetzililo ilajtol Cristo capa yehuanten pa Samaria

⁴Pampin mosemantiahuiiloaya in laneltocanijmes, yajtinemiloaya quinlaquetzilijticcate moxtin in lamachilitisli cuali. ⁵Huan Felipe temuc pa in caltilan hué pin lalticpan Samaria, nepa quinlaquetziliaya in lacames ilajtol Cristo. ⁶Quicaquiloaya

cuali in m'ac lacames in hual quinmiliaya Felipe. Cataloaya ca se lajtulisli pampa quicaquiloaya huan quitaloaya innojen m'ac hual quinchihuaya Felipe calica quinnextiliaya ilahuelilitlisli Dios. ⁷Pan ipampa Dios ilahuelilitlisli quisajque ijyecames amo cuajcuali pa m'ac hual quinpioaloaya, quisajque tzajtztiahuilooaya chichahuac. Noje quinpahtic Felipe m'ac cocoxquimes hual amo huil moliniloaya huan oc sequin hual amo huil nejnemiloaya cuali. ⁸Pamp'ín cataya m'ac paquilisli pa in caltilan. ⁹Nepa cataya se lacal itoca Simón, yec lacal laxuxani nepa quiman ayamo hualac Felipe. Huan yehuanten pa Samaria molapolultinijme pampa quinmitanijme innojen hual yihual quinchihuani. In Simón quiituaya pampa yihual yec lacal ca m'ac lahuellilitlisli. ¹⁰Huan moxtin lacames tijtipichin huan quema, lacames huejueyenten quicaquinijme ca mochi lamajtilisli, quijtunijme: —In Simón quip'ía Dios ilahuelilitlisli, in lahuellilitlisli hual itoca hue. ¹¹Huan m'ac xixihuil quicaquinijme ca mochi lamajtilisli pampa molapolultinijme quiman quitanijme mochi in laxuxanilisli hual quichihuani. ¹²Cuaquín Felipe quinlaquetzilic yehuanten pa quimatilosquiaya ilahuelilitlisli Dios huan ilahuelilitlisli Jesucristo, huan pamp'ín quineltocaloaya in lamachilitlisli cuali huan cataloaya lacuayatequili lacames huan noje sihuames. ¹³Huan in Simón noje quineltocac huan cataya lacuayatequili. Cuaquín yihual mojmosta quitocatihuiaya Felipe huan molapolultiaya m'ac quiman yec quinmitaya panulo innojen hual quinextiloaya ilahuelilitlisli hual Dios quip'ía. ¹⁴Cuaquín momachiltijque in lanahuatinijmes pa Jerusalén

quinami yehuanten pin lalticpan Samaria quineltocaloaya ilajtol Dios. Pamp'ín quintilanilijque Pedro huan Juan. ¹⁵Temujque yehuanten pa Samaria huan quilajlanijque Dios pa quinhueliltis in Esp'ritu Santo yehuanten hual axan quineltocajque. ¹⁶Quipiajque pa quichihuasi inon pampa ayamo quinhueliltic in Esp'ritu Santo yehuanten pa Samaria. Jan cataloaya lacuayatequili pampa quineltocajque Jesucristo. ¹⁷Cuaquinon quinlalilijque Pedro huan Juan inminmajmajuan pan yehuanten pa Samaria hual quineltocajque Cristo, yojque quinhueliltic in Esp'ritu Santo. ¹⁸Huan quitac Simón quinami hualac in Esp'ritu Santo quiman yes in lanahuatinijmes quinlalilijque inminmajmajuan pani yehuanten. Pampa in quinequiaya quinmaca Pedro huan Juan tomin, quinmilic: ¹⁹—Xichmaca nehual noje in lahuellilitlisli pa quihueliltis in Esp'ritu Santo aqui yes niclalilis nomajmajuan. ²⁰Pedro quilic: —Xipolehui ca mochi motomin pampa tiquijtuc tiahuiaya timocuhuili lahuellilitlisli hual Dios san quitilan'ía. In lahuellilitlisli amo huil mocuhuil'ía se. ²¹Tehual amo unca moyaxca pa titequipanus ca in, pampa amo unca chipahuac moyolo ilaixpan Dios. ²²Pamp'ín xicpala moyolo, xijcahua in amo cuali hual tiquijtuc. Xiclajlani Dios pa cuajnesi yihual mitzpujpuhua in hual ticnequiaya ticch'ía pa moyolo. ²³In nimitzil'ía pampa niquita tehual timoxicujtica m'ac huan amo timocajtica pa tiquijtuc len amo cuali pa moyolo. ²⁴Cuaquín quinanquilic Simón: —Xiclajlanic in Tata pa nehual amhuanten pa camo nechpanus nindeno quinami in hual tichilic. ²⁵Quiman lamijque quinnahuatilijque Pedro huan Juan in

lamachtilisli cuali quinmilitataloaya quinami unca melahuac ilajtol Dios, cuaquín canajque ojli pa mocuepasqui pa Jerusalén. Quinpanajtiahuiloaya míac caltilan pa in lalticpan Samaria, nepa quinlanahuatilijque yehuanten in lamachtilisli cuali.

Felipe quiximati se lalac hual chantiaya pin lali itoca Etiopía

²⁶Huan se ilanahuatini in Tata pin cielo (ilhuicac) quilic Felipe, quil: —Ximoquetza huan xía pa sur, xicana in ojli hual quisa nepa Jerusalén huan temúa pa Gaza, in ojli panúa capa amaqui chanti.

²⁷Cuaquín moquetzac Felipe, uyac. Cataya pa ojli, Felipe quitac se lalac hual chantiaya pa Etiopía, in lalac yec se eunuco (se lalac hual amo huil mochía itajtzin xolomes). Yihual yajtiahuiaya pan ojli pan layahualujquimes. Yihual yec hué lalac hual quitequipanuilic in hué sidual itocaya Candace hual huelitiaya pin lali Etiopía. Yec icomisariado de bienes, quilachiliaya mochi itomin in hué sidual. In lalac eunuco hualac pa Jerusalén pa quimolancuacuetzilis Dios.

²⁸Axcan mocuectiahuiaya pa Etiopía. Molalijtataya pa ilayahualujquimes yihual, momaxtiaya in amal hual quijcuiluc Isaías hual pa yina yec ilajtuni Dios. ²⁹Cuaquín in Espiritu Santo quilic Felipe, quil:

—Ximoajxilti pa in ca layahualujquimes.

³⁰Yojque molalujtíac Felipe huan quicaquic in lalac momaxtitataya iamal Isaías ilajtuni Dios. Huan Felipe quilic: —¿Ticmati len quinequi quijtúa in hual timomaxtitica?

³¹Huan in lalac eunuco quilic: —¿Quinami huil nicmati sinda amaqui nechnextilía?

Quilic Felipe pa lejcus pin layahualujquimes pa molalis

inahuac. ³²Huan pa ilajtol Dios capa momaxtitataya yojque quijtuc:

Cataya quinami se borrego hual quihuicaloaya pa quimictisqui, huan quinami se borreguito hual amo choca quiman quiximalo, yojque cataya in lalac, amo quijtuc nindeno.

³³Quichihuilijque yihual len quichihuililo se lalac amo cuali, quimotexpahuilijque mas que amo quichihuac nindeno amo cuali. Huan ¿aquí huil quimati quichi cate moxtin aquinojen hual quineltoalo?

Yihual quimictijque huan quisac yihual pin lalticpan.

³⁴In lalac eunuco quilajlanic Felipe, quilic:

—Ma nimitzljani, ¿aquí unca in se hual techlaquetzilijtica in lajtuni? ¿Yihual ihuan, o oc se?

³⁵Cuaquinon Felipe quinanquiliaya, pehuac quilic ilamachtilisli cuali Jesús quinami quijtuc ilajtol Dios pa in amal capa momaxtitataya in lalac eunuco. ³⁶Quiman uyajtiajqe oc se nadita pan ojli, ajsijque capa cataya al, huan in lalac eunuco quilic:

—Xiquita. Nican unca al. ¿Amo huil niyes lacuayatequili nehual?

³⁷Huan Felipe quilic:

—Sinda ticneltoca ca mochi moyolo, ¿leca camo?

Cuaquinon in lalac eunuco quinanquilic:

—Nicaneltoca Jesucristo pampa yihual ixolol Dios.

³⁸Cuaquín quilic pa moquetzasquiaya in layahualujquimes huan temujque in omenten pa al, Felipe huan in lalac eunuco, cuaquín Felipe quicuayatequic.

³⁹Quisajque pin al, huan iEspiritu in Tata quihuicatiquisac Felipe, yojque in lalac eunuco yajmo quitaya. Cuaquín canac ojli oc sejpa, yajtíac ca míac paquilisli. ⁴⁰Ma yoje, Felipe

moitac pin caltilan itoca Azote huan quinlaquetziliaya in lacames, quinmilijtataya in lamachiltisli cuali nepa huan pa mochi innojen caltilan hual quinpanajtiahuiaya. Lamic quinpanahuic huan ajsic pa in caltilan Cesarea.

Saulo quipala iyolo

(Hch. 22:6-16; 26:12-18)

9 Huan Saulo amo mocahuaya pa quijtutinemisquiaya pampa yahuiaya quinlami aquinojen quineltocaloaya in Tata. Pampa inon uyac quitac in tiopista hué. ²Quilajlanic pa quimacasquiaya amames lajcuiluli pa quinhuiquilisquiaya yehuanten hual quipialoaya lahueliltilisli pin tiopajmes hual cataloaya pin caltilan hué Damasco. In amames quimacahuiltic Saulo pa quinquitzquisquiaya moxtin hual quitocaloaya Jesús iojli, ma yecan lacames o ma yecan sihuames. Cuaquinon quinhuicasquiaya lailpili pa Jerusalén. ³Huan cataya nepa quiman ajsitiahuioloaya pan ojli amo huejca pa quiahuac Damasco, jan ajnaxcan quixpelatiquisac itenco Saulo se laixpelalisli pin cielo. ⁴Huetzic pan lali Saulo, quicaquic se lajtol quilic:
—Saulo, Saulo, ¿leca tiquintojtocatica yehuanten hual nechnehtocalo? Yojque tichtojtocatica nehual.

Huan Saulo quinanquilic:

—¿Aqui tehual, Tata?

⁵Huan in lajtol quilic:

—Nehual niJesús hual tictojtocatica. Timococoltitica tehual, tiquinami se buey hual quitecuajtica in latzopinijquil ca icxían.

⁶Cuaquinon Saulo yuyucatataya quilic:

—Tata, ¿len ticnequi pa nicchías?

Quinanquilic:

—Ximoquetza huan xicalaqui pin caltilan, nepa mitzilis se len ticpías pa ticchías.

⁷Huan mocahuajque, amo huil lajtujque in lacames hual ca Saulo yahuioloaya pin ojli. Quicaquijque quema in lajtol. Ma yoje amo quitajque amaqui.

⁸Cuaquín moquetzac Saulo capa cataya pan lali, huan quiman quinlapuc iixtololojmes amo huil lachiaya. Yoje in lacames ca yihual quiquitziqijque imajma huan quihuicajque pa Damasco.

⁹Huan cataya pa ye tonalijmes amo lachiaya, amo lacuaya huan amo launiaya.

¹⁰Cataya pa Damasco se laneltocani itocaya Ananías huan in Tata Jesús quixotocac Ananías huan quilic:

—Ananías.

Huan quinanquilic:

—Nican niunca, Tata.

¹¹Huan in Tata Jesús quilic:

—Ximoquetza, xía pa in ojli itoca Melahuac, xictemu pa icali Juda se itoca Saulo hual chantini pin caltilan Tarso. Yihual quilajlantica Dios. ¹²Huan pan ipampa laixotocalisli yihual quitac se lalac, huan tehual tiunca in lalac hual quitac. In Saulo mitzitac tihualac, tiquinlalic momajmajuan ipan pa lachiasquiaya oc sejpa.

¹³Quinanquilic Ananías, quilic:

—Tata, nechlamachiltije míac lacames in hual quichijtinemi in se.

Quinchihuilijtinemiaya tetzcuinuc yehuanten hual mitzneltocalo pa Jerusalén. ¹⁴Huan quimacahuiltije, quil, in tiopistas huejué pa Jerusalén pa hualasquiaya nican pa quinhuicasquiaya lailpili moxtin hual mitznotalo pa tiquinpalehuis. Yahui quintzacua pin calijtic.

¹⁵Ma yoje, in Tata quilic:

—Xía, pampa nehual niclajtultic in Saulo pa nechtequipanuilis.

Quinlaquetzilis nonahuac nehual inminlaixpan yehuanten hual amo judíos huan inminlaixpan inminhueyenten huan noje inmixpan

in judíos. ¹⁶Nicnextilis Saulo quinami yahui quipía pa panus míac lacoccoltilisli pampa yihual nechneltoaca.

¹⁷Cuaquín uyac Ananías, calaquic pin cali capa cataya Saulo, quilalilic imajmajuan ipan, quilic:

—Nocni Saulo, nechtilanic in Tata, yihual hual mitzmonextilic tehual pan ojli capa tihualaya. Nechtilanic pa tilachías oc sejpa, huan pa mitzhueliltis in Espíritu Santo.

¹⁸Jan ajnaxcan cataya quinami hueztiquisaje len chicuenta icaliyoch michin pan Saulo iixtololojmes.

Cuaquinon huil lachiaya oc sejpa. Yoje, moquetzac huan cataya lacuayatequili.

¹⁹Cuaquinon lacuac huan yojque canac chichahualisli. Mocahuac pa sequin tonalijmes umpa ca in laneltocanjmes hual cataloaya pa Damasco.

Saulo quinmilía lacames pa Damasco ilamachiltilisli Cristo

²⁰Huan jan axcan pehuac quinlaquetzilic ilamachiltilisli Jesús pin tiopajmes, quijtuaya pampa in Jesús yihual ixolol Dios.

²¹Yoje, molapolultijque moxtin hual quicaquiloaya, pehualoaya quijtulo:

—¿Amo yihual in se hual quinchihuilini lacoccoltilisli yehuanten pa Jerusalén hual quineltocalo in Jesús? Huan ¿amo cataya pampa inon noje hualac yihual ca niquic pa quinhuicasquiaya lailpili pa in tiopistas huejué?

²²Ma yoje, quinlaquetzilijiahuiaya míac Saulo ilajtol Dios ca míac lajmatilisli huan amo momajtic. Yojque quinsulahuaya ca ilamaxtilisli moxtin in judíos hual chantiloaya nepa pa Damasco, quinnextiliaya neli pampa in Jesús yihual in Cristo hual Dios quitilanic pan lalticpan.

Saulo cholúa pa como quimictisqui in judíos

²³Panujque míac tonalijmes, huan cuaquinon molalilijque in judíos

pa quitemulosquiaya quinami quimictilosquiaya Saulo. ²⁴Momachiltic Saulo pampa yahuiloaya quimictilo, quichixtataloaya yihual yihualitonali, pa semilhuil huan pa layúa, pa ilalapujquimes in latzacuali palahuac huan cuajtic hual quiyahualujtataya in caltilan. ²⁵Pampín, quihuicajque Saulo in laneltocanjmes, quitemuhijque pa pani ilatzacuali palahuac in caltilan pa layúa, quitemuhijque ca se chiquihuil hué ca mecames pa quiahuac in palahuac latzacuali, huan yojque choluc Saulo.

Saulo pa Jerusalén

²⁶Ajisc Saulo pa Jerusalén, quinequiaya yahui capa monechiculoaya in laneltocanjmes, huan momajtiloaya yehuanten pampa yihual quinchihuilini tetzcuinuc, amo quijtuloaya pampa neli yihual axcan quineltocaya Cristo. ²⁷Ma yoje, Bernabé quinamiquic Saulo quinami icni, quihuicac capa cayajque in lanahuatinijmes, quinquhuilic quinami pan ojli Saulo quitac in Tata Jesús huan quinami in Tata Jesús laquetzac ca Saulo. Bernabé noje quinmilic quinami nepa pa Damasco Saulo amo momajtiaya quinlaquetzili ilamachiltilisli Jesús. ²⁸Yojque, mocahuaya Saulo ca yehuanten, yajtinemiaya cajcapa pa Jerusalén. ²⁹Laquetzinemiaya Saulo ilamachiltilisli Jesús in Tata, amo momajtitica nindeno. Laquetzaya ca in judíos hual lajtuloaya griego, noje layantiaya ca yehuanten. Cuaquín yehuanten motoloiniloaya pa quimictilosquiaya Saulo. ³⁰Quimatijque inon icnían laneltocanjmes, huan quihuicajque Saulo, temujque pa Cesarea. Umpa quitilanjque pa barco pa in caltilan Tarso.

³¹Cuaquinon quipialoaya mosehuilisli moxtin in laneltocanjmes

pa mochi in lalticpan Judea huan pin lalticpan Galilea huan pin lalticpan Samaria. Mojmosta monextililoaya m'iac ilamaxtilisli in Tata, yojque quineltoaloaya ca m'iac chichahualisli. Huan moxtin yultinemiloaya momajtiloaya ilaixpan Dios. Huan quinpalchuiaya mojmosta in Esp'iritu Santo, yojque miajqque Dios ilacames.

Eneas unca lapajtili

³²Huan panuaya Pedro cajcapa pa m'iac caltilan, temuc pa se itoca Lida, nepa chantiloaya sequin hual Dios quinlajtultic pa quineltoalosquiaya.

³³Nepa quitac se lalcal itoca Eneas. In se lastataya pan lapexli quiapiaya chicue xixihuil amo huil nejnemiaya. ³⁴Huan Pedro quilic:

—Eneas, mitzpajtia Jesucristo.

Ximoquetza huan xicajcoqui molapexli.

Jan ajnaxcan moqueztiquisac. ³⁵Huan quitajque moxtin hual chantiloaya pa Lida huan pa quiahuac pin ixlan Saron. Niman m'iac momalinajque inminyolo pa quitocasqui in Tata Jesus.

Dorcac yuli oc sejp'a

³⁶Cataya pin caltilan itoca Jope se sihual laneltocani itoca Tabita. Pa lajtol griego itoca Dorcas. In se mojmosta quinchihuilitinemiaya len cuali oc sequin huan quinmacatinemiaya m'iac yehuanten hual amo quipialoaya nindeno. ³⁷Pa in tonalijmes mococuhuaya, cuaquinon polehuic. Cuaquin caltijque in mijquil huan quihuicajque pa pani, quilalijque calijtic pin caltzindi pani in cali.

³⁸Momachiltijque in laneltocanijmes pampa Pedro cataya nepa Lida hual amo cataya huejca. Pampin yehuanten pa Jope quintilanijque ome lacames ca capic cataya Pedro pa quililosquiaya:

—Amo xihuejcahua pa tihualas ca tehuanten.

³⁹Yojque moquetzac Pedro, uyac ca yehuanten. Ajsic pa Jope, quihuicajque pa in calijtic pa pani. Huan hualajque ca Pedro moxtin in sihuames hual inminhu'an, chocataloaya, quinextilijque in laquemes huan inminahuajmes hual quinnemiltiloaya, hual quintzomilini Dorcas quiman yulini.

⁴⁰Cuaquin quinquixtic Pedro pa quiahuac moxtin, molancuacuetzac quilajlanic Dios. Cuaquinon momalinac Pedro capa in mijquil, quilic: —Tabita, ximoquetza.

Molapulic ixtololjmes huan quiztataya Pedro, molalic. ⁴¹Cuaquinon Pedro quimacac imajma huan quiquetzac Dorcas. Cuaquin quinnotzac in sihuames hual inminhu'an huan quitemacac yultataya oc sejp'a. ⁴²Huan quimachiltijque inon pa mochi Jope. Pampa in, pehuaje quineltoajque in Tata Jesus m'iac lacames huan sihuames nepa Jope. ⁴³Huan Pedro mocahuac pa Jope, chantitaya sequin tonalijmes pa ichan se itoca Simon, yihual quiyapani cuilaxli.

Pedro huan Cornelio

10 Cataya se lalcal pin caltilan Cesarea, yihual itocaya Cornelio. Yec inminlaicanani cien guaches hual cataloaya ilanechiculisli guaches hual motocaya in Italiano. ²Yihual yec lalcal cuali, huan yihual huan moxtin hual chantiloaya pa ichan quimolancuacuetzililoaya Dios huan momajtiloaya ilaixpan Dios. Cornelio quimacani len cuali yehuanten in judios hual amo quipialoaya nindeno huan mojmosta quilajlaniaya Dios. ³Se tonali quinami ye horas pa tiolac, quitac in Cornelio se ilanahuatini iDios in cielo (ilhuicac), hualac capa yihual quilic:

—iCornelio!

⁴Mocahuac Cornelio quiztataya huan momajtitataya, quilic:

—¿Len ticnequisquiaya, Tata?

In lanahuatini quilic:

—Quicaquic Dios inon hual ticlajlanic huan yihual quimati quinami tiquinpalehuía yehuanten hual amo quipialo nindeno. Pampín mitzijnamiquía. ⁵Axcan, xiquintilani lacames pa yasqui pa Jope, xicnahuati pa hualas se itoca Simón hual noje itoca Pedro. ⁶Nepa chantiticate huan se Simón hual quiyapa cuilaxli. Unca inahuac in al huejcalan icali in se hual quimati quiyapa cuilaxli. Mitzilis in Simón Pedro len ticpiás pa ticchías.

⁷Jan axcan yajmo nesic ilanahuatini in cielo hual laquetzac ca yihual. Yojque quinnotzac Cornelio ome itequipanujquimes huan se guache hual noje quineltocaya Dios, yihual yec se ca yehuanten in guaches hual mojmosta mocahuaya quitequipanuilijtataya Cornelio san. ⁸Cuaquín quinmachiltic Cornelio mochi, quintilanic pa Jope.

⁹Mostatica, yehuanten cataloaya pin ojli huan moajxiltitihualaloaya pa Jope. Huan Pedro axan lejcuc pa in cali ca pani capa palahuac pa quilajlanis Dios, cataya lacualispan. ¹⁰Huan mayantiquisac Pedro, quinequiaya lacua. Yojque quiyucxilitoaya len quicuasquiaya. Huan quiman Pedro quichixtataya, moxotocac len. ¹¹Quitac lapujtica in cielo huan nepa temujtihualac len chicuenta se tzotzomajli hué, cataya latemuhuili ca itejtenco lailpili, temuc pan lalticpan. ¹²Pa in tzotzomajli cataloaya mochi yulijquimes ca nahui icxihuajmes huan yulijquimes hual mohuilanilo pan lali huan tutomes. ¹³Cuaquinon se lajtol mocauic, quilic:

—Ximoquetza, Pedro, xicmicti len pa tijcuas.

¹⁴Pedro quilic:

—Amo quiman, Tata, pampa amo quiman nijcuac len hual amo cuali

pa quicuasi tehuanten in judíos, jan quinami quijtúa tolajtol.

¹⁵Quijtuc in lajtol oc sejpa:

—In hual Dios quijtúa unca cuali pa quicuas se, amo xiquili tehual da amo cuali.

¹⁶In panuc ca ye latemuhuilisli huan jan ajnaxcan yec lahuicali pin cielo in hual nesiaya chicuenta se tzotzomajli. ¹⁷Yoje mocahuac Pedro quijnamicataya, quijtuc:

—¿Len yes inon? ¿Leca nechnextilic Dios in laxotocalisli?

Ca in nadita, ajsijque pa in cali capa cataya Pedro in lacames hual quintilanic Cornelio, lamijque lajlanijque capa cataya in cali huan axcan ajsijque. ¹⁸Lanotzajque, lajlanijque sinda cuajnesi chantiaya nepa se itoca Simón hual noje itoca Pedro. ¹⁹Pedro ayamo mocahuaya pa quijnamiqis in laxotocalisli.

²⁰Cuaquín in Espíritu Santo quilic:

—Xiquita. Cate ye lacames mitztemujticate. Axcan, ximoquetza, xitemu huan xía ca yehuanten. Amo xicmahuili, pampa nehual niquintilanic.

²¹Yojque temuc Pedro capa cataloaya innojen lacames, quinmilic:

—Xiquitacan. Nehual aqui anquitemujtica. ¿Pa len anhualaya?

²²Yehuanten quinanquilijque:

—Unca se itoca Cornelio, yihual inminlaicanani cien guaches. Yihual se lalac cuali, quichía len Dios quinequi, momajtía ilaixpan Dios. Lajtulo cuali inahuac yihual moxtin in judíos. Se ilanahuatini in cielo quilic in Cornelio pa techtilanisquiaya pa timitzhuicalosquiaya tehual pa ichan. In lanahuatini quilic pa quicaquis len tehual tía tiquifía.

²³Pampín quinmilic Pedro pa mosehuilosquiaya, pa panulosquiaya in layúa ca yihual. Huan mostatica moquetzac Pedro, ca yehuanten uyac. Ca yehuanten noje uyajque sequin

inmicnían laneltocanjmes, chantiloaya nepa Jope.

²⁴Mostatica ajsisque pa Cesarea, nepa quinchixtataloaya Cornelio ca icnían huan ilajlasojli hual yuliloaya pa oc sequin calimes, quinnehicuc Cornelio pa ichan. ²⁵Calactataya Pedro, quisac Cornelio pa quinamiquis, quimolancuacuetzilijthualaya Pedro.

²⁶Jan axcan, Pedro quiquetzac, quilic: —Ximoquetza, nehual noje nilacal, amo xichmolancuacuetzili.

²⁷Cuaquín calaquic Pedro, huan yihual laqueztataloaya huan calijtic quinmitac Pedro lacalera lanechiculi.

²⁸Cuaquinon Pedro quinmilitic: —Amhuanten anquimati pampa tolajtol hual technextilía quinami ticmolancuacuetzililo Dios amo techmacahuilía pa timochihuasi lajlasojli cuajcuali ca aquinojen hual amo cate judfos. Noje amo toyaxca pa tiqipaxalulisi. Ma yoje, nechnextilic Dios pampa amo unca cuali pa nehual niquijtus da amo cuajcuali yehuanten hual amo judfos huan yojque monequi pa camo niquijtus da amo unca cuali pa se judfo tiqipaxalulisi. ²⁹Yojque, nihualac pampa tilatilaníc pa nihualasquiaya, amo nimonejnequic. Axcan, ma annimitzljajlani, ¿leca anlatilanic pa nihualasquiaya?

³⁰Cuaquín quijtcuc Cornelio: —Axan quipía nahui tonali ca nijquin horas, ye pa tiolac, niclajlantataya Dios nohuían pa nocalijtic huan monextitiquisac se lalac pa nolaixpan lalaquentili ca tzotzomajli laixpelatica. ³¹Nechilic: “Cornelio, Dios quijnamiquic len ticlajlaníc, huan noje quijnamiquic in cuali hual tiqipinchihuilía judfos hual amo quipialo nindeno. ³²Axcan, xilatilani pa in caltilan Jope pa ticnahuatis pa hualas se itoca Simón hual noje itoca Pedro. Yihual chantitica pa ichan Simón in hual quimati layapa cuilaxli

nepa inahuac in al huejcalan.” ³³Jan axcan, nilatilaníc pa tihualasquiaya huan tehual tinejchihuilic cuali pampa tihualac. Axcan, timoxtin ticate nican ilaixpan Dios pa tijcaquisi mochi hual mitzilic in Tata pa titechilis.

Inon hual quinmilitic Pedro yehuanten pa icali Cornelio

³⁴Yoje pehuac laquetzac Pedro, quinmilitic:

—Axcan neli nicmati pampa Dios quita se jan quinami quita oc se, da unca judfo o da amo unca judfo.

³⁵Capa cate mochi lacames yihual quilajtultía aqui yes hual quimati momajtía ilaixpan yihual, aqui yes hual itequi quichía len cuali. ³⁶Dios quintilanilic in judfos ilajtol, unca lamachiltisilic cuali hual techhueliltía pa ticayasi jan sepa ca Dios pan ipampa Jesucristo. Yihual iteco moxtin.

³⁷Amhuanten anquimati in hual panuc pa mochi inminlali in judfos. Pehuac pin lalticpan Galilea, cataya quiman Juan lamini lanoztinemi pa lacames quipalasi inminyolo pa laijnamiquis quinami Dios, pa yoje huil yesi lacuayatequili. ³⁸Cuaquinon Dios quilalic Jesús pa quichías itequipanulisi, yihual Jesús hual moscaltic pin caltilan Nazaret. Dios quimacac pa iyolo Jesús in Espiritu Santo, quimacac míac lahueltisilic. Cuaquinon ca in lahueltisilic yajtinemiaya Jesús quichijtataya len cuali. Quinpajtic moxtin aquinojen hual in lili quincocoltiaya ca ilahueliltisilic. Yojque quichihuaya Jesús pampa Dios cataya ca yihual. ³⁹Huan nehual huan oc sequin lanahuatinijmes, tehuanten tiquitaje ca toixtolojmes mochi hual quichíac Jesús cajcapa pa inminlali in judfos huan pa Jerusalén. ⁴⁰Huan quipiluje pan se cuahuil pa quimictisi huan yojque miquic. Ma yoje, yihual Dios quiyuliltic quiman

panuje ye tonalijmes, quimacahuiltic pa yesquiaya laitali. ⁴¹Amo quitaje moxtin, jan tiquitaje tehuanten san. Dios techlajtultic quiman ayamo panuje innojen, techlajtultic pa tiyelosquiaya hual tiqitalosquiaya ca toixtololojmes. Tehuanten tiyeje aquinojen hual tilacuanijme huan tilaunijme ca yihual quiman yuliaya oc sejpa. ⁴²Huan techtilanic pa tiquinlaquetzililosquiaya in judíos de inon. Techtilanic pa tiquijtulosquiaya neli pampa in Jesús unca yihual hual Dios quilajtultic pa yes la'ajuani pa in tonali quiman lamis in lalticpan. Quijts len quipanus sejse quinami cahuilúa aqui hual yahui caya yultica huan aqui hual miquic. ⁴³Yojque quijitulo neli mochi in amames hual quinmijcuiluje Dios ilajtunijmes. Quijitulo pampa Dios quinpujpuhuas inminlajlaculisli moxtin hual quineltocalo, quinpujpuhuas pan ipampa Jesús.

Huala in Espíritu Santo pan innojen hual amo judíos

⁴⁴Ayamo lamiaya quinmili Pedro in lajtomes huan hualac in Espíritu Santo ca moxtin hual quicaquiloaya. ⁴⁵Huan molapolultiloaya moxtin in laneltocanjmes judíos hual yeje latzontequili pa inmincuilaxlimes, yehuanten hual hualajque ca Pedro. Molapolultiloaya pampa quitajque quinami hualac in Espíritu Santo noje capa in lacames hual amo yeje judíos, capa Cornelio huan icnían hual yuliloaya ca oc sequin calimes huan ilajlasojli. ⁴⁶In judíos quincacuijque yehuanten hual amo yeje judíos. Quincacuijque yehuanten laqueztataloaya ca oc sequin lajtomes hual ayamo quiman quimatiloaya laquetzalo. Quililoaya Dios mías lajtomes cuajcuali huan huejué. Cuaquinon Pedro quinmilic yehuanten hual hualajque ca yihual, quinmilic:

⁴⁷—Innojen quipialo in Espíritu Santo san quinami tehuanten. Neli amaqui huil quijtúa pampa amo unca inminyaxca pa tiquincuyatequisi ca al.

⁴⁸Cuaquín quilic Pedro pa yesqui lacuyatequili quiman quijtuloaya pampa quineltocaloaya Jesucristo. Huan yehuanten quilajlanijque Pedro pa mocahuas ca yehuanten sequin tonalijmes.

Pedro quinmachiltía in abuelojmes huan in lanahuatinijmes pa Jerusalén in hual panuc pa ichan Cornelio

11 Momachiltijque in lanahuatinijmes huan tocnían laneltocanjmes hual cataloaya pa Judea, momachiltijque quinami pehualoaya quineltocalo ilajtol Dios yehuanten hual amo yeje judíos. ²Quiman panquisac Pedro pa Jerusalén, pehualoaya cajualo in judíos hual quineltocaloaya in lajtol hual quijtúa pampa moxtin quipialo pa quipiasqui icuilaxli latzontequili quinami quijtúa inminlajtol in judíos. ³Quilijque: —Tíac tipaxaluc pa inminchan yehuanten hual amo quipialo latzontequili inmincuilaxli quinami quijtúa tolajtol, noje ca yehuanten tilacuac.

⁴Pampa inon, pehuac quinmachiltic Pedro mochi sejse lachihualisli hual panujque, quinmilic:

⁵—Nicataya pin caltilan Jope, niclajlantataya Dios. Niquitac quinami len laxotocalisli, temujtihualac len chicuenta se tzotzomajli hué, yec latemuhui pin cielo quinami quiqizquitataloaya ca in nahui itejtenco, temujtihualac ca capic nicataya. ⁶Nimocahuac niquiztataya pa inon, niquitac ca nolajnamiquilisli. Niquinmitac iyulijquimes in lalticpan ca nahui icxihuajmes, huan iyulijquimes in cuajlan huan yulijquimes hual

mohuilanalo pan lali huan tutomes. ⁷Cuaquín nijcaquic se lajtol, nechilic: “Ximoquetza, Pedro, xicmicti len pa tijcuas.” ⁸Ma yoje, nicnanquilic: “Amo quiman, Tata, pampa amo quiman nijcua in hual tolajtol quijtúa pa camo quicuasi tehuanten in judíos.” ⁹Huan nechnanquilic in lajtol pin cielo oc sejpa, quil: “Amo xiquijtu pampa amo unca cuali pa quicuas se in hual Dios quijtúa pampa unca cuali.” ¹⁰Huan in panuc ca ye latemuhuilisli huan cuaquín lejcuje in tzotzomajli huan in yulijquimes oc sejpa pin cielo. ¹¹Cuaquinon jan ajnaxcan ajsije ye lacames pa in cali capa nicataya, cataloaya latilanili pa nechanasí, quisaje pin caltilan Cesarea. ¹²Nechilic in Espíritu Santo pa nías ca yehuanten huan pa camo nías nicmahuilijtataya. Yojque in lacames huan nehual tiae pa Cesarea, noje chicuase tocnfan uyaje ca tehuanten huan ticalaquije pa ichan in lalac itoca Cornelio. ¹³Techmachiltic in Cornelio quinami quitac se ilanahuatini in cielo pa icalí calijtic moqueztataya, huan in lanahuatini quilic: “Xiquintilani lacames pa Jope pa canasi Simón, in hual noje itoca Pedro. ¹⁴Mitzilis quinami tehual huan moxtin hual chantilo pa mochan anyes laquixtili pin polehuilisli.” ¹⁵Yojque, quiman nipehuac niquinlaquetzilic yehuanten, jan axcan hualajtiquisac capa yehuanten in Espíritu Santo jan quinami hualac capa tehuanten ipehuayan quiman pehuac quitilanic in Tata. ¹⁶Cuaquín niquijnami quic ilajtol in Tata Jesús quiman quijtuc: “Neli Juan lacuayatequic ca al. Ma yoje, amhuanten anyes lacuayatequili ca in Espíritu Santo.” ¹⁷Pampín, sinda quinmacac Dios yehuanten in lahueliltilisli hual techmacac tehuanten noje hual ticneltocaje in Tata Jesucristo, cuaquinon nehual amo huil nictzacuilic Dios.

¹⁸Quiman quicaquijque inon, yajmo cajuajque Pedro, quijtujque lajtomes huejué huan cuajcuali pa Dios, quilijque:

—iJan yoje Dios quimacahuilic pa quinpalasi inminyolo pa laijnami quisi quinami Dios yehuanten hual amo judíos, Dios quinmaca yulilisli hual amo quiman lamis!

In laneltocanjmes pin caltilan Antioquía

¹⁹Quiman quimictijque Esteban, cuaquinon pehuajque quintejtemujque moxtin hual quineltocaloaya toTata Jesucristo pa quinchiuililosquiaya lacocoltilisli. Pampín cholujque in laneltocanjmes ca capic yesquiaya huan ajsijque pa in lali itoca Fenicia huan pa in lali lajco pin al huejcalan itoca Chipre huan pa in caltilan Antioquía. Quinlaquetzilijtinemiloaya ilajtol Dios ca in judíos san hual chantiloaya nejnepa. ²⁰Ma yoje, cataloaya sequin ca in laneltocanjmes hual chantinijme pa Chipre huan pa in lali itoca Cirene hual hualajque pa Antioquía, noje quinmachiltijtinemiloaya lacames griegos ilamachiltisli cuali in Tata Jesús. ²¹Huan quinhueliltilic míac in Tata quiman quinmililoaya in lamachiltisli cuali. Quineltocajque niman míac lacames huan canajque iojli in Tata Jesús.

²²Huan momachiltijque in laneltocanjmes pa Jerusalén quinami inon panuaya nepa Antioquía. Pampín quitilani quique Bernabé ca umpic pa Antioquía. ²³Huan quiman yihual ajsic, quitac quinami Dios quinchiuilic cuali in laneltocanjmes. Pampín quiapiaya paquilisli huan quinchiachualtic pa inminyolo moxtin pa quitocasqui ca míac chicahualisli iojli in Tata Jesús. ²⁴Cataya pampa Bernabé yec lalac cuali. Yuliaya

quimacahuiltitica pa in Espíritu Santo quimacas ilachicahualtilisli, huan noje quineltoçaya in Tata Jesús ca mochi iyolo. Yojque miajqe in lacames hual quineltoçaloaya in Tata.

²⁵ Cuaquín uyac Bernabé pa Tarso pa quitemusquiaya Saulo. ²⁶ Quiman quitac Saulo, yihual quihuicac pa Antioquía, huan nepa mocahualoaya ca in laneltocanjmes pa se xihuil. Ca yehuanten monechiculoaya, quinmaxtitataloaya míac lacames Bernabé huan Saulo. Huan nepa pa Antioquía cataya capa pehuaje quintocayaltije cristianos yehuanten hual quineltoçaloaya toTata Jesucristo.

²⁷ Innojen tonalijmes temuje pa Antioquía sequin ilajtunijmes Dios hual cataloaya pa Jerusalén. ²⁸ Huan moquetzac se ca yehuanten itocaya Agabo, moquetzac pa lajtusquiaya. Quijtuc pan ipampa in Espíritu Santo pampa yahuiaya caya se mayandi hué pa mochi in lalticpan. In mayandi panuc quiman Claudio yec in hué romano pa mochi lalimes. ²⁹ Yojque, quichihuajque se lajtulisli yehuanten hual quineltoçaloaya Jesús nepa pa Antioquía. Molalijque pa quinechiculosquiaya tomin, moxtin tequipanujticate pa inon. In tomin quintilanosquiaya inmicnían hual chantiloaya pa in lalticpan Judea. Mochi sejse quimacac tomin quinami huil quichihuaya pa quinpalehuis yehuanten hual amo quipialoaya nindeno. ³⁰ Cuaquinon yahuioloaya quintilanihilo in tomin yehuanten hual quinmiztinemiloaya in laneltocanjmes pin Judea. Quintilanijqe Bernabé huan Saulo pa quinhuiquilisqui in tomin pa yehuanten.

Quimictilo Jacobo huan quitzacualo Pedro pin calijtic

12 Pa innojen tonalijmes latilanic Herodes in

hué pa quinqutzquilosquiaya sequin laneltocanjmes pa quinchihuilosquiaya lacocoltilisli. ² Latilanic pa quimictilosquiaya Jacobo hual yec icni Juan, quicotonilije iquixlan. ³ Quitac Herodes quinami in quinpaquiltic in judíos, huan pampín latilanic noje pa quiqutzquilosquiaya Pedro. Cataloaya pin tonalijmes hual quicualoaya in pan hual amo quipía laxocoyajquil, itoca in fiesta (ilhuil) pascua. ⁴ Yojque quiqutzquijque Pedro huan quitzacuajque pin calijtic. Quitemacajque ca dieciseis (caxtuli huan se) guaches pa quinapachilosquiaya pa como quisasquiaya Pedro. Cataloaya nahui nahuenten, huan mochi sejse quinpiaya nahui guaches. Sejse nahuenten quipialoaya quiman yahuioloaya quinapachilo Pedro. Huan quiman lamisquiaya in fiesta (ilhuil), Herodes yahuiaya quiquixti Pedro pin calijtic, yahuiaya quijtu pampa quiapiaya pa miquis. Cuaquinon yahuiaya latilani pa quimictilosquiaya inminyampa moxtin. ⁵ Yojque, Pedro cataya latzacuali pin calijtic ca in guaches quinapachijtataloaya. Ma yoje, amo mocahuajque pa quilajlanilosquiaya Dios pa Pedro moxtin laneltocanjmes, quilajlanijque ca mochi inminyolo.

Dios quimacahua Pedro pa quisas pin calijtic

⁶ Yojque cataya in layúa, huan mostatica Herodes yahuiaya quiquixti Pedro. Coxtataya Pedro ca ome guaches, se pa ima cuali huan se pa ima amo cuali, huan yihual ilpitataya ca ome teposli. Noje cataloaya guaches pa quiahuac pin ilalapujquil in calijtic lanapachijtataloaya. ⁷ Cuaquinon nestiquisac se ilanahuatini in cielo hual in Tata quitilanic. Lajtiquisac pin calijtic, huan in lanahuatini quitecuac Pedro pa iumil lanasticali, quejxiltic, quilic:

—Ximoqueztiquisa.

Copinijque in teposli pa imajmajuan.

⁸Huan in lanahuatini quilic:

—Ximolaquenti huan xiquinlali molacsames.

Yojque quichíac Pedro, huan in lanahuatini quilic:

—Xiclali monahuas huan xichtoca.

⁹Yojque quisac Pedro, quitocac in lanahuatini huan amo quimatiaya in hual quipanujtataya pan ipampa in lanahuatini cataya ca melahuac, jan quiytuaya pampa moxotocaya.

¹⁰Ajsijque capa cataloaya se nahuenten guaches lanapachijtataloaya, quinpanahuije yehuanten, ajsijque capa cataloaya in oc sequin guaches, quinpanahuijque. Cuaquín ajsijque pa in lalapujquil lachihuali ca teposli hual cataya inahuac itenco in ojli, in ojli temacaya pin caltilan. Molapuc in lalapujquil ihufan, quisaje yehuanten, canaje in ojli huan jan ajnaxcan yajmo nesic ilanahuatini in cielo ca Pedro.

¹¹Axan quimatic Pedro pampa amo moxotocaya, quijtuc laijtic yihual:

—Axan nicmati neli in Tata quitilanic se ilanahuatini in cielo. Quitilanic pa nechquixtis pin polehuilislí, in hual yahuiaya nejchihuili in hué Herodes. Inon yihual huan moxtin in judíos quichixtataloaya pa nechpanusquiaya.

¹²Quijtutiahuiaya pa iyolo ca inon, ajsic pa ichan María inantzín Juan. In Juan noje motocaya Marcos. Nepa cataloaya míac laneltocanjmes, monechiculoaya quilajlantataloaya Dios pa Pedro. ¹³Quitēcucac Pedro in ilalapujquil in lajcotiyan hual cataya ilaixpan in cali. Hualac se tequipanujquil muachita itoca Rode pa quitasquiaya aquí cataya. ¹⁴Quimatic pampa cataya Pedro ilajtol, pampín mopaquiltic míac huan amo quilapulic in lalapujquil, jan molalujtíac pa quinmachiltisquiaya in oc sequin pampa Pedro cataya pa quiahuac in lalapujquil. ¹⁵Yehuanten quilijje:

—Tehual ticchía quinami yes.

Ma yoje, yihual amo mocahuac pa quijtus cataya neli, cuaquinon yehuanten quijtujque:

—Unca ilanahuatini hual quisac pin cielo hual quilachilia.

¹⁶Huan Pedro amo mocahuac quitēcucac in lalapujquil, pampín quilapulijje. Quiman quitajque, molapolultijque. ¹⁷Huan yihual quitzejtzeluc ca imajma pa camo nahuatilosquiaya, cuaquinon quinquilic quinami in Tata quiixtic pin calijtic, noje quinmilic: —Xiquinmachiltican Jacobo huan tocnífan laneltocanjmes innojen hual nechpanuc.

Cuaquín quisac, mopalac pa camo moitasquiaya chantitataya umpa Jerusalén.

¹⁸Cuaquín quiman lanesic, in guaches amo quimatiloaya len quijtulosquiaya inahuac in hual quipanuc Pedro. ¹⁹Yoje latilanic Herodes pa quitemulosquiaya Pedro, huan amo quitaje. Cuaquín quinlajlanic Herodes in guaches len quipanuc. Yehuanten amo huil quinanquilijje nindenó. Pampín latilanic pa quinmictilosquiaya in guaches, huan yihual quisac pin lalticpan Judea, temuc pa Cesarea, nepa mocahuac chantitataya.

Miqui Herodes

²⁰Huan cualantataya Herodes míac ca yehuanten pin caltilan Tiro huan in caltilan Sidón, yajmo lamacahuiltic pa yehuanten pa ilali quinnamaquiltisquiaya len quicuasqui yehuanten pa Tiro huan Sidón. Ma yoje, yehuanten in tirotecos huan sidontecos quipialoaya pa molacualtilosquiaya ca in hual quinnamaquiltisquiaya yehuanten pin lali capa in hué Herodes huelitiaya. Pampa inon quichihuajque lajtulisli ca Blasto, yihual yec se

itequipanujquil hué Herodes. Quilijque Blasto in tirotecos huan in sidontecos pa yihual quitemachisquiaya Herodes pa mochiasquiaya jan sejpa ca yehuanten. ²¹Yojque, quilalic Herodes se tonali huan pa in tonali molaquentic ca itzotzomajli cualtichin hual quipialo in hueyenten. Molalic pa pani capa moxtin huil quitaloaya pan iicpali hué, cuaquinon quinnojnótzaya yehuanten. ²²Huan yehuanten tzajtziloyaya, quililoaya:

—¡Unca se dios hual lajtúa, amo unca se lacal!

Yojque quijtuloaya pampa quinequiloaya pa mocahuasquiaya Herodes niman cuali ca yehuanten.

²³Huan jan ajnaxcan, hualac se ilanahuatini in Tata pin cielo, quicocoltic Herodes ca se cocolisli pampa quimacahuilic pa in lacames quijtutinemilosquiaya yojque, quijtuloaya pampa Herodes yec se dios. Huan yojque Herodes amo momajtiaya ilaixpan Dios. Pampín, quicujaque ocuilimes icuerpo (inacayo) Herodes, huan pampa inon miquic.

²⁴Ma yoje, cataloaya míac hual quicaquiloaya ilajtol Dios huan miajqque yehuanten hual quineltoaloaya.

²⁵Quisajque Bernabé huan Saulo pa Jerusalén, mocuepajque pa Antioquía, axan laquisajque ca itequipanulisli nepa Jerusalén. Quihualicajque ca yehuanten Juan hual noje motocaya Marcos.

Quinlajtultilo Bernabé huan Saulo pa quichihuasqui oc se tequipanulisli

13 Pa Antioquía ca in laneltocanjimes cataloaya lajtunijmes huan lamaxtinijmes. Cataloaya Bernabé huan Simeón, yihual noje motocaya Niger, huan cataloaya Lucio hual chantini pin lali itoca Cirene, huan Manaen hual moscaltic ca Herodes in hué pa ichan, huan Saulo.

²Se tonali quilajlantataloaya Dios huan mosajtataloaya, quinmilic in Espíritu Santo:

—Xijxiluilican Bernabé huan Saulo pa quichihuasqui in tequipanulisli hual niqinmacac.

³Cuaquinon, mosahuajque huan quilajlanijque Dios, quinlalilijque inminmajmajuan inminpan Bernabé huan Saulo. In lanextilic pampa Dios axan quinlajtultic pa in tequipanulisli. Cuaquinon in laneltocanjimes quintilanijque Bernabé huan Saulo.

Quijtulo ilajtol Jesucristo Bernabé huan Saulo pin lali lajco pin al huejcalan itoca Chipre

⁴Yojque quintilanic in Espíritu Santo. Quistataloaya pa Antioquía, temujqque pa in caltilan itoca Seleucia. Nepa calaquijque se barco hué, uyajque pa in lali itoca Chipre lajco pin al huejcalan. ⁵Ajsijque pa se caltilan pa itenco Chipre hual motocaya Salamina. Umpa pa inmintiopajmes in judíos quinahuatiloaya ca mochi inminyolo ilajtol Dios. Noje cataya ca yehuanten Juan Marcos hual quinpalehuiaya.

⁶Cuaquín quipahanuijqque pa mochi in lali huan ajsijque pa in caltilan Pafos. Nepa quitajque se lacal laxuxani, yec se ilajtuni Dios, quil quilic, mas que islacatic, amo yec neli. Yihual yec judío, motocaya Barjesús. ⁷In Barjesús yec inahuac in huelitini (gobernador) itoca Sergio Paulo hual yec lacal hual quimatiaya, huan yihual quinnahuatic pa hualalosquiaya Bernabé huan Saulo pampa quinequiaya quicaqui ilajtol Dios. ⁸Ma yoje, Barjesús in laxuxani molalic pa quintzacuilisquiaya yehuanten pa camo quinahuatilosquiaya ilajtol Dios. In laxuxani noje motocaya Elimas. Elimas quinequi quijtúa laxuxani. Yihual amo quinequiaya pa Sergio Paulo quineltoacasquiaya Jesucristo. ⁹Ma yoje,

Saulo hual noje itoca Pablo quipiaya in Espírиту Santo quihuelilitataya pa iyolo, mocahuac quiztataya Elimas ¹⁰ huan quilic:

—Tehual ticmati tilacua jucumantía huan ticmati ticchía mochi hual unca elehuis. Tehual tiquinami in lili, timolalía ipan mochi hual melahuac. ¿Amo quiman timocahuas pa ticchías pando iojli melahuac Dios? ¹¹ Huan axcan, xiquita. Yahui mitzcocoltía in Tata. Ticayas pachacal huan amo huil tiqutas nindeno pa míc tonalijmes. Cuaquín Dios mitzmacahuiltis pa tilachías oc sejpa.

Jan ajnaxcan, yajmo lachiaya, mopachacaruc. Quitaya laticumac san huan quitemujtinemiaya se hual quilaicanasquiaya ca imajma. ¹² Cuaquín pampa quitac in gobernador Sergio Paulo in hual quipanuc Elimas, yojque yihual quineltoac ilajtol Dios, molapolultic pampa quitac quinami ilamaxtilisli in Tata Jesús quipiaya míc chicahualisli.

Pablo huan Bernabé yahuillo pa Antioquía pin lalticpan Pisidia

¹³ Huan quisajque ca barco nepa Pafos Pablo huan yehuanten hual cataloaya ca yihual, ajsijque pin caltilan itoca Perge pin lalticpan Panfilia. Huan nepa Juan moxiluc pa yajmo cayas ca yehuanten, mocuepac pa Jerusalén. ¹⁴ Pablo huan Bernabé quistiajque nepa Perge, ajsijque pin caltilan Antioquía pin lalticpan Pisidia. Uyajque pa inmintiopan in judíos pan tonali quiman mosehuilo in judíos, nepa molalijque. Quicaquijque se quinmomaxtilic yehuanten ilajtol Dios. Cataya pa iamal Dios ilajtomes hual quijcuilujque Dios ilajtunijmes.

¹⁵ Cuaquinon, quiman laquisac quinmomaxtilic, ilaicananijmes in tiopan quinnotzajque Pablo huan Bernabé, quinmilijque:

—Lacames tocnían, sinda anquipía len lajtol calica anquinchicahualtis pa inminyolo in lacames, xiquilican.

¹⁶ Cuaquín moquetzac Pablo, quixilanic imajma pa yehuanten pa camo nahuatilosquiaya, quinmilic:

—Lacames israelitos huan amhuanten amo israelitos hual ma yoje anmomajtía ilaixpan Dios, xilacaquican.

¹⁷ InminDios in israelitos hual ticcate tehuanten in judíos, yihual Dios molajtultilic totajtzitzián. Quinchihuilic hué yehuanten quiman catanijme pin lali itoca Egipto. Cuaquinon quinextic Dios ilahuelilitisli huan quinlaicanac pa quiahuac Egipto. ¹⁸ Pa cuarenta xixihuimes quinmolachiliaya yehuanten huan amo quinlamiaya mas que quichihuanijme míc amo cuali pin lali capa amaqui chantiaya.

¹⁹ Huan quiman quinsulahuilic chicome (siete) hueyenten ca inminlacames pin lali Canaan, quinxiluilic totajtzitzián inminlali yehuanten. ²⁰ Cuaquín Dios quinmacac laicananijmes pa huelitilosquiaya capa yehuanten quinami pa cuatro ciento cincuenta xixihuimes. Lamije quinlaicanaje yehuanten quiman ajsije in tonalijmes hual yuliaya Samuel, yihual yec Dios ilajtuni. ²¹ Huan pa in tonalijmes totajtzitzián quinequiloaya quipialo se hué. Pampín, Dios quinmacac Saúl ixolol Cis. Yihual yec se lalac israelito ca imiahuimes Benjamín, huan huelitiaya in Saúl capa totajtzitzián pa cuarenta (ompuhuali) xixihuimes.

²² Huan quiman Dios quijcuanic Saúl pa yajmo yes hué, cuaquín Dios quilajtultic David pa yes inminhué yehuanten, quijtuc cuali inahuac yihual, quilic:

“David ixolol Isaí niquita quinami lalac hual quipaquiltía noyolo, yihual quichías len yes hual nicnequi.”

²³ Pablo lajtutíac, quinmilic:

—Huan quinami Dios quijtuc neli pa yina, yihual quihualicac pa tehuanten

ilacames Israel se hual techquixtilía pin ipolehuilisli tolaijlaculisli. Huan in se unca Jesús imiahuil in hué David. ²⁴In Jesús ayamo pehuac quichíac itequipanulisli pampa monequiaya pa Juan Lacuayatequini laquisasquiaya quinnahuatijtinemi Dios ilajtol inminlaixpan moxtin in judfos. Quinmiliaya pa quinpalalosquiaya inminyolo pa laijnamiquisi quinami Dios quinequi, cuaquinon quincuayatequisquiaya. ²⁵Cuaquín pa innojen tonalijmes hual Juan lamiaya quichía itequipanulisli, quiituaya: “Nehual amo niunca aqui anquijitutica amhuanten. Xiquitacan. Hualas se nechtocatica nehual, huan nel amo nimonotza pa nictomilis ilailpili ilacsames pampa yihual unca niman hué, nehual amo quiman nicayas yoje hué.”

²⁶Pablo lajtutíac, quinmilic:

—Lacames nocnían, amhuanten imiahuimes Abraham huan amhuanten hual anmomajtía ilaixpan Dios, ma annimitzili inon. Dios quinequic pa tijcaquilosquiaya in lajtol hual techquixtía pin ipolehuilisli icualanilisli Dios. ²⁷Yehuanten hual chantilo pa Jerusalén, huan yehuanten hual quipialo lahueliltitilisli amo quimatiloaya aqui yec Jesús. Amo quimatiloaya len quinequi quijtúa in hual quijcuiluje ilajtunijmes Dios. Amo quimatiloaya mas que momaxtilo inon pan mochi in tonalijmes quiman timosehuilo. Pampín quitilanije in Jesús pa quimictilosquiaya, yoje lamije quichihuaje in hual yec lajcuiluli.

²⁸Huan mas que amo quitaje len calica huil quitilanisi pa yesi lamictili, ma yoje quitemachije Pilato pa latilanis pa in guaches quimictilosquiaya Jesús pan se cuahuil. ²⁹Yojque lamije quichihuaje len quijtulo in amames inon hual quiapiaya pa quipanusquiaya Jesús. In amames quinmijcuiluje pa

yina Dios ilajtunijmes. Quiquixtije pin cuahuil, quitemuhuije, quilalpachuje pa se cueva pa laijtc se tel, se coyunquil capa quilalilo mijquimes. ³⁰Ma yoje, Dios quiyuliltic, quiquixtic capa in mijquimes. ³¹Huan cuaquinon Jesús monextic míac tonalijmes ca yehuanten hual pehuaniyme ca yihual pin lalticpan Galilea, panquisanijme ca yihual pa Jerusalén. Axan yehuanten quinnahuatilijtinemilo moxtin lacames ilajtol yihual. ³²Huan tehuanten antimitzilijtcate san in lamachiltitilisli cuali. Inon unca hual neli Dios quinmilic totatzitán pampa yahuiaya quinchihuili. Huan inon Dios axan lamic quinchihuilic yehuanten inminmiahuimes totatzitán pan tonali hual quiyuliltic Jesús oc sejpa. ³³Huan tehuanten inminmiahuimes totatzitán. Unca quinami quijtúa pa salmo ome: “Tehual tinoxolol”, quil, “axan nimochíac motajtzin.” ³⁴Quema, Dios quiyuliltic quiquixtitataya pa camo palanisquiaya icuerpo. Techilía pa ilajtol lajcuiluli pampa yahuiaya quichía inon, quilic: “Neli nimijchihuilis len hué pa tehual, yes inon hual niqulic David pampa niahuiaya nimijchihuili.” ³⁵Inon quijtuc Dios, pampa ca oc se ilajtol noje quijtuc jan quinami cataya Jesús hual lajtutataya, quilic: “Amo ticmacahuiltis pa palanis nocuerpo nehual molajtultili hual tichlajultic.” ³⁶Axcán in ticmatilo. David huelitini capa totajtzitán in judíos quinami quinequiaya Dios. Cuaquinon polehuic David, quilalpachuje huan ticmatilo pampa palanic icuerpo David. ³⁷Ma yoje, amo palanic icuerpo yihual hual Dios quiyuliltic oc sejpa. ³⁸Xicmatican axcan, lacames nocnían, pan ipampa in Jesús Dios quinquipuhuas anmolaijlaculisli, inon antimitzililo neli. ³⁹Pan ipampa Jesucristo, Dios quinquixtilía inminlaijlaculisli

moxtin hual quineltoalo. In lajtlot hual Dios quilic Moisés amo quiman huil quinquixtilic in lacames inminlaijlaculisli. ⁴⁰Xiquijquiztician pa camo anmitzpanus len quijcuiluje ilajtunijmes Dios, quijtuje:

⁴¹Xiquitacan amhuanten laxixicunijmes, huan ximolapolultican huan xipolehuican, pampa nehual nía nicchá len pan innojen tonalijmes quiman anyultías. Yes len hual amo anquineltoacasquiaya mas que se anmitzilisquiaya.

Yojque quijtúa ilajtlot Dios.

⁴²Yojque Pablo laquisac quinlaquetzilic huan quistiajque pin tiopan yihual huan Bernabé. Cuaquín yehuanten hual lacatijque judíos quitemachijque pa quinnahuatillosquiaya oc sejpa innojen lajtomes, huan pa quinnahuatillosquiaya pa in oc se tonali quiman mosehuiloaya. ⁴³Lamic in lanechiculisli pin tiopan huan míac judíos quintocajque Pablo huan Bernabé. Noje quintocajque míac hual amo yeje judíos mas que quimolancuacuetzililoaya Dios quinami in judíos. Huan quinlaquetzilijque Pablo huan Bernabé, quinchicahualtijque pa camo mocahualosquiaya pa quineltoctalosquiaya Dios huan pa quijnamictiasqui quinami quinmicnilía yehuanten.

⁴⁴Ajsic in oc se tonali quiman mosehuiloaya, huan ca nadita moxtin yehuanten pin caltilan monechicujque, pampa quinequiloaya quicaquilo ilajtlot Dios. ⁴⁵Ma yoje, quiman in judíos quinmitajque in míac lalera hual hualajque, niman moxicujque, quijtutinemiloaya pampa amo melahuac in hual quinmiliaya

Pablo, quihuejuecaltitinemiloaya ilajtlot Jesucristo. ⁴⁶Ma yoje amo momajtiloaya Pablo huan Bernabé, amo mocahualoaya. San quinlaquetzililoaya, quinmiloaya:

—Ticpaje pa tipehualosquiaya antimitzlaquetzililo amhuanten ilajtlot Dios. Ma yoje amo anquinequi anquinelto. Amhuanten quinami lacames hual anmomaca ojli quinami in la'ajuanijmes quinchihuililo yehuanten hual oc sequin quinmotexpahuililo. Yoje amhuanten anmochijtica lacames hual amo monotzalo pa quipiasi in yulilisli hual amo quiman lamis. Pampín xiquitacan. Antimitzcajchualo huan tiquinlaquetzilisi yehuanten hual amo judíos. ⁴⁷In ticchihualo pampa yojque techilic in Tata. Yihual pa yina quilic:

Annimitzljaltulic pa anquinnahuatilis nolajtlot capa moxtin yehuanten pin lalticpan, yojque quimatisqui pampa nehual niquinquixtilis inminlaijlaculisli, pampa nolajtlot quinlahuilis yehuanten no'ojli.

⁴⁸Yoje, quiman quicaquijque inon yehuanten hual amo judíos, quipiajque míac paquilisli, quijtuloaya lajtomes cuajcuali huan huejué ilaixpan in Tata. Quineltoajque moxtin aquinojen Dios quinlajtultic pa quipialosquiaya in yulilisli hual amo quiman lamis. ⁴⁹Yojque mosemanac ilajtlot in Tata pa mochi in lali. ⁵⁰Ma yoje in judíos latenehualoaya inminahuac Pablo huan Bernabé ca in sihuames hual yuliloaya quichijtcate len quijtulo in lajtomes quinami quipialoaya pa quimolancuacuetzilisqui Dios. Moxtin quimatiloaya momajtilo pampa quineltoaloaya inminlahueliltlisli in lajtomes. Huan in judíos yojque quincualantijque ca Pablo huan Bernabé. Noje quincualantijque in hueyenten pin caltilan ca Pablo

huan Bernabé. Quimpehualtisque pa quitojtocasqui huan yojque quinquixtijque pa inminlali. ⁵¹Ma yoje, quintzejtelujque Pablo huan Bernabé inminlacsames pa quiquixtililosquiaya ilalmoluncal inminlali. Yojque quinxtilijtataloaya yehuanten pa Antioquía quinami cataya niman amo cuali inon hual quichihuaque, pampa amo quixtocaloaya ilajtol Dios. Cuaquinon uyajque pa in caltilan Iconio. ⁵²Ma yoje yehuanten hual quineltoajque nepa pa Antioquía quipialoaya paquilisli huan in Espiritu Santo huelitiaya pa inminyolo.

Pablo huan Bernabé pa Iconio

14 Moitaloaya pin caltilan Iconio Pablo huan Bernabé, huan calaquijque in omenten pa inmintiopian in judíos. Nepa niman cuali quinnahuatilizque ilajtol Dios, huan yoje quineltoajque niman míac lacames, judíos huan yehuanten hual amo judíos. ²Ma yoje in judíos hual amo quinequiloaya quineltoalo Cristo ilamachilitisli cuali quincualantijque yehuanten hual amo judíos, quincualantijque ca yehuanten hual, quema, quinequiloaya quineltoalo. ³Ma yoje, Pablo huan Bernabé panuloaya míac tonalijmes nepa, quinnahuatiloaya in Tata ilajtol, amo momajtitataloaya. Huan in Tata Jesús quinnextilic in lacames pa Iconio pampa cataya melahuac in lajtol hual Pablo huan Bernabé quijtuloaya. Quinnextilic inon pan ipampa quinami Pablo huan Bernabé quinpajtic cocoximes, Dios quinhueliltic pa quinpajtije. ⁴Ma yoje, amo cataloaya ca se lajtulisli in lacames. Sequin quixtoajque len quijtuloaya in judíos, oc sequin quixtoajque len quijtuloaya in lanahuatinijmes Pablo huan Bernabé. ⁵Yojque, quichihuaque in judíos se lajtulisli ca yehuanten hual amo judíos

huan ca yehuanten hual quipialoaya lahuelilitisli. Quichihuaque lajtulisli pa quinhuejuecaltilosquiaya in lanahuatinijmes huan pa quinlaxililosquiaya tixcalazos. ⁶Quimatijque inon Pablo huan Bernabé, pampín cholujque pa ome caltilan huejué hual motocaje Derbe huan Listra. Noje cataloaya sequin caltilan pa inmintejtenco. Innojen caltilan cayajque pin lali itoca Licaonia. ⁷Nepa quinahuatiloaya ilamachilitisli cuali Jesucristo.

Quilaxililo tixcalazos Pablo

⁸Huan cataya se lalcal pa Listra amo huil quinnejnemiltiaya icxihuaimes. Lacatic yojque huan amo quiman nejnemic. ⁹Nepa molalijtataya, quicaquiaya laqueztataya Pablo. Pablo mocaahuaya quiztataya huan quitac pampa in lalcal quimatic pa iyolo pampa Dios huil quipajtisquiaya. ¹⁰Yojque ca lajtol chicahuac, Pablo quilic:
—Ximoquetza melahuac ca mocxihuaimes.

Huan moqeztiquisac huan tzicuinic, pehuac nejnemic. ¹¹Yojque, quiman quitaje in lacames in hual quipanuc in lalcal, pehuaje tzajtzije ca ilajtol Licaonia, quijtutataloaya:

—iInnojen lacames neli cate todioses hual mochihuaque quinami lacames huan quisaje pin cielo huan temuje ca tehuanten!

¹²Yojque Bernabé quilalilije itoca inmindios Júpiter, huan Pablo quilalilije itoca inmindios Mercurio, pampa Pablo cataya in se hual cantataya in lajtol. Quijtulo in licaontecos pampa inmindios Mercurio quichía yojque. ¹³Huan quipiani yehuanten in licaontecos itiopian nepa capa calaquinijme pin caltilan, nepa quimolancuacuetzilinjime in dios Júpiter. Huan in tiopista

quinhualicac toros huan in lacames quisujsujque xuchimes hual in tiopista quinhualicac pa ilalapujquimes ilajcotiyan inmintiopan. Yihual huan in m'iac lalalera quinequiloaya quinmictilo in toros pa yoje quinmolancuacuetzililosquiaya Pablo huan Bernabé. ¹⁴Quiman quicaquijque in lanahuatinijmes Pablo huan Bernabé len yahuiloaya quichihualo, jan axcan quintzayanijque inmincotones pampa quincocuc inminyolo ca cualanilisli pampa yahuiloaya quichihualo inon. Molasaje lajco capa in m'iac lalalera, quintzajtzilije quinmilijtataloaya:

¹⁵—¡Lacames! ¿Leca anquichijtica inon? Tehuante tilacames jan quinami amhuante. Antimitznahuatililo in lamachiltisli cuali pa antimitznextilisi quinami monequi pa anmochahuas pa anquinmolancuacuetzilis in monos huan pa anquimolancuacuetzilis in Dios hual yultica. Yihual quich'iac in cielo huan in lalticpan huan in al huejcalan huan mochi hual cate ca innojen.

¹⁶Pa yina Dios quinmacahuilini lacames pa quinmanasi inminojlimes yehuante. ¹⁷Ma yoje, amo mochahuaya pa quichiasquiaya len calica quinnextiliaya pampa yihual unca Dios. Quimacaya in quiahuil, quinmacaya in tonalijmes quiman lapixcalo quiman yucsi in laquilyo huan in trigo. Techlacualt'ia pa tipachihuisi huan techmoixtocalit'ia toyolo ca paquilisli.

¹⁸Pablo huan Bernabé yojque quinmilijque huan quinmilijque pa camo quinmictilosquiaya in toros calica yahuiloaya quinchihuili molancuacuetzalisli. Cuaquinon in licaontecos mochahuaje pa quichihualosquiaya, mas que ca nadita Pablo huan Bernabé amo huil quintzacuילוaya pa camo quichihualosquiaya yojque.

¹⁹Cuaquín hualajque in jud'íos hual chantiloaya pa Antioqu'ía huan Iconio,

quinyantijque yehuante pa Listra pa cualanilosquiaya ca Pablo. Pampín quilaxilijque ca tixcalazos yehuante pa Listra, cuaquinon quihuilanajque pa quiahuac in caltilan pampa quijtujque pampa miquic. ²⁰Ma yoje, quiman monechicujque in laneltocanijmes quiyahuilujtataloaya itenco Pablo capa lastataya nepa, yihual moquetzac huan calaquic pin caltilan. Mostatica yihual huan Bernabé uyajque pa in caltilan Derbe.

²¹Cuaquinon quinnahuatiltinemoaya yehuante pa Derbe ca in lamachiltisli cuali, huan m'iac lacames mochihuaje laneltocanijmes. Cuaquín mocuepajque Pablo huan Bernabé pa Listra huan Iconio huan pa Antioqu'ía. ²²Quinchicahualtijque inminyolo innojen laneltocanijmes pa camo mochualosquiaya pa quineltocasqui Jesucristo. Quinmilijque:

—Timoxtin ticpialo pa tipanusi m'iac lacocoltisli, jan yoje tiajsisi capa Dios huelit'ia.

²³Huan quinlajtultijque sequin lacames pa yelosquiaya yehuante hual quinmitalosquiaya in laneltocanijmes. Cuaquinon quilajlanijque Dios huan mosahuaje, quintemacaje pa ilahueliltisli in Tata Jesucristo yehuante hual quineltocaloaya.

Mocuepalo Pablo huan Bernabé pa Antioqu'ía pin lalticpan Siria

²⁴Cuaquín quipanahijque Pablo huan Bernabé in lalticpan Pisidia, huan uyajque pa in lalticpan Panfilia.

²⁵Umpa quinnahuatiltijque Dios ilajtlo pa Perge, huan ca se nadita temujque pa Atalia. ²⁶Cuaquín uyajque ca barco hué huan ajsic pa Fenicia. Nepa canajque ojli pa ajsisqui pa Antioqu'ía pin lalticpan Siria, capa pehuajque canajque ojli pa in lalimes ca capic uyajque. Nepa

cataya capa in laneltocanijmes pehualoaya quintilaniilo Pablo huan Bernabé huan quilajlaniloaya Dios pa quinpalehuis pa huil quichijτίαςqui in tequipanulisli hual Dios quintilanic pa quichihualosquiaya. Huan axcan lamijque quichihuaque in tequipanulisli, axcan mocuepajque. ²⁷Ajsijque pa Antioquía, quinahuatijque pa monechiculosquiaya yehuanten hual quineltocaloaya Jesucristo. Cuaquín quinlamachiltijque mochi hual quichíac Dios pan inminpampa yehuanten, quinami yihual quinhueliltic yehuanten hual amo judíos pa quineltocasqui in Tata Jesucristo. ²⁸Huan panujque Pablo huan Bernabé míac tonalijmes ca yehuanten hual quineltocaloaya in Tata Jesús neta pa Antioquía.

Monechiculo in lanahuatinijmes huan abuelojmes pa Jerusalén

15 Cuaquinon, cataloaya sequin hual quisajque pin lalticpan Judea huan temujque pa Antioquía. Pehualoaya quinmaxtilo tocnían laneltocanijmes hual amo judíos, yojque quinmililoaya:

—Sinda amo anunca latzontequili pa anmocuilaixli quinami quimaxtic Moisés pa yina, cuaquinon amo huil anyes laquixtili pin ipolehuilisli Dios icualanilisli.

²Pampín Pablo huan Bernabé pehualoaya quinlaxililo lajtomes ca in judíos, quinmililoaya pampa amo neli cataya inon hual quimaxtitataloaya, quinmililoaya pampa amaqui ca in lacames hual amo judíos quipía pa lamis quichías inon hual quijtúa in lajto hual Moisés quijcuiluc. Ma yoje, in judíos hual quisajque pin Judea quinlaxilijtinemiloaya lajtomes chichahuac ca Pablo huan Bernabé. Pampín in laneltocanijmes quinlajultijque Pablo huan Bernabé huan oc sequin ca yehuanten,

quinlajultijque pa panquisalososquiaya pa Jerusalén. Nepa yahuiloloaya quinmitalo in lanahuatinijmes huan in abuelojmes. Yahuiloloaya quinnahuatililo in hual quinmaxtiloaya in lacames pa Jerusalén hual temujque pa Antioquía. Quinequiloaya quimatilo neli sinda in hueyenten pa Jerusalén cataloaya ca se lajtulisli ca inon hual quinmaxtiloaya.

³Yojque, in laneltocanijmes quintilaniijque. Yehuanten quipanahuijque pa in lali Fenicia huan in lalticpan Samaria, huan cajcapa quinlaquetzilijtinemiloaya moxtin in laneltocanijmes quinami yehuanten hual amo judíos quicajchualoaya quinami molancuacuetzanijme inminlaixpan inmindioses huan pehualoaya quineltocalo Dios. Quiman quicaquijque inon, quipialoaya míac paquilisli moxtin in laneltocanijmes pampa yehuanten hual amo judíos noje quineltocaloaya.

⁴Cuaquín ajsijque pa Jerusalén. Quimpialtijque ca paquilisli in laneltocanijmes huan in lanahuatinijmes huan in abuelojmes. Huan Pablo huan Bernabé quinmachiltijque mochi hual Dios quichíac pan inminpampa yehuanten.

⁵Ma yoje, moquetzajque sequin hual quineltocaloaya inminlamaxtilisli in fariseos huan noje quineltocaloaya in Tata Jesús, quinmilijque:

—Monequi pa tiquinmilisli pa quichihuasi inon hual quijtúa in lajto hual Moisés techmacac, quipialo pa quintzontequilisi mochi sejse icuilaxli.

⁶Monechicujque in lanahuatinijmes huan in abuelojmes pa molaquetzilisqui pa ajsilosquiaya mocalualo ca se lajtulisli. ⁷Quiman molaquetzilijque míac, cuaquinon moquetzac Pedro, quinmilic:

—Lacames nocnían, amhuanten anquimati amo quipía míac quiman Dios nechlajultic nehual pa

niquinmilis in lamachiltlisli cuali yehuanten hual amo judíos. Pan ipampa inon hual niquinmilic, yojque quicaquije huan quineltocaje. ⁸Dios quinmiximati inminyolo lacames huan yihual quinextilic pampa quinmanac yehuanten hual amo judíos. Nicmati inon pampa Dios quinmacac in Espíritu Santo jan quinami techmacac tehuanten. ⁹Dios quinnequi yehuanten quinami yihual technequi tehuanten noje pampa quinchipahuilic inminyolo quiman quineltocaje ilajtol. ¹⁰Axcan, ¿leca anquijtutica pampa Dios quinequi pa quichihuasi lanextilisi pan inmincuerpos tocnán hual amo judíos? Dios technextilic pampa yajmo monequi pa quiyasi inon. ¿Anquinequi anquicualantía Dios, cuajnesi? Anquinctica anquilalilía len etic pa tocnán hual amo huil mopepenialtisi pa lamisi quichihuasi. Tehuanten noje amo huil timopepenialtiloaya pa tilamilosquiaya ticchihualo mochi len quijtrúa ilajtol Moisés, huan totajtzitzán amo huil mopepenialtinijme pa quichihualosquiaya. ¹¹Amo xicchihuacan inon. Ticmatilo pampa ticate laquixtili pa ipolehuilisi Dios icualanilisi pan ipampa iicnililisi in Tata Jesús. Huan ticmatilo pampa unca yojque ca yehuanten noje hual amo judíos.

¹²Yojque, yajmo nahuatijque in laneltocanijmes. Cuaquinon quicaquijque len quinmilijque Bernabé huan Pablo, quinmachiltlijque mochi hual Dios quichíac pan inminpampa yehuanten quiman cataloaya ca yehuanten hual amo judíos. Quinmachiltijque quinami quinpajtiloaya ca Dios ilahueliltilisi. ¹³Huan quiman laquisajque lajtujque Bernabé huan Pablo, cuaquinon lajtuc Jacobo, quinmilic:

—Lacames nocnán, xichcaquican.

¹⁴Axcan anmitzmachiltic Simón Pedro

quinami Dios pehuac quinnextilic ilahueliltilisi capa yehuanten hual amo judíos, quil quilic, Dios quichíac in pa quinlajtultisquiaya, quil, lacames capa yehuanten hual quineltocalosquiaya Cristo. ¹⁵Huan inon unca ca se lajtulisli ca len quijtunijme Dios ilajtunijmes. Yojque unca lajcuiluli len Dios quinmilic:

¹⁶Quiman lamisi panusi innojen, nehual Dios nimocuepas ca nolacames in judíos, imiahuimes David, yehuanten yes quinami se tiopan laxitinili pampa cate lacames laijlaculi.

Ma yoje, in tonali hual nimocuepas ca yehuanten, cuaquín in hual niqinchihuilis yes quinami nicchijchihuasquiaya in tiopan laxitinili,

huan yoje niqinchijchihuilis innojen lacames laijlaculi.

Nechmolancuacuetzilisqui quinami nechmolancuacuetziliniijme yehuanten hual yulinijme quiman yulini in hué David.

¹⁷Nicchihuas in pa yojque quitemusqui quiximatisqui in Tata in oc sequin lacames pin lalticpan, jo quema, mochi in oc sequin lacames hual amo judíos hual nehual in Tata niqinlajtultic pa mochi oc sequin lalimes.

¹⁸Yojque quijtúa in Tata hual quichihua innojen, yihual hual aqui techmachiltic mochi inon pa yina.

In unca len Dios quinmilic ilajtunijmes.

¹⁹Pampín —quinmilic Jacobo—, niqijtrúa ma como tiqinmacacan tequil aquinnojen hual amo judíos hual pejticate quineltocalo Dios. ²⁰Annimitzmaca lajtol pa tiqinmijcuilulisi se amal. Jan tiqinmilisi san pa como quicuasi in

huendis hual quilalilo inminlaixpan in monos inmindioses yehuanten hual amo quineltocalo Cristo. Tiquinmilisi pa se amo canas se sidual o se lalac hual amo unca isihua o ilahuical, pa quipías jan se iyaxca san. Noje tiquinmilisi pa camo quicuasi inacal se yulijquil hual quitolpatzcaje pa quimictisi hual iesli amo quisac quiman miquic. Noje tiquinmilisi pa camo quicuasi esli. Yojque amo quincualantisi in judíos. ²¹ Quipialo pa quichihuasi yoje pampa axan pa mochi caltilan cate judíos hual pehualoaya chantilo nepa pa yina, huan quicaquilo momaxtilo ilajtol Moisés pa inmintiopajmes. Noje quinlaquetzililo ilajtol Moisés mochi in tonalijmes hual mosehuilo.

²² Cuaquinon yehuanten in lanahuatinijmes huan in abuelojmes huan moxtin in laneltocanijmes quitajque cuali pa quinlajtultilosquiaya lacames pa quintilanilosquiaya pa Antioquía ca Pablo huan Bernabé. Quilajtultijque Judas hual noje motocaya Barsabás huan noje quilajtultijque Silas. In omenten yejque huejué lacames ca in laneltocanijmes tocnán. ²³ Quitilanijque ca yehuanten se amal hual quihuicajque pa Antioquía. In amal quijttuc:

“Tehuanten in lanahuatinijmes huan in abuelojmes anmocnán antimitzjcuiluililo amhuanten tocnán hual amo judíos pa Antioquía huan pa in lalticpan Siria huan pa in lalticpan Cilicia, antimitzpiatilo. ²⁴ Techlamachiltije pampa sequin ca tehuanten quisaje nican, quil, huan uyaje pa amhuanten, mas que tehuanten amo tiquntilanije. Anmitzmacaje tequil, quil, huan pampín amhuanten amo anquimatiaya len yesquiaya cuali pa anquichías, quil, huan anmitzmacac tequil ca inon hual anmitzmaxtiloaya. Anmitzilije

pampa anquipía pa anmotzontequilis anmocuilaixli huan anquipía pa anquineltocas in lajtol hual Dios quilic Moisés. ²⁵ Pampín tehuanten timoxtin timocahuaje ca se lajtulisli huan techanac cuali pa tiquinlajtultisi lacames pa antimitztilanilisi ca tolasojli Bernabé huan tolasojli Pablo. ²⁶⁻²⁷ Pan míac tonalijmes Pablo huan Bernabé moitalo yultinemilo capa ca nadita miquilosquiaya pampa quitequipanuililo in Tata Jesucristo. Ca yehuanten techanac cuali pa antimitztilanilisi Judas huan Silas hual anmitznahuatilisli mochi pa anquimatis cuali len quinequi quijttúa ilajtol in Tata. ²⁸ Antimitzjcuiluililo inon pampa tiquitaje cuali tehuanten huan in Espíritu Santo pa camo antimitzilisi pa anquichías míac. Jan xicchihuacan san innojen hual monotzalo.

²⁹ Amo xijcuacan len hual quilalilo inminlaixpan in monos inmindioses hual quinmolancuacuetzililo, amo xijcuacan esli, amo xijcuacan inacal se yulijquil hual quitolpatzcaje pa quimictisi. Huan seje lalac ma quipía se isihua san, huan seje sidual ma quipía se ilahuical, ma camo moteca ca oc se, san ca in se hualca monamictic. Sinda anquinneltoca innojen, yojque anquichías cuali. Ma Dios anmitzpiá.”

³⁰ Yojque, quintilanijque, quisajque pa Jerusalén yehuanten, huan temujque pa Antioquía. Nepa ajsijque, quinnahuatijque pa monechicusqui in laneltocanijmes, quinmacajque in amal. ³¹ Quiman quinmomaxtilijque in amal, paquijque in laneltocanijmes pampa in lajtomes quinlacahuatijque, quinixtilijque inminicnotilisli.

³² Judas huan Silas noje yoje yehuanten ilajtunijmes Dios huan pan ipampa inon hual quinmaxtiloaya, quinchicahuatiloaya míac inminyolo tocnán huan quinpalehuiloaya pa quineltocasqui Jesucristo niman

cuali. ³³Judas huan Silas huan in oc sequin hual quistihualajque nepa Jerusalén mocahuajque nepa pa Antioquía sequin tonalijmes, cuaquinon yahuiloaya mocuepalo capa tocnían laneltocanjmes pa Jerusalén hual latilanijque pa hualalosquiaya pa Antioquía. Yehuanten pa Antioquía quinchicahuajque quinsejtataloaya yehuanten pa mocuepasqui cuali pa Jerusalén capa cataloaya yehuanten hual quintilanijque. ³⁴Ma yoje, Silas molalic pa mocahuas nepa Antioquía. ³⁵Huan mocahuiloaya Pablo huan Bernabé pa Antioquía ca tocnían, lamaxtineniloaya huan quinnahuatilitinemoaya ilamachilitisli cuali in Tata. Huan cataloaya míac oc sequin hual noje lamaxtiloaya capa in laneltocanjmes.

Pablo pehua yahui huejca oc sejpa pa quinahuatis in lajtol cuali

³⁶Panuje sequin tonalijmes, huan Pablo quilic Bernabé:

—Axcán, ma timocuepacan, ma tiquinpaxaluilican tocnían pa mochi innojen caltilan capa tiqinnahuatilije in Tata ilajtol. Ma timocuepacan pa tiquitasi quinami cate.

³⁷Bernabé quinequiaya quihuica noje ca yehuanten Juan, in hual noje motocaya Marcos. ³⁸Quijtuc Pablo pampa amo cataya cuali pa quihuicalosquiaya Juan Marcos ca yehuanten pampa yihual quincajcahuac nepa capa cataloaya pin lalticpan Panfilia. ³⁹Cuaquín molaxililoaya lajtomes míac. Ma yoje, amo ajsijque pa se lajtulisli. Pampa in, moxilujque. Bernabé quihuicac Juan Marcos ca yihual, uyajque ca barco pa Chipre. ⁴⁰Pablo quilajtultic Silas pa yasquiaya ca yihual, huan inmicnían laneltocanjmes quilajlanijque in Tata pa quinmitasquiaya ca iicnililisli.

⁴¹Quipanahuijque in lalticpan

Siria huan in lalticpan Cilicia huan quinchicahualtiteniloaya inminyolo in laneltocanjmes nejnepa.

Timoteo yahui ca Pablo huan Silas

16 Ajsijque Pablo huan Silas pa Derbe huan Listra. Nepa cataya se laneltocani itoca Timoteo, ixolol se sihual judía hual quineltocac Cristo. Itajtzin yec se lalac griego. ²Lajtujque cuali inahuac Timoteo icnían laneltocanjmes pa Listra huan Iconio. ³In Timoteo Pablo quinequiaya pa yasquiaya ca yihual. Ma yoje canac huan quitzontequilic pa icuilaxli, pampa cataloaya míac judíos pa innojen caltilan huan quimatiloaya itajtzin Timoteo yec lalac griego.

⁴Cuaquín quinpanahuijque Pablo huan Silas huan Timoteo pa sequin caltilan huan pa oc sequin huan laquetzajque ca moxtin in laneltocanjmes. Quinmilije inon hual in lanahuatinijmes huan in abuelojmes pa Jerusalén quilijque pa quichihualosquiaya moxtin in laneltocanjmes hual amo yeje judíos. ⁵Yojqe, quinchicahualtijque pa quineltocasqui in Tata Jesús niman cuali, huan yojqe itequi miajqe in lacames hual quineltocaloaya toTata.

Pan ipampa laxotocalisli, Pablo quita se lalac hual yuliaya pa Macedonia

⁶Quipanahuijque in lali itoca Frigia huan in lali itoca Galacia, huan quintzacuilic in Espíritu Santo pa camo quinnahuatilitilosquiaya ilajtol Dios pin lalticpan Asia. ⁷Pampín, uyajque huan ajsijque pa in lali itoca Misia, yahuiloaya yahuilo pa in lalticpan itoca Bitinia. Ma yoje, ¡Espíritu Jesús amo quinmacahuiltic. ⁸Cuaquín quipanahuijque in lali itoca Misia huan temujque pa Troas huan nehual Lucas niqinmitac nepa. ⁹Huan pa layúa nesic ca Pablo len quinami laxotocalisli,

quitac se lacal hual yuliaya pin lali Macedonia, moquezataya huan quitemachijtataya, quilic: “Xipanu pa Macedonia, xitechpalehui.” ¹⁰Quiman quitac Pablo in laxotocalisli, jan ajnaxcan timochijchihuajque pa tiyahuilosquiaya pa in lali Macedonia. Ticmatijque pampa technotzaya Dios pa tiquinnahuatililosquiaya in lamachiltilisli cuali ca yehuanten pa Macedonia.

Pablo huan Silas yahuilosquiaya pa in caltilan Filipos

¹¹Yojque, quisajque ca barco nepa Troas, tiajque jan yoje pa in lali lajco pin al huejcalan itoca Samotracia. Mostatica tiajsijque pa in caltilan Neapolis. ¹²Nepa tiquisajque, tiajque pa in caltilan Filipos. Inon in caltilan hué pa ilajco Macedonia capa quisa in tonali, unca se caltilan romano. Cataloaya guaches romanos hual quipehualtijque, yojque mocahua se caltilan romano. Ticataloaya sequin tonalijmes nepa. ¹³Pan tonali quiman mosehuilo, tiquisajque pa quiahuac ilalapujquimes in caltilan, tiajque pa atenco hué capa tiqijtujque yahuinijme pa quilajlanilosquiaya Dios. Nepa timolalijque, tpehualoaya tilaquetzalo ca in sihuames hual monechiculoaya. ¹⁴Cataya nepa se sihual itoca Lidia, lacatic pin caltilan Tiatura. In Lidia yec se lanamacani, quinamacaya tzotzomajli hual cataya layapali morado. Yihual Lidia quimolancuacuetziliaya Dios. Mocahuaya quicactica len Pablo quinmiliaya, huan in Tata Jesús quihueliltic pa iyolo pa quilalic ilanelocalisli ca in hual Pablo quijtuaya. ¹⁵Yojque, cataloaya lacuayatequili, yihual huan noje yehuanten pa ichan, huan cuaquinon quinmilic Pablo huan yehuanten hual cataloaya ca yihual, quinmilic:

—Sinda anquijtúa pampa nehual neli nicneltoca in Tata, xihualacan pa nochan, nepa xichantican.

Yojque technotzac ca lanequilisli, pampín nepa tiajque pa tichantilosquiaya.

¹⁶Cuaquín cataya se tonali tiyahuilosquiaya pa capa quilajlanilosquiaya Dios, cataya se muachita hual itecojuan moyaxcajtilijque yihual. In muachita quinquipanuuilini itecojuan, quipiaya se ijyecal amo cuali hual quilalilic Satanás. Yihual in muachita quinnechicuhuilic míac tomin pa itecojuan, pampa in ijyecal amo cuali quihueliltini yihual pa quijtusquiaya len yahuiaya panu. ¹⁷Technamiquic pan ojli huan pehuaya techtoca totepotzcon Pablo huan tehuanten, tzajtzitiahuia, quiliaya:

—In lacames yehuanten itequipanujquimes Dios, in Dios hual san yihual unca hué. Yehuanten anmitzmachilito iojli capa ancayas laquixtili pin polehuilic.

¹⁸In quichihuaya míac tonalijmes. Cuaquín cualaniaya Pablo pampa quimacaya tequil. Pampín momalinac quinoztac in ijyecal amo cuali, quilic:

—Nimitzilía pan ipampa Jesucristo ilahueliltisli, xiquisa capa yihual.

Huan jan ajnaxcan in ijyecal quisac pa yihual. ¹⁹Axcan, quitajque itecojuan in muachita pampa yajmo huil quinechicuhuilic tomin. Pampín quinquitzquijque Pablo huan Silas, quinhuilanajque pin tenencia capa cataloaya in hueyenten. ²⁰Quinmotexpahuilijque Pablo huan Silas, quilijque:

—In lacames cate judíos, quimacalo tequil tocaltilan. ²¹Yehuanten quinmaxtilo lachihualisli hual molalilo ipan tolajtol sinda tiquinneltocasi o sinda tiquinchihuasi, pampa tehuanten ticate lacames hual ticpialo toyaxca ca romanos.

²²Yojque, cualantihualajque ca yehuanten moxtin in lacames, huan in guaches quinquixtilijtiquisajque innahuajmes quintzayanilijtataloaya. Latilanijqque in la'ajuaniqjmes pa quinhuitequilosquiaya. ²³Cuaquín quiman lamijque quinhuitequijque ca míac latecualisli, quinhucicajque pa in calijtic, quilijque chichahuac in se hual quintzacuaya pa quinmitasquiaya cuali pa camo quisalosquiaya. ²⁴Yihual quicactataya in lajtol, quintzacuac pa in niman calijtic, quinlalilic icxihuajmes pan sequin cuahuimes hual quipiajqque cojcoyunquimes capa quinquitziqjque inmicxihuajmes. Amo huil quinquixtiloaya inmicxihuajmes pampa quintzacualo in cuahuimes ca teposlimes.

²⁵Ma yoje, pa lajco layúa, quilajlaniloaya Dios Pablo huan Silas huan quicantaruilijtataloaya (quicuiquilijtataloaya) Dios ca lajtomes cuajcuali huan huejué. Huan in oc sequin hual cataloaya latzacuali pa calijtic quinquaculoaya. ²⁶Jan ajnaxcan, lalulnic chichahuac, moliniloaya ilalastili in calijtic, molapujque mochi lalapujquimes jan ajnaxcan huan tomajque in teposlimes, huetzijque mochi sejse hual cataya pan in laquitzquilini. ²⁷Cuaquín ejsac in se hual quinmiztataya yehuanten hual cataloaya latzacuali huan quinmitac in lalapujquimes lapujticate. Cuaquín quiquixtic iteposli pa moanalisli, yahuiaya momicti, quijtuaya pampa cholujque moxtin hual cataloaya latzacuali. ²⁸Jan axcan, Pablo quinotzac ca lajtol chichahuac, quilic: —Amo ximomicti, pampa timoxtin nican ticate.

²⁹Molajlanilic in lalac se tixuxli, calactiquisac capa cataloaya Pablo huan Silas, molancuacuetzac yuyucatataya inminlaixpan. ³⁰Huan quinhucic pa quiahuac, quinmilic:

—Tatas, ¿len nicpía pa nicchías pa niyes laquixtili pin polehuilislí?

³¹Huan quilijque:

—Xicneltoaca in Tata Jesucristo huan tiyes laquixtili pin ipolehuilislí Dios icualanilislí, tehual huan moxtin pa mochan.

³²Huan uyajque pa ichan, quinnahuatilijque ilajtol Dios ca yihual huan moxtin pa ichan. ³³Huan jan axcan in layúa quinhucic in lalac Pablo huan Silas, quinpaquilic inminlatecualislí huan ca nadita cataloaya lacuayatequili yihual huan moxtin hual chantiloaya pa ichan. ³⁴Cuaquinon quinhucic Pablo huan Silas calijtic pa ichan huan quinlacualtic. Huan quipialoaya paquilislí yihual huan moxtin pa ichan pampa axcan quineltocaloaya Dios.

³⁵Mostatica in la'ajuaniqjmes quinnahuatijque in lachianijmes pa quililosquiaya in lalac hual quinlachiliaya yehuanten hual cataloaya latzacuali pa calijtic, quilijque:

—Xiquinmacahua in omenten lacames.

³⁶Yojque in lalac quinmilic Pablo huan Silas in lajtomes, quinmilic:

—Axan nechnahuatije in la'ajuaniqjmes pa annimitzmacahuasquiaya. Pampín, xiacan, ma Dios anmitzhuica.

³⁷Ma yoje, Pablo quinmilic in lachianijmes, quil:

—Tehuanten ticate lacames hual ticpialo toyaxca ca romanos. Huan antechhuitequic inminyampa yehuanten pa anmocaltilan. Inon anquichíac mas que amo quilajlanijque in la'ajuaniqjmes leca techmotexpahuililoaya. Cuaquinon antejtzacuac pin calijtic. Mochi inon hual antejchihuilic amo unca quinami quijtúa in lajtol pa lacames hual cate ca inminyaxca romanos. Huan axcan ¿yalo techmacahualo huan amo inminyampa yehuanten pa anmocaltilan, yojque pa

camo quimatis amaqui? Pampa no. Ma hualacan yehuanten in la'ajuaniymes, ma techmacahuacan yehuanten.

³⁸Innojen lachianijmes (policías) quinmachiltije in la'ajuaniymes in hual quinmilic Pablo. Huan quiman momachiltijque in la'ajuaniymes pampa Pablo huan Silas yeje ca inminyaxca romanos, yojque momajtijque míac. ³⁹Hualajque capa Pablo huan Silas, quinlajlanijque pa quinpujpuhualosquiaya. Cuaquinon quinquixtijque pin calitic huan quintemachijque ca mochi inminyolo pa quisaloshiya inmincaltilan.

⁴⁰Yojque quisajque capa cataloaya latzacuali huan cuaquín uyajque pa ichan Lidia. Nepa quinpaxaluilijque in laneltocanijmes tocnán huan quinchicahualtijque pa inminyolo, cuaquín uyajque.

Cualantinemilo yehuanten pa Tesalónica

17 Quimpanahuijque Pablo huan Silas in caltilan Anfópolis huan in caltilan Apolonia, ajsijque pa Tesalónica. Nepa cataya se inmintiopan in judíos. ²Huan quinami itequi quichihuani Pablo, calaquic pin tiopan pan tonali quiman mosehuilo huan pa ye tonaliymes quiman mosehuilo quinnahuatlic Dios ilajtol lajcuiluli. ³Quinmaxtiaya huan quinnextiliaya pampa quiapiaya pa panusquiaya lacocoltilisli in Cristo huan noje quiman miquic, quiapiaya pa yulis oc sejpá, quinmiliaya:

—In Jesús, yihual in Cristo, inahuac yihual annimitzmachiltitica.

⁴Cataloaya sequin ca yehuanten in judíos pehualoaya quineltocalo Cristo huan quintocaloaya Pablo huan Silas. Noje pehualoaya quineltocalo míac ca in lacames griegos hual quimolancuacuetzililoaya Dios. Huan quineltocaloaya míac sihuames hual

moxtin quimatiloaya momajtilo inminlaixpan yehuanten. ⁵Ma yojje, moxiculoaya in míac judíos pampa sequin cantataloaya oc se ojli hual cataya Cristo iojli. Pampín quinmanajque lacames ej'elehuis capa in lacames hual amaqui quinmitaya ca mosehuilisli, quinnechicujque, quinmilijque pa tzajtzitinemilosquiaya pa quimacalosquiaya tequil moxtin pa Tesalónica. Yojque, hualajtiquisajque pa ichan se itoca Jason, quintemujtataloaya Pablo huan Silas, quinequiloaya quinhuicalo capa cataloaya lanechiculi in lacames pin caltilan. ⁶Amo quinmitajque Pablo huan Silas, pampín quihuilanajque Jason huan sequin tocnán laneltocanijmes, quinhuicajque pa ila'ajuaniymes in caltilan, tzajtzitihualaloaya, quilijque:

—In lacames hual temacalo tequil pa mochi in lalticpan hualajque noje ca niquic. Quinmanac Jason pa chantilosquiaya pa ichan huan umpa chantiticate. ⁷Huan innojen moxtin lachihualo quinami ilacocolinijmes ilajtomes in hué Cesar, quijtulo pampa unca oc se hué pa mochi in lalticpan, itoca Jesús.

⁸Quicaquijque inon in la'ajuaniymes huan in lacames, pampín cualanijque. ⁹Yojque, canilijque tomin Jason huan innojen oc sequin tocnán, quipialoaya pa quicuepilisi in tomin Jason huan tocnán quiman quisaloshiya Pablo huan Silas pa quiahuac Tesalónica. Canajque in tomin, cuaquinon quinmacahuajque Jason huan in lacames hual cataloaya ca yihual.

Pablo huan Silas yalo pa in caltilan Berea

¹⁰Yojque, jan ajnaxcan pa layúya yehuanten tocnán quintilanijque Pablo huan Silas pa in caltilan Berea. Huan quiman ajsijque umpa, Pablo huan

Silas uyajque pa inmintiopan in judíos. ¹¹Yehuanten in judíos pa in tiopan nepa quiपालोया inminyolo hual míac quinequiloaya quineltocalo ilajtol Dios, amo cataloaya quinami yehuanten pa Tesalónica. Mojmosta momaxtiloaya in lajtol lajcuiluli pa quimatilosquiaya sinda innojen lajtomes cataloaya quinami Pablo quinmaxtitataya.

¹²Yojque, quineltocaloaya Jesús míac judíos nepa. Noje quineltocaloaya míac sihuames griegas hual moxtin quimatiloaya momajtilo inminlaixpan yehuanten. Huan noje quineltocaloaya lacames griegos.

¹³Ma yoje, momachiltijque in judíos nepa pa Tesalónica pampa quinnahuatiaya Pablo noje pa Berea. Pampín uyajque umpa noje, quijtutinemiloaya pampa amo melahuac len Pablo quimaxtiaya, quiyantitinemiloaya pa qitojtoyalosquiaya Pablo. ¹⁴Cuaquinon jan ajnaxcan in laneltocanijmes tocnían quitilanijque Pablo pa yasquiaya pa in al huejcalan, huan ca yihual uyajque sequin tocnían nepa Berea. Mocahuajque Silas huan Timoteo umpa Berea. ¹⁵Yehuanten hual uyajque ca Pablo quihuicajque pa in caltilan hué Atenas. Cuaquinon quicahuajque Pablo nepa huan mocuepajque pa Berea. Pablo quinmilic pa quinmililosquiaya Silas huan Timoteo pa camo huejcahuasqui pa hualalosquiaya pa Atenas capa yihual cataya.

Pablo pa Atenas

¹⁶Yojque, quiman Pablo quinchixtataya Timoteo huan Silas pa Atenas, cualanic lajtic yihual pampa cajcapa pin caltilan hué quinmitaya monos hual yehuanten pa Atenas quinmolancuacuetzililoaya. ¹⁷Yojque, quinnahuatiaya ilajtol Dios pa inmintiopan in judíos, quinnahuatijtinemiaya aquinojen

quinmolancuacuetzililoaya Dios. Noje mojmosta quinnahuatijtinemiaya ca aqui cayasquiaya nepa pin lajcotiyan capa lanamacanijme. ¹⁸Huan sequin lacames pehualoaya laquetzalo ca Pablo. Ca innojen sequin quintocaloaya inminlamaxtilisli se ilanechiculisli lacames hual motocalo epicúreos. Oc sequin quintocaloaya inminlamaxtilisli se ilanechiculisli lacames hual motocalo estoicos. Yehuanten pehualoaya quijtulo:

—Axcan, ¿len quinectica techili in laquetzani?

Oc sequin quijtuloaya:

—Momati quinequi techlaquetzilíla inminahuac oc sequin dioses hual amo quimatilo nican.

Quijtuloaya inon pampa Pablo quinnahuatijtinemiaya ilajtol Jesús huan quinami yulilo oc sejpa in mijquimes.

¹⁹Yojque canajque Pablo, quihualicajque pa in lajcotiyan itoca Areópago. Nepa in hueyenten monechicunijme pa molaquetzililosquiaya inminahuac lajtomes hual quipianijme. Quilijque: —Xitejchihuili in cuali pa titechilis len yes in lamaxtilisli yancuic hual tilaqueztinemi. ²⁰In lajtomes hual tijcacticate titechilis techlapolultilo. Pampín ticnecticate ticmatilo len quinequi quijtúa innojen.

²¹Yojque cate moxtin in lacames pa Atenas huan aquinojen amo lacatijque nepa hual nepa chantilo. Itequi jan quixtocalo quijtulo o quicaquilo len yancuic san, quiman yes cayas len quinami inon. ²²Yojque moquetzac Pablo pin Areópago lajco capa yehuanten inminlanechiculisli in griegos pa Atenas huan quinmilic:

—Lacames atenatecos, nehual nía annimitzlaquetzilíla inahuac mochi hual niquita nican pa anmocaltilan. Nicmati pampa

amhuanten anlamolancuacuetzilía m'íac. ²³Inon nicmati, pampa quiman nicpanajtataya in caltilan niquiztinemiaya ca m'íac lailalisli mochi cajcapa anlamolancuacuetzilía huan niquitac se hual ipan cataya lajcuiluli in lajtomes: "Pa se dios hual amaqui quiximati." Amhuanten anquimolancuacuetzilía in Dios hual amo anquimati nindeno. Pampín nehual n'ía annimitzlamachilt'ía ilajtol yihual. ²⁴Yihual in Dios hual quinchíac in lalticpan huan mochi innojen hual cate. Yihual inminteco in cielo huan in lalticpan, amo chanti calijtic tiopajmes hual quinchihualo lacames. ²⁵Dios quip'ía mochi, amo monequi pa quip'ías nindeno hual quinchihualo lacames. Yihual quinmaca moxtin in yulilislí huan iyyul huan mochi. ²⁶Dios quinchíac mochi lacames pa ilalimes in lalticpan, quinchíac pan ipampa se lalac, quintilanic pa chantilosquiaya pa mochi in lalticpan. Noje Dios quinlalilic quichi xixihuimes sejse lali pin lalticpan yahuiaya ye inminyaxca ilanechiculislí in lacames hual chantilo pa in lali o moyaxcajtílilo in lali. Noje quinlalilic quichi lali yahuiyoaya quipialo in lalimes capa yulilosquiaya, quinchihuilic inmintejtenco mochi in lalimes. ²⁷Jo quema, Dios quinlalilic mochi inminlalimes lacames pin lalticpan, quinequi pa yehuanten quitemusi yihual sinda cuajnesi moajxiltilosquiaya capa yihual pa quiximatilosquiaya. Neli Dios amo unca huejca, mochi lalac ca tehuanten huil tiajsilo capa yihual pa toyolo. ²⁸Unca pan ipampa Dios tiyulilo huan tinejnemilo huan ticchihualo mochi innojen hual ticchihualo. Unca quinami quijtujque sequin anmolajcuilunijmes pa yina, quijtujque: "Tehuanten ticcate yihual ixolomes." ²⁹Pampín, sinda ticmatilo pampa tehuanten ti'ixolomes yihual, ma camo tiquijtucan pampa

Dios unca quinami se mono lachihuali ca oro o ca plata o ca tixcali o len quichíac se hual quimatiaya, o len quichíac se quinami laijnamiquiaya. ³⁰Yojque, mas que pa yina Dios quinmacahuilic pa quichihualosquiaya quinami quinequiloaya yehuanten hual amo quimatiloaya in hual quijtúa Dios, ma yoje axcan amo unca yojque. Axcan Dios quinmilijtica moxtin pa mochi in lalticpan pa quinpalasi inminyolo pa laijnamiquisi quinami yihual quinequi. ³¹In quichijtica pampa axan quilalic se tonali quiman yahui quinchihuilía moxtin quinami quinmahuilíu pampa yulilo elehuis. Jo quema, Dios quinmaca ojli lacames yojque ca melahualislí pan ipampa se lalac hual quilajtultic pa quinmacas ojli. Huan in lalac itoca Jesús. Dios quiyulilic in Jesús mas que yec lamictili. Yojque technexilic neli pampa quilajtultic in Jesús pa quintilanis lacames pa camo cayasi capa unca Dios pampa cate laijlaculi, huan amo quiman huil mocuepasi capa yihual.

³²Quiman quicaquijque Pablo quinlaquetzilijtataya inahuac se hual miquic huan cuaquín yulic oc sejpa, sequin quihuitzquilijque, oc sequin quilijque:

—Timitzcaquisi oc se tonali quiman titechilis in lamaxtilislí.

³³Yojque Pablo quisac inminlaixpan yehuanten. ³⁴Ma yoje, sequin quitocaloaya Pablo, se ca yehuanten motocaya Dionisio, yihual yec se ila'ajuani in Areópago, in tenencia. Cataya noje se sihual itoca Damaris, huan cataloaya oc sequin hual quineltocajque ca in omenten.

Pablo yahui pa in caltilan Corinto

18 Panujque innojen, quisac Pablo pa Atenas, uyac pa in caltilan Corinto. ²Umpa quiximatic se lalac judío itoca Aquila. Yihual lacatic pin

lalticpan itoca Ponto huan yuliaya pin lali itoca Italia. Yajmo yultataya nepa Italia pampa quipiác sequin tonalijmes quiman huan isihua Priscila hualajque pa Corinto. Hualajque pa Corinto pampa in hué itoca Claudio quitilanic lajtol pa quisalosquiaya moxtin in judíos pin caltilan hué Roma, in capital. Yojque Pablo quinpaxaluiliaya Aquila huan Priscila pa inminchan nepa pa Corinto. ³Quimatiaya Aquila in tequipanulisli hual noje quimatiaya Pablo, quimatiloaya quitzomalo tzotzomajli telahuac calica quinchihualo calitos pa cuajlan ca in tzotzomajli. Pampin Pablo pehuac chantic ca Aquila pa ichan huan yojque pehualoaya tequipanulo in omenten.

⁴Huan mochi in tonalijmes quiman mosehuilo in judíos, uyac Pablo pa inmintiopan. Nepa laquetzaya ca in judíos huan ca yehuanten hual amo judíos, quinequiaya quinnextili pampa cataya neli ilajtol Jesucristo hual yihual quinmilijtataya.

⁵Yojque, quiman ajsijque Silas huan Timoteo hual catanijme pa Macedonia, quitajque pampa itequi mojmosta quinnahuatijtinemiaya Pablo ilajtol Dios in corintios. Quinmaxtinemiaya in judíos ca lajtol melahuac pampa yihual Jesús unca in Cristo hual quichixtataloaya in judíos. ⁶Ma yoje, yehuanten mocahualoaya amo quinctataloaya quineltocalo, amo mocahualoaya pa lahuejuecaltitinemilosquiaya. Pampa inon Pablo quintzejtzeluilic inahuas quinami unca inminlachihualisli in judíos, yojque quinnextiliaya pampa quincajcahuaya. Quisaya pa capa yehuanten pampa quichihualoaya amo cuali, quinmilic:

—Axcán, amhuanten anmitzmotexpahuilí Dios pampa anquichíac inon, pampa nehual annimitzmacac ilajtol Dios pa

anquineltoacasquiaya, huan amo anquinequic. Yojque Dios amo nechmotexpahuilis nehual. Huan axcan mosta nía niquinnahuatíla ilajtol Dios jan ca yehuanten san hual amo judíos.

⁷Cuaquinon quisac Pablo pa inmintiopan, uyac calaquic pa ichan se itoca Ticio Justo. Yihual yec se hual quimolancuacuetziliaya Dios huan icali cataya inahuac inmintiopan in judíos. ⁸Huan ihué in tiopan, yihual itocaya Crispo, quineltocac in Tata, yihual huan moxtin pa ichan. Noje quineltocaloaya míac lacames huan sihuames pa Corinto huan cataloaya lacuayatequili. ⁹Huan in Tata quilic Pablo pa layúa pan ipampa laxotocalisli, quilic:

—Amo ximomajti. Xilaqueztía huan amo ximocahua pa tilaquetzas. ¹⁰Nehual niunca ca tehual. Amaqui yahui mitzquitzquía pa mitzcocoltis pampa pa in caltilan cate míac hual yalo nechneltoalo.

¹¹Yojque chantiaya Pablo nepa pa se xihuil huan chicuase mesli, quimaxtinemiaya ilajtol Dios capa yehuanten.

¹²Axcán, se itoca Galión yec huelitini (gobernador) pin lalticpan itoca Acaya, huan nepa pin lalticpan Acaya unca in caltilan Corinto. Se tonali ca se lajtulisli cualantiquisaje in judíos ca Pablo, quihuicaje pa pan lajco capa cataya Galión. ¹³Quilije:

—In se amo mocahua pa quinmaxtinemis lacames pa quimolancuacuetzilisi Dios amo quinami quijtúa tolaajtol.

¹⁴Yahuiaya lajtu Pablo pa monapatizquiaya huan Galión pehuac quinnotzac in judíos, quinmilic:

—Sinda quichihuaya len amo cuali in se o sinda quichihuaya len hual monotzaya pa tijquitzquisi, cuaquín nicnequisquiaya annimitzcaqui amhuanten judíos. ¹⁵Huan amo

unca yojque. Ancualantica inahuac len quimaxtía in lalcal, anquinequi anquinlaxilía lajtomes inminahuac in hual quijunijme anmotajtzitzían huan in lajtomes hual san amhuanten anquípía. Ximolalican ca se lajtulisli amhuanten anmohuían. Nehual amo niyes la'ajuani pa niquincaquis innojen.

¹⁶Cuaquín Galión quintojtocaltic in lachianijmes pa quinquixtilosquiaya in judíos pan lajco. ¹⁷Cuaquinon quiquitzquijque moxtin Sóstenes in hual yec ihué inmintiopan in judíos, quihuitequijque ilaixpan pan lajco huan inon amo monotzaya nindeno ca Galión.

**Pablo mocuepa pa Antioquía,
cuaquinon pehua paxalúa
oc sejpa pa míac lalimes**

¹⁸Mocahuac Pablo míac tonalijmes nepa Corinto. Cuaquín mochicahuac ca in laneltocanjimes tocnían huan uyac, ca yihual uyajque Priscila huan Aquila. Ajsijque pa Cencrea capa moximilic Pablo itzontecon. Quichíac inon pa lanextilis pampa nepa lamic quichíac len yihual neli quilic in Tata pampa yahuiaya quichía. Cuaquinon lejcuc pan se barco hual yahuiaya pa in lali Siria. ¹⁹Ajsijque pa Efeso huan Pablo quincahuac nepa Aquila huan Priscila pa pehualosquiaya chantilo. Huan calaquic Pablo pa inmintiopan in judíos, quinnahuatilic yehuanten ilajtol Dios ca in judíos. ²⁰Quiman yehuanten quitemachijque pa mocahuasquiaya Pablo oc sequin tonalijmes ca yehuanten, quinmilic pampa no. ²¹San mochicahuac ca yehuanten, quinmilic: —Nicpía pa nías pa Jerusalén pa nicayas nepa pa in fiesta. Nimocuepas ca amhuanten oc sejpa sinda Dios quinequis.

Cuaquinon quisac ca barco pin caltilan Efeso. ²²Quiman ajsic pa Cesarea, panquisac pa Jerusalén, nepa quinpialtic in laneltocanjimes,

cuaquinon temuc pa Antioquía.

²³Quiman panujque je quesqui tonali nepa, uyac oc sejpa huan quinpaxalulijtinemiaya mochi innojen caltilan pin lali itoca Galacia huan in lali itoca Frigia. Quinchicahualtiaya inminyolo moxtin in laneltocanjimes pa mochi in míac caltilan.

Apolos nahuatía pa Efeso

²⁴Huan cataya se lalcal judío itoca Apolos, yec iyaxca pin caltilan hué itoca Alejándria. Yihual quimatic lajtuc niman cuali, noje quimatic niman cuali ilajtol Dios lajcuiluli. Hualac pa Efeso. ²⁵In Apolos cataya lamaxtili pa quimatis iojli in Tata, huan ca mochi iyolo nahuatiaya huan lamaxtiaya ca lajtol hual moxtin huil quimatiaya len quinequiaya quijtu. Quimaxtiaya ilajtol Jesús, mas que jan quimatic san len quimaxtini Juan Lacuayatequini inahuac Jesús. ²⁶In Apolos pehuac laquetzac pa inmintiopan in judíos, amo momajtiaya. Huan quiman quicaquijque Priscila huan Aquila, cuaquín yehuanten canajque huan quilaquetzilijque míac ca lajtol calica huil quimatiaya in hual quinequi quijtúa mochi inahuac iojli Dios hual ayamo quimatiaya. ²⁷Huan quiman Apolos quinequiaya yahui pa in lali Acaya, in laneltocanjimes tocnían quilijque pampa cataya cuali pa yasquiaya. Quinmijcuilulijque se amal tocnían hual chantiloaya umpa pa Acaya, quinmilijque pa quinamiquilosquiaya Apolos ca paquilisli. Yojque, Apolos ajsic pa Acaya, huan quinpalehuic míac yehuanten hual quineltoajque toTata Jesús pan ipampa in cuali hual Dios tejchihuilía. ²⁸Quimpalehuic pampa yihual huil laquetzaya jan cuali san ilajtol Dios. Yojque amo huil quinanquililoaya in judíos, amo huil quijtuloaya pampa amo cataya

melahuac in hual Apolos quinmiliaya. Quinnextiliaya inminlaixpan moxtin pampa Jesús unca in Cristo hual Dios quitilanic, quinnextiliaya pan ipampa ilajtol Dios hual unca lajcuiluli.

Pablo pin caltilan Efeso

19 Quiman cataya Apolos pa Corinto, Pablo lamic paxaluc pa innojen caltilan hual cataloaya pin lomera (tepetilan) huan hualaya pa Efeso. ²Nepa quinmitac sequin monextiliniymes huan quinmilic:

—¿Hualac in Espíritu Santo pa amhuanten quiman anpehuac anquineltoac Cristo?

Yehuanten quilije:

—No, tehuanten amo tijcaquijque amaqui lajtúa inahuac in Espíritu Santo.

³Huan Pablo quinlajlanic:

—Cuaquín çlen lamaxtilisli anquineltoacaya quiman ancataya lacuayatequili?

Quinanquilijque:

—Ticataloaya lacuayatequili quinami quinmaxtic Juan Lacuayatequini.

⁴Pablo quinmilic:

—Juan quinquayasquini lacames pa yoje lanextilosquiaya pampa quipalaje inminyolo pa laijnamiquisi quinami quinequi Dios. Noje Juan quinmilic pa quineltocalosquiaya in lacal hual yahuiaya huala quiman yihual Juan laquisac quichíac itequipanulisli hual Dios quitilanic pa yihual quichihuasquiaya. Huan in lacal unca Jesús in Cristo.

⁵Quiman quicaquijque inon, cataloaya lacuayatequili quinami lamaxtic Jesucristo, quinoztataloaya Dios pan ipampa itoca Jesús.

⁶Huan quiman quinlalilic Pablo imajmajuan inminpan yehuanten, hualaya pa inminyolo in Espíritu Santo huan pehualoaya lajtulo ca oc sequin lajtomes hual amo quiman quimatiniyme lajtulo, huan

laquetzaloaya Dios ilajtomes.

⁷Yehuanten yeje quinami doce lacames.

⁸Panuc inon, calaquic Pablo pa inmintiopan in judíos nepa pa Efeso, huan yihual pehuaya laquetza amo quimacajsitataya huan pa ye mesli quinnahuatiliaya quinami huelitía Dios. Quichihuaya mochi len huil pa quinnextiliaya pampa cataya melahuac inon hual quijtutataya. ⁹Ma yoje, sequin ca in judíos mochicahuajtije inminyolo pa camo quineltocalosquiaya in lajtol. Pehualoaya laquetzalo amo cuali inahuac Dios iojli. Cuaquinon mijcuanic Pablo capa yehuanten, quinhuicac ca yihual in monextiliniymes huan mojmosta quinmachiltiaya Dios ilajtol pa iescuela (imonextiloyan) se hual motocaya Tirano. ¹⁰Yojque Pablo quichihuaya pa ome xixihuil, huan pampín, pin lalticpan Asia capa cataya Efeso, moxtin hual chantiloaya nepa quicaquiloaya Dios ilajtol. Cataloaya yehuanten hual judíos huan yehuanten hual amo judíos quicaquiloaya.

¹¹Huan Dios quihueliltic Pablo míc pa quinpajtisquiaya cocoxquimes. Quihueliltic pa quinpajtis quinami amo quinpajtiaya pan oc sequin tonalijmes.

¹²Yojque quihuicaloaya dangos huan tzotzomajtzindis hual quilalilijque pan icuerpo Pablo, cuaquín quihuicaloaya huan quinlalilijque pan inmincuerpos in cocoxquimes huan yojque pajtijque. Noje quisaje ijyecames amo cuajcuali pa yehuanten hual quinpialoaya.

¹³Huan noje cataloaya sequin judíos hual yahuiloaya cajcapa, quinquixtilijtinemiloaya ijyecames amo cuajcuali. Yehuanten motoliniloaya pa quinquixtililosquiaya in ijyecames amo cuajcuali pan ipampa quinami quijtuloaya itoca in Tata Jesús, quinmiliyoaya:

—Xiquisacan, annimitztilanía ca itoca Jesús, yihual hual quinnahuatijitía Pablo.

¹⁴Huan cataya se judío motocaya Eseva, yihual se tiopista huan quinpiaya chicome ixolomes hual quinquixitinemiloaya yojque in ijyecames. ¹⁵Huan se tonali quiman quililoaya pa quisasquiaya se ijyecal amo cuali, in ijyecal quinnanquilic:

—In Jesús niquiximati huan noje niquiximati in Pablo. ¿Aquinojen amhuanten? Amo anuncia Jesús ilacames.

¹⁶Huan molasac pani yehuanten in lalac hual quiapiaya in ijyecal amo cuali. Huil moanaya niman chichahuac huan yehuanten amo huil yoje, pampa in lalac quiapiaya in ijyecal amo cuali. Pampín quinsulahuac huan yehuanten moxtin in lacames choluloaya pa quiahuac in cali, cataloaya latecuali huan nacatijmes. ¹⁷Cuaquín momachiltijque quinami panuc inon moxtin in judfos huan in amo judfos hual chantiloaya nepa pa Efeso, momajmajtiloaya huan pampín moxtin quitaloaya huan quijtuloaya quinami itoca in Tata Jesús quiapiaya niman míac chichahualisli. ¹⁸Hualaloaya míac ca yehuanten hual quineltocajque in Tata Jesús, layulcuitiloaya huan lamachiltiloaya inminahuac innojen lachihualisli amo cuali hual quichihuanijme. ¹⁹Huan cataloaya míac hual quichihuanijme laxuxalisli. Yojque quiman quinechicujque inminamames hual quinextilic quinami quichihualo in laxuxalisli, quinchichinuloaya inminlaixpan moxtin. Cuaquion quipuhuilijque quichi ipatiloaya in amames, huan yoje momatijque pampa ipatiloaya cincuenta mil tomin plata.

²⁰Cuaquín miajque ichicahualisli ilajtol Dios ca yehuanten, quineltocaloaya ilajtol ca mochi inminyolo. ²¹Panuc inon huan quinequiaya paxalu Pablo pa in lalimes Macedonia huan Acaya huan ca inon cataya ca se lajtulisli ca in Espíritu Santo.

Quinequiaya quinaxaluili yehuanten hual quineltocaloaya toTata Jesucristo nepa cajcapa chantiloaya. Cuaquion yahuiaya yahui pa Jerusalén, quilic: —Quiman nías pa Jerusalén, cuaquín nicpías pa niquitas in caltilan hué Roma.

²²Cuaquín quintilanic pa Macedonia ome ilapalehuinijmes, Timoteo huan Erasto, huan Pablo mochahuaya sequin tonalijmes pin lalticpan Asia.

Cualantiquisalo pin caltilan Efeso

²³Innojen tonalijmes cataloaya sequin lacames hual amo quixtocaje iojli Jesús, yehuanten quinchihualtijque pa mocualantisqui míac yehuanten pa Efeso. ²⁴Cataya se motocaya Demetrio, yihual quinchihuani caltzindis lachihuali ca plata. Cataloaya caltzindis tijtipichin hual nesiloaya quinami in tiopan hué capa quimolancuacuetzililo in diosa sidual itoca Diana, yihual yec idiosa Efeso. Pan impampa in caltzindis tijtipichin monechiculiloaya míac tomin Demetrio huan yehuanten hual tequipanuloaya ca yihual. ²⁵Pampín quinahuatic pa monechiculosquiaya moxtin itequipanujquimes huan in oc sequin hual quichihualoaya in tequipanulisli, quinmilic:

—Lacames, anquimati quinami timonechicuhuililo míac tomin ca in hual ticchihualo. ²⁶Huan anquiztica huan anquicactica quinami in Pablo laqueztinemi quijtutica pampa amo cate dioses in monos hual quichihualo lacames. Huan axan cate míac hual quineltocalo in hual quijtutinemi in Pablo pampa yihual quimati laquetza cuali. Huan in Pablo amo quinlaquetzilijtica yehuanten pa Efeso san. Noje quinlaquetzilijtica yehuanten hual yulilo pa mochi in lalticpan Asia. ²⁷Pampín cayas polehuilisli pa tehuanten, pampa yajmo yalo quixtocalo len ticchihualo. Huan

noje ca inon cayas polehuilislis pampa cuajnesi yes lacajcahuali icali in diosa Diana. Huan cuajnesi yajmo yalo quilasojlalo in cali hué huan cualtichin, in cali capa quimolancuacuetzililo moxtin pa Asia huan pin lalticpan.

²⁸Quiman quicaquijque inon, cualantiquisajque chicahuac, pehualoaya tzajtziilo, quilijtataloaya:

—iHué unca Diana inmindiosa in efestecos!

²⁹Huan mocaquiaya pa mochi in caltilan in tzajtzilislis, molalujtihualoaya in lacames, amo quimatiloaya len panuaya. Ca se lajtulislis molalujtiquisaloaya pa capa quipialoaya in lanechiculislis pin ilajcotiyan hué in caltilan Efeso. Ca yehuanten quihuilanalaoaya Gayo huan Aristarco, yehuanten quitocanjime Pablo quiman canani ojli pa oc sequin caltilan. ³⁰Huan Pablo quinectataya calaqui pin lajcotiyan hué capa monechicujtiquisaloaya. Ma yoje, amo quimacahuiltiloaya tocnán in monextilinijmes. ³¹Huan noje sequin ca inminhueyenten in lanechiculislis hual quiximatiloaya cuali Pablo quitilanjique lajtol quinahuatijtataya pa camo calaquisquiaya pin lanechiculislis. ³²Huan lajitic pin lanechiculislis comuntataloaya huan tzajtzitataloaya. Sequin quitzajtziiloaya se lajtol, oc sequin quitzajtziiloaya oc se lajtol. Huan in mías lacames nepa amo quimatiloaya pa len monechiculoaya.

³³Cualaniloaya in mías lacames ca mochi in judíos. Cataya se judío itoca Alejandro nepa pin lanechiculislis, huan quiman quilajlanijque pa len monechicujtataloaya, cuaquín moxtin in judíos quitojpehuaje Alejandro pa yasquiaya ilaixpan in lanechiculislis pa quinnotzasquiaya in lalalera pa camo cualanilosquiaya ca in judíos. Quiculiniaya Alejandro imajma ilaixpan in lanechiculislis, quinequiaya

laquetza pa in judíos. ³⁴Ma yoje, quiman quimatiloaya pampa yihual yec judío, cuaquín moxtin tzajtziiloaya chicahuac quinami cataya ilajtol se san, quilije:

—iHué unca Diana inmindiosa in efestecos!

Huan pa ome horas yoje tzajtziiloaya. ³⁵Cuaquinon hualac inminlaixpan in presidente, quinmilic:

—Ximocahuacan.

Cuaquinon quinmilic:

—Lacames efestecos, amo unca lalal hual amo quimati pampa Efeso unca in caltilan capa quilachililo icali in diosa hué Diana huan itixcali santo yihual hual huetzic pan lalticpan quiman quisac pin cielo. ³⁶Amaqui huil quijtúa pampa inon amo unca melahuac. Pampín monequi pa anmocahuas, amo xicchihuacan len hual lanextilía pampa amo anquimati nindeno.

³⁷Anquinhualicac ca niqic in lacames hual amo quixtequilije nindeno itioipan todiosa huan amo quihuejuecaltije todiosa. ³⁸Axcán, sinda Demetrio huan in tequipanujquimes ca yihual quipialo len pa quijtusí, cate tonalijmes quiman monechiculo in huelitinijmes pa lajlanisi. Yojque, huil motexpahuilo huan monapatilo inahuac len unca inminyaxca mochi sejse ca yehuanten.

³⁹Sinda anquinequi anquimati oc sequin lachihualislis huan amo jan inon san, cuaquinon huil molajlanisi quiman timonechiculo quinami quijtúa in lajtol. ⁴⁰Ma mochía yojque, pampa tialo timoitalo pin lamajtilislis pampa ticchihuaje inon axcán. Cuajnesi sequin quinmachiltisi yehuanten hual cate ca ilahueliltislis in hué Cesar in hual panuc nican huan quijtusí pampa tehuanten ticchijtcate se moanalislis ipan in hué. Huan amo ticmatilo quinami tiquinmilis leca timonechicuje.

⁴¹Quiman quinmilic inon in presidente, cuaquinon quinmilic pampa

axan lamíc in lanechiculíslí huan quinmílíic pa mohuicalosquiaya.

Pablo yahui pa Macedonia, cuaquinon pa Grecia

20 Cuaquinon, químan yajmo cualantinemiloaya yehuanten pa Efeso, Pablo quinnahuatic in laneltocaníjmes pa monechiculosquiaya. Monechicujque, quinlaquetzilic in quinami monequi pa tiyulísqui pan íojlí in Tata Jesús. Cuaquinon quinchicahuac Pablo huan uyac pa Macedonia. ²Quípanahuic cajcapa pin lali Macedonia huan ca míac lajtomes quinchicahuatílíic ínminyolo in laneltocaníjmes. Cuaquinon uyac pa in lali Grecia. ³Nepa mocahuaya ye meslí. Cuaquinon químan yahuiaya yahui ca barco pa in lali Siria, momachíltic pampa quinapachíloaya in judíos pa químictilosquiaya químan yahuiaya cana in barco. Pampín mocuepac pa Macedonia pan ojli. ⁴Ca yihual uyajque Sopater íxolol Pírrro hual lacatic pa Berea, huan noje Aristarco huan Segundo hual lacatíjque pa Tesalónica huan Gayo hual lacatic pin caltilán Derbe, huan Timoteo. Huan noje ca Pablo uyajque Tíquico huan Trófimo hual lacatíjque pin lalticpan Asia. ⁵Ajsíjque pa Filipos capa nehual Lucas nicataya. Cuaquinon ínojen tocníán techlaicanajque huan tejchíaloaya pin caltilán Troas. ⁶Cuaquín tehuanten Pablo huan nehual tíajque ca barco químan laquisac in fiesta (ílhúil) químan quícualo in pan hual amo quípía laxocoyajquíl. Tiyahuíloaya pin barco, huan químan tíajque pa macuíli tonalíjmes, tíajsíjque pa Troas capa tejchíxtataloaya, nepa tímocahuajque chícome (siete) tonalíjmes.

Pablo paxalúa pa Troas

⁷Cuaquín pan tonalí hual quípehuáltía in chícome,

tímonechicujque pa tíclapanalosquiaya pan quinamí toTata Jesús techílic pa tímóijnamiquíltílosquiaya quinamí yihual míquíc pa tehuanten. Techlaquetzilic Pablo techmáxtítataya ílajtol Díos. Huan pampa yahuiaya quísa nepa Troas mostática, huejcahuaya Pablo ca ílaquetzalíslí, huan pa lajco layúa ayamo lámíaya laquetza. ⁸Cataloaya míac tapalquítas mílínataloaya pa in calíjtíc pa paní in calí capa tímonechículoaya. ⁹Huan cataya se oquíxli itoca Eutíco molalíjtátaya pa se lalapujquíl capa quítalo pa quíahuac in calí. Quípíaya se cochíllíslí chícahuac pampa Pablo huejcahuaya míac ca ílaquetzalíslí. Yojque quísulahuac Eutíco in cochíllíslí chícahuac huan huétzíc pa quíahuac in lalapujquíl, cataya ye cajcalíjtíc pa paní. Yojque cajcoquíjque míctataya. ¹⁰Ma yoje, temuc Pablo, molasac ípan huan quínapaluc, cuaquinon quinmílíic:

—Ma camo anmítzcocu anmoyolo, pampa axan yúltica oc sejpa.

¹¹Huan lejcuc Pablo calíjtíc oc sejpa. Químan quílapanac in pan huan quícuac, quínlaquetzilíjtíac pa mochí in layúa hual quíncahuíliaya. Químan lanesíc, cuaquín uyac. ¹²Huan in oquíxli hual míquíc hual Díos quíyulíltíc oc sejpa quíhuícajque pa íchan huan quípíaloaya míac paquíllíslí móxtín, huan mochícahuatíllíloaya míac pa ínminyolo.

Quisalo nepa Troas pa yasqui pa Mileto

¹³Pablo molalílic pa yahuísquíaya pa ojli pa Asón, nepa calaquísquíaya pin barco ca tehuanten. Pampín tícanajque in barco huan tíajque pa Asón. ¹⁴Huan químan technamíquíc Pablo umpa pa Asón, tíquíhuícajque ca tehuanten pin barco, tíajque pa Mítílene. ¹⁵Huan umpa tíajque ca in barco, mostática típanujque ílaíxpan

Quiós huan oc se tonali tiajsijque pa in lali lajco pin al huejcalan itoca Samos. Timosehuijque pin caltilan Trogilio huan mostatica tiajsijque pa Mileto. ¹⁶Yojque ticchihuajque pampa molalilic Pablo pa camo timocahualosquiaya míac tonalijmes pin lalticpan Asia, pampín tiajque ca in barco pa yoje amo timoquetzalosquiaya pa Efeso hual unca pin Asia. San ticnequijque tiajque pa Mileto hual unca nadita ca umpic capa unca Efeso. Pablo ejsejtataya pampa quinequiaya ajsi pa Jerusalén sinda huil ajsic umpa pa itonali in fiesta (ilhuil) itoca Pentecostés.

Pablo quinlaquetzilía ilajtol Cristo in abuelojmes laneltocanjmes pa Efeso

¹⁷Nepa pa Mileto quinahuatic Pablo pa hualalosquiaya pa Mileto in abuelojmes laneltocanjmes hual chantiloaya pa Efeso. ¹⁸Huan quiman ajsijque capa yihual, Pablo quinmilic: —Anquimati quinami mojmosta nicataya ca amhuanten quiman nipehuac niyulic pa Asia huan pa quiman niquisac nepa. ¹⁹Nictequipanuiiaya in Tata ca mochi noyolo. Amo quiman nimochíac hué ilaixpan amaqui, huan míac tonalijmes nictequipanuiiaya in Tata nichocatataya. Huan nipanuc lacocoltilisli pampa quinequiloaya nejchihuililo amo cuali in judíos. ²⁰Anquimati amo quiman nimocahuaya pa annimitzilisquiaya len yesquiaya cuali pa amhuanten. Annimitzmaxtiaya quiman anmoxtin anmonechicuhuaya huan quiman niahuiaya pa mochi sejse amochan. ²¹Niquinmiliaya judíos huan yehuanten hual amo judíos quinami quipialo pa quipalasi inminyolo pa quichihuasi len quinequi Dios, noje quipialo pa quineltocasi toTata Jesús.

²²Huan axcan, xiquitacan, nechtilantica in Espíritu Santo pa

nías pa Jerusalén huan nicpía pa nicneltocas. Huan amo nicmati len yahui nechpanúa nepa. ²³In san nicmati, pa mochi caltilan ca capic nías, in Espíritu Santo nechilía neli pampa yalo nejtzacualo pin calijtic huan nía nipanúa míac lacocoltilisli. ²⁴Ma yoje, inon amo nechmajtitica nindeno huan amo nechmonotzilía nindeno nel noyulilicli sinda jan huil nilaquisas nicchías in tequipanulisli hual nechilic in Tata Jesús pa nilamis nicchías. Yihual nechilic pa nicnahuatijtías ilamachiltilisli cuali, niquinmilijtica lacames quinami techinilía Dios.

²⁵Pampín ninejnemiaya nilaqueztinemiaya ca amhuanten quinami huelitía Dios. Huan axcan xiquitacan. Nicmati pampa yajmo annehitilis noixco ca amhuanten anmoxtin. ²⁶Ma yoje sinda unca se ca amhuanten hual amo quineltoca ilajtol Dios, amo huil nechmotexpahuilis nel. ²⁷Annimitznahuatilic mochi ilajtol Dios, amo annimitzlatilic nindeno hual ilajtol techilía. ²⁸Yojque, ximolachilican amhuanten nojen huan xiquinmiztiacan moxtin hual quineltocalo toTata Jesucristo, pampa annitzlalilic in Espíritu Santo pa yoje anquichías quinami se quilachilía iborregos. Quimictijque Jesucristo yehuanten pa Jerusalén huan pan ipampa iesli hual toyahuic, yihual moyaxcajtilic yehuanten hual quineltocalo. ²⁹Nehual nicmati pampa quiman nimohuicas, cuaquín hualasi capa amhuanten lacames hual islacatise ca amhuanten pampa quinequisi anmitzquixtisi pan iojli Jesús pa camo anquitocatías. In lacames cayasi quinami coyomes hual quise-manalo in borregos. ³⁰Huan capa amhuanten nojen cayasi lacames hual quimaxtisi islacatilisli. Yojque quitilanilisli inminyolo in laneltocanjmes pa quineltocasi in islacatilisli hual

quimaxtisi. ³¹ Pampín ximoiztiacan, xiquijnamiquican quinami pa ye xixihuil yihualitonali, pa semilhuil huan pa layúa, amo nijcahuaya pa annimitzijnamiquiltis mochi inon ca mochi sejse ca amhuanten, nichocatataya quiman annimitziliaya.

³² Huan axcan nocñan, ma Dios anmitzlachili huan ma anmiyichicahualti anmoyolo in ilajtol iicnililislí. Ilajtol Dios huil quichfa niman míac. Huil anmitzlachilífa anmoyolo huan yoje se tonali anquípías mochi hual Dios quinequi anmitzmaca amhuanten. Jo quema, mochi inon Dios quinequi quinmaca moxtin yehuanten hual yihual quinlajtultic pa yesi ilacames. ³³ Amo quiman nicnequic amaqui itomin, amo quiman nicnequic itzotzomajli amaqui. ³⁴ No, amhuanten nojen anquimati pampa nehual ca in nomajmajuan nitequipanuaya pa nimolacuualtisquiaya huan pa niqinlacuualtisquiaya yehuanten hual cataloaya ca nehual. ³⁵ Mojmosta annimitzmaxtiaya pampa yojque ticpialo pa titequipanusi pa ticpiási len calica huil tiquinpalehuisi yehuanten hual amo quipialo chicahualisli. Xiquijnamiquican len quijtuc toTata Jesús, quijtuc: “Míac paquilisli Dios quimacas se hual quinmaca oc sequin len quipías. Amo yojque míac paquilisli quimacas Dios se hual san cana len quimacalo yihual.”

³⁶ Huan quiman quinmilic inon, molancuacuetzac Pablo ca moxtin yehuanten huan quilajlanic Dios. ³⁷ Huan chocaloaya míac moxtin, quinapalujque Pablo pa iquixlan, quitenamiquiloaya. ³⁸ Quincocuhuaya inminyolo míac pampa yihual mohuicatiahuaya. Ma yoje quincocuhuaya inminyolo niman míac quiman quinmilic pampa yajmo yahuiloyaya quitalo iixco. Cuaquinon uyajque ca Pablo pa in barco.

Pablo yahui pa Jerusalén

21 Quiman tilejcujque in barco huan timoxilujque capa cataloaya yehuanten, tiajque melajtataya pa in lali lajco pin al huejcalan itoca Cos, huan mostatica tiajque pa Rodas huan umpa pa Pátara huan Mira. ² Huan umpa tiquitajque se barco hual yahuiaya quipanahui in al huejcalan pa Fenicia. Tilejcujque in barco, tiajque. ³ Huan quiman pehuac nestic in lali lajco pin al huejcalan itoca Chipre, ticpanahuijque ca in lali pa tomajma amo cuali huan tiajque pa Siria. Umpa tiajsijque pa in caltilan hué Tiro capa calaquilo huan quisalo barcos. Nepa quilatemuhuilijque in barco. ⁴ Tehuanten tiquintemujque in laneltocanjimes huan timocahuajque pa siete tonaljimes ca yehuanten. Yehuanten quilijque Pablo pa camo panquisasquiaya pa Jerusalén pampa in Espíritu Santo lamic quinmilic len yahuiaya quipanu Pablo. ⁵ Quiman panujque in chicome (siete) tonaljimes, tiquisajque nepa Tiro huan ca tehuanten uyajque moxtin yehuanten ca in sihuames noje huan in xolomes. Timolancuacuetzajque pan itenco in al huejcalan, ticlajlanijque Dios, cuaquinon timochicahuajque se huan oc se. ⁶ Tilejcujque pin barco huan yehuanten mocuepajque pa inminchan. ⁷ Cuaquín tehuanten tiajque tijcajtaloaya Tiro huan tiajsijque Tolemaida. Nepa tilamijque tiajque ca barco. Tiquinpialtijque tocnían in laneltocanjimes huan timocahuajque ca yehuanten se tonali. ⁸ Mostatica tiquisajque nepa Tolemaida, tiajque pan ojli pa Cesarea, nepa tiajsijque pa ichan Felipe in evangelista, yihual yec se ca in chicome lacames hual quinlajtultijque in lanahuatinijmes pa quinlachililosquiaya in sihuames hual mocahualoyaya inminhuían. Nepa

pa ichan tichantiloaya. ⁹In Felipe quinpiaya nahui ixolomes sihuames. Yehuanten ayamo monamictijque, nepa chantiloaya pa ichan inmintajtzin.

Yehuanten quipialoaya Dios ilahueltiltilisli pa quinahuatisqui ilajtol.

¹⁰Ticataloaya pa Felipe ichan sequin tonalijmes, ajsic se lalac hual chantic pa Judea, yihual itoca Agabo.

Yec se ilajtuni Dios, quipiaya Dios ilahueltiltilisli pa quijtusquiaya len yahuiaya panu. ¹¹Techpaxaluliaya, canac ilacuejtiloni Pablo, moilpilic icxihuaajmes huan imajmajuan, quijtuc:

—Yojque quijtúa in Espíritu Santo: In judíos pin Jerusalén yojque quilpisi in lalac hual iyaxca in lacuejtiloni. Cuaquinon quitemacasi ca yehuanten hual amo judíos.

¹²Yojque quiman tijcaquijque inon, tipehuajque tiquilijque Pablo ca icnotilisli ca mochi toyolo pa camo panquisasquiaya pa Jerusalén, tehuanten huan yehuanten hual chantiloaya pa Cesarea. ¹³Cuaquinon lananquilic Pablo, techilic:

—¿Leca anchocatica huan annehcocoltitica noyolo? Amo xicchihuacan inon pampa sinda quinequi Dios, niunca ca se lajtulisli ca yihual pa nías pa Jerusalén pa nicayas laipili nepa, huan noje niunca ca se lajtulisli pa nimiquis nepa sinda yojque quinequi in Tata Jesús.

¹⁴Yojque amo quinequic quichíac quinami ticmacajque lajtol, pampín yajmo tinahuatijque, tiquijtujque:

—Ma ye quinami quinequi in Tata.

¹⁵Quiman panujque innojen tonalijmes, timochijchihuajque huan tipanquisajque pa Jerusalén.

¹⁶Noje ca tehuanten uyajque sequin laneltocanijmes hual chantiloaya pa Cesarea. Yehuanten techhuicajque pa ichan se laneltocani itoca Mnason, yihual lacatic pa Chipre, in lali lajco pin al huejcalan. Yihual cataya

monextilini pa míac xixihuil, ca yihual pa ichan timocahuajque.

Pablo quipaxalulíá Jacobo

¹⁷Quiman tiajsijque pa Jerusalén, tocnán laneltocanijmes techpialtijque ca paquilisli. ¹⁸Cuaquín mostatica uyac Pablo ca tehuanten pa tiqitalosquiaya Jacobo huan nepa mochi inminabuelojmes in laneltocanijmes cataloaya ca Jacobo. ¹⁹Quinpialtic Pablo huan pehuac quinpuhuilic mochi hual quichíac Dios ca yehuanten hual amo judíos pan ipampa in hual yihual Pablo quichíac, pampa Dios quihueliltic.

²⁰Quiman quicaquijque Jacobo huan in laneltocanijmes, quijtujque lajtomes huejué huan cuajcuali pa Dios. Cuaquinon quilijque Pablo, quil:

—Ticmati, tuinon, quichi miles judíos cate hual axcan quineltocalo Cristo. Ma yoje, quimatilo momajtilo niman míac inahuac inon hual Moisés quijtuc pa ilajtol pa ticchihualosquiaya tehuanten, huan quinequilo noje pa mochi oc sequin quimatisi momajtisi yoje. ²¹Huan sequin quintenejtcate in judíos nican monahuac tehual. Quijtulo islatatijtcate pampa tehual tiquinmaxtitinemi in judíos hual chantilo pa innojen caltilan capa chantilo yehuanten hual amo judíos, quil quililo, tiquinmilijtinemi pa camo quintzontequilisi icuilaxli inminxolomes, quil, quinami quijtuc Moisés pa quichihualosquiaya. Huan quijtulo pampa tehual tiquinmilijtinemi pa yajmo quichihuasi in míac lachihualisli hual monequi pa quinchihuasi in judíos. ²²Axan, ¿len ticchihuasi? Moxtin in judíos hual quineltocalo Cristo momachiltisi pampa axcan tihualac ca niquic. ²³Pampín, xicchía in hual timitzilisi: Cate ca tehuanten nahui tocnán laneltocanijmes hual quichihuaje se lajtulisli ca Dios. Axan quipialo pa lamisi quichihuasi. ²⁴Tehual

xiquinhua in lacames, ximochipahua quinami se quipía pa quichías quiman quichías se lajtulisli ca Dios. Tehual xiclahuili in nahuenten. Cuaquinon yehuanten huil moximasi quinami quichihualo quiman lamilo quichihualo judíos inminlajtulisli ca Dios. Yojque quimatisi in judíos pampa in hual momachiltije monahuac tehual amo unca melahuac. Quema, quimatisi pampa tehual noje ticneltoca ilajtol Moisés. ²⁵Ma yoje, pa yehuanten hual amo judíos hual noje quineltocalo Cristo, tiqintilanije se amal calica tiqinmilije len tiqijtulo unca cuali pa camo quichihuasi: Ma camo quicuacan nacal hual quilalilo inminlaixpan monos, ma camo quicuacan esli huan inacal se yulijquil latolpatzcali, huan ma quipía jan se isihua o se ilahuical san. Jan ma camo motecacan ca oc se.

Quiquitzquilo Pablo pin tiopan hué

²⁶Cuaquinon mostatica quinhucac Pablo in nahui lacames, mochipahuac quinami se judío quipía pa quichías quiman quichía se lajtulisli ca Dios. Yoje quichihuaje innojen nahuenten lacames noje, cuaquinon calaquic Pablo calijtic in tiopan hué, quinlamachiltic in tiopistas quichi tonalijmes cayalosquiaya quiman lamilosquiaya quichihualo in lachipahualisli yihual huan in nahuenten lacames, cuaquinon huil laxlahuisquiaya Pablo in huendi.

²⁷Yojque lamijque quichihuajque chicome (siete) tonalijmes Pablo huan innojen nahui lacames. Ma yoje, quiman ca nadita yahuiiloaya laquisalo ca in chicome tonalijmes, quitaloaya Pablo sequin judíos hual chantiloaya pin lalticpan Asia, quitajque calijtic in tiopan hué huan quincualantijque in lacalera. Quiquitzquitiquisajque Pablo, ²⁸tzajtzitataloaya, quilijque:

—iLacames israelitos, xilapalehuican!
iIn se in lacal hual yajtinemi pa

mochi cajcapa lamaxtinemi pampa tehuanten amo ticate cuali! iLamaxtinemi pa camo quineltocasi in hual Moisés quijtuni pa quichihualosquiaya! iLamaxtinemi pampa in tiopan hué nican amo unca cuali! iHuan noje yihual quichíac catzahualisli, quinhualicac lacames griegos nican calijtic pin lasojli tiopan hué huan yojque quijlacuc!

²⁹Inon quijtujque pampa quitajque nepa pa Jerusalén ca Pablo tocni Trófimo hual yec de Efeso. Quijtujque pampa Pablo quihualicac Trófimo calijtic in tiopan hué, mas que amo quichíac inon. ³⁰Yojque mochi in lacalera pin caltilan cualaniloaya, molalujtihualajque, quiquitzquijque Pablo, quihuilanajque pa quiahuac in tiopan hué, huan jan ajnaxcan quintzactiquisajque in lapalujquimes.

³¹Huan quiman motoliniloaya pa quimictilosquiaya Pablo, sequin quilamachiltijque inminlaicanani hué moxtin in guaches len panujtataya, quilijque pampa mochi Jerusalén cualantinemiloaya huan tzajtztinemiloaya. ³²Yojque jan ajnaxcan quinhucac in laicanani hué sequin guaches huan se ome laicananijmes, molalujque pa temuán (temuayan) capa cualantinemiloaya. Huan quiman in judíos quinmitajque in laicanani hué huan in guaches, mocahuajque quihuitequijque Pablo. ³³Ajsic in laicanani hué, latilanic pa iguaches quiquitzquilosquiaya Pablo huan pa quilpilosquiaya ca teposli. Cuaquinon quilajlanic pampa aqui yihual huan len amo cuali quichíac. ³⁴Tzajtztijque chicahuac in lacalera, quijtujque míac, huan pampín in laicanani hué amo huil quimatiaya neli leca tzajtztinemiloaya yehuanten. Yojque quinmilic iguaches pa quihuicalosquiaya Pablo pa calijtic inmincalimes in guaches. ³⁵Huan

quiman ajsijque pa in lalejculonijmes (in escalera) ca Pablo, in guaches quiपालोaya pa quimamalosquiaya pampa in judíos niman cualaniloaya, quinectataloaya quiquitzquilo Pablo oc sejpa. ³⁶Pampín quintocaloaya in guaches, quintajztzilijtiahuiloaya: —iXicmictican!

Pablo quinnotza in lalacera pa monapatis

³⁷Jan axcan quiman yahuiloya quihuicalo pa inmincali in guaches calijtic, Pablo quinotzac in laicanani hué, quilic:

—¿Tichmacahuiltía pa nimitzilis len?

In laicanani hué quilic:

—Tehual ¿ticmati tilajtúa griego?

³⁸Cuaquín tiunca in lalac egipcio hual quipehualtic se moanalisi quipía sequin mesli. Huan quinhuicac nahui mil inminlacames inminlanechiculisli in lamictinijmes, quinhuicac ca capic amaqui chanti.

³⁹Pablo quinanquilic:

—Amo niunca in se. Nehual nilacal judío huan nilacatic pa in caltilan Tarso. In amo se caltilan tipichin nepa pin lalticpan Cilicia huan nepa nichantiaya. Xichmacahuilti pa niquinnotzas in lalacera.

⁴⁰Cuaquín in laicanani hué quimacahuiltic pa lajtusquiaya Pablo, huan yojque Pablo moquetzac pa in escalera. Quinchihuilic in judíos se lanextilisli ca imajma pa mocahuilosquiaya. Cuaquín quiman yajmo mocaquic nindeno, quinnotzac Pablo ca lajtol hebreo, quinmilic:

22 —Lacames nocnían huan notajztiztían, xijcaquican axan len nía niqijjtúa pa nimonapatis.

²Cuaquín quiman quicaquijque Pablo quinlaquetzilijtataya ca inminlajtol hebreo, yehuanten niman míac mocahuajque. ³Huan Pablo quinmilijtíac:

—Nehual nilacal israelito, nilacatic pa in caltilan Tarso pin lalticpan Cilicia. Ma yoje, nimoscaltic nican Jerusalén capa níac pin cali capa monextililo pin caltilan nican, huan Gamaliel yec nolamaxtini. Yihual nechlamaxtiaya yojque chicahuac pa nicneltocasquiaya in lajtomes hual techmacajque totajztiztían, in lajtomes hual Moisés quinmacac totajztiztían. Itequi ca mochi noyolo nimotoliniaya pa nicchiasquiaya quinami niqijtuaya Dios quinequi. Unca quinami amhuanten axan anquichijtica. ⁴Pa yina nipehuani niquitejtemuni pa niquntojtocasquiaya yehuanten hual quitocalo iojli Jesús, niquntojtocani lacames huan sihuames, niquinquitzquini huan niquntilanini pa quintzacualosquiaya pa calijtic. Jo quema, huan nicnequini pa miquilosquiaya. ⁵Yojque huil anmitzililo noje in tiopista hué huan moxtin inminabuelojmes in judíos hual huelitilo. Nechmacajque amames pa niquinhuiquilisquiaya tocnían judíos hual cate pa Damasco. Níac nepa pa niquitejtemusquiaya yehuanten hual quitocaloaya iojli Jesús. Niahuiaya niquinhuilica lailpili nican pa Jerusalén pa quincocoltilosquiaya pa yajmo quitocalosquiaya iojli Jesús.

Pablo quinpuhuilía quinami quipalac iyolo pan tonali hual in

Tata Jesús quinotzac

(Hch. 9:1-19; 26:12-18)

⁶Cuaquín cataya quiman ninejnentataya pan ojli huan amo cataya huejca in caltilan Damasco, cataya lacualispan, huan jan ajnaxcan pin cielo nechxipelatiquisac pa noitenco se laixpelalisli niman chicahuac. ⁷Nihuetzic pan lali huan nijcaquic se lajtol nechilic: “Saulo, Saulo, ¿leca tiquntojtocatica yehuanten hual nechneltocalo? Yojque tichtojtocatica

nehual.” Huan nehual nicnanquiloc: “¿Aquí tehual, Tata?”⁸ Huan nechilic: “Nehual ni Jesús in nazareteco hual tichtojtocatica.”⁹ Yehuanten hual cataloaya ca nehual quitajque in laixpelalisli. Ma yoje, amo quicaquijque in lajtol hual laquetzaya ca nehual.

¹⁰ Cuaquín niquilic: “¿Len nicchías, Tata?” Huan in Tata nechilic: “Ximoquetza, xía pa Damasco, huan nepa mitzilisi mochi hual ticpías pa ticchías.”¹¹ Huan yojque chicahuac cataya in laixpelalisli, amo huil nilachiaya. Pampín nechquitzquilije nomajma huan nechhuicaje pa Damasco yehuanten hual cataloaya ca nehual.

¹² Huan cataya se lalac itoca Ananías nepa Damasco. Yihual yec lalac hual itequi lamiaya quichía mochi hual quijtúa tolajtol tehuanten in judíos, huan quijtuloaya moxtin in judíos hual umpa chantiloaya pampa in Ananías yec lalac cuali.¹³ Hualac capa nehual in Ananías, ajsic huan nechilic: “Nocni Saulo, tía tilachía oc sepa jan axcan.” Huan jan axcan nilachíac huan niquitaya yihual.¹⁴ Cuaquín nechilic: “In Dios hual quimolancuacuetziliniijme totajtzitzían mitzljaltultic tehual pa yina pa ticmatis len yihual quinequi pa tehual ticchías. Mitzljaltultic pa tiqitas Jesús hual unca melahuac pa iyolo, huan tiquitac. Mitzljaltultic pa tijcaquis ilajtol mitzlaquetzilijtica huan tijcaquic.¹⁵ Mochi inon mitzpanuc pampa Dios quinequi pa tiquinmilis mochi lacames in hual tiquitac huan tijcaquic.¹⁶ Huan axcan, ¿leca tihuejcahua? Axan ticpía mochi hual monequi. Ximoquetza huan xicaya lacuayatequili, xicnotza toTata Jesús pa mijchihuailis molaijlaculisli.” Inon nechilic Ananías.

**Pablo quinmilía quinami
Dios quitilanic pa yehuanten
hual amo judíos**

¹⁷ Cuaquín cataya quiman nimocuepac ca niquic pa Jerusalén

huan se tonali niclajlantataya Dios pin tiopan hué, nilaxotocac.¹⁸ Niquitac in Tata Jesús huan nechilic: “Xiejsehui xiquisa nican Jerusalén, amo xihuejcahua, pampa yehuanten nican amo quineltocasi len tiquinmilis nonahuac nehual.”¹⁹ Huan nehual niquilic: “Tata, ¿amo nechcaquisi? Yehuanten quimatilo pampa nehual niquintzacuani pa calijtic yehuanten hual mitzneltoaloaya, huan niquinhuitequini pin tiopajmes.²⁰ Huan quiman quimictije Estéban hual quinahuatijtinemini molajtol, yojque nepa ca yehuanten nicataya huan nicnequiaya pa quimictilosquiaya. Noje niquinlachilic inmintzotzomajli yehuanten hual quimictitaloaya.”²¹ Ma yoje, Jesús nechilic: “Xía, pampa nimitztilanis huejca pa yehuanten hual amo judíos.”

²² Jan ca niquic san quicaquiloaya Pablo, huan quiman quinmilic inon inminahuac yehuanten hual amo judíos, tzajtzijque chicahuac, quilijque: —iMa miqui in se! iAmo unca iyaxca pa yultías!

**Pablo ca inminlaicanani
hué in guaches**

²³ Tzajtziloaya huan quinquixtiloaya inminahuas, quintzejtelujtataloaya, yojque quilasaloaya lalpotocli pin ijyecal.²⁴ Cuaquinon lalilanic in laicanani hué pa quihuicalosquiaya Pablo pa inmincali in guaches calijtic, quinmilic pa quihuitequilosquiaya. Quijtuaya in laicanani hué pampa yojque momachiltilosquiaya leca tzajtziloaya in judíos pa quimictilosquiaya Pablo.²⁵ Ma yoje, quiman quilpiliijque imajmajuan huan icxihuajmes pa pehuilosquiaya quihuitequilo, Pablo quinotzac in laicanani nepa moqueztataya, quilic: —¿Tehual unca moyaxca pa ticuitequis se lalac romano hual ayamo

latilanije in huelitiniymes pa yes lacocöltili?

²⁶Quiman quicaquic inon, uyac in laicanani capa cataya in laicanani hué, quilic:

—Quita. ¿Len tía ticchihua? In lacal se romano.

²⁷Hualac ca Pablo in laicanani hué, quilic:

—Xinechili, ¿tehual tilacal romano?

Pablo quilic:

—Jo quema.

²⁸In laicanani hué quinanquilic:

—Nehual nilacal romano huan niclaxlahuic míac tomin pa yojque inon yes noyaxca.

Huan Pablo quilic:

—Nehual nilacatic romano.

²⁹Jan ajnaxcan mijcuanijque yehuanten hual yahuiloaya quihuitequilo Pablo. Huan momajtiaya in laicanani hué noje quiman quimatic pampa Pablo yec lacal romano, pampa yihual quinmilic pa quilpilosquiaya huan quilpijque.

Pablo inminlaixpan inminla'ajuanijmes in judíos

³⁰Cuaquín mostatica quimacahuac Pablo in laicanani hué pampa quinequiaya quimati neli leca quimotexpahuילוaya Pablo in judíos. Latilanic pa monechiculosquiaya in tiopistas huejué ca moxtin in Lanechiculisli Hué. Cuaquinon in laicanani hué quihuicac Pablo pa latzindan huan quilalic ca yehuanten.

23 Cuaquín, quiman Pablo mocahuaya quiztataya in lacames pin Lanechiculisli Hué, quinmilic: —Lacames nocnían, mojmosta pa yina huan pa axan niyuli ca mosehuilisli ilaixpan Dios, amo nechmotexpahuilía noyolo ilajmatilisli inahuac len unca cuali huan amo cuali.

²Huan in tiopista hué itoca Ananías quinmilic pa quitecualosquiaya Pablo pa icamac yehuanten hual

moquezataloaya inahuac yihual.

³Cuaquinon Pablo quinotzac in tiopista hué, quinanquilic:

—iTehual timochijtica quinami lacal niman chipahuac! iDios yahui mitztecuca tel! iNepa tiyehuatica pa tilajlanis quinami quijtúa tolajtol! Huan ¿leca tiquinmilía pa nechtecuaasi? iTolajtol amo quimacahuilítia inon!

⁴Yehuanten hual nepa moquezataloaya quilijque:

—Tiquihuejuecaltitica in tiopista hué hual Dios quilajtultic.

⁵Pablo quinnanquilic:

—Nocnían, amo niquislacuhuaya pampa yihual yec in tiopista hué, pampa Dios ilajtol lajcuiluli quijtúa: “Amo xiquijtu len amo cuali hual cajuas se hual huelitía capa amhuanten.”

⁶Cuaquín quitac Pablo quinami sequin pin Lanechiculisli Hué quitocaloaya ilamaxtilisli in saduceos huan in oc sequin quitocaloaya ilamaxtilisli in fariseos. Pampa in quitzajtzilic ca lajtol chicahuac yehuanten pin lanechiculisli, quinmilic:

—Lacames nocnían, nehual nifariseo huan yec fariseo notajtzin. Nechmotexpahuilijticcate pampa nehual nicchixtica in tonali quiman tiyulisli oc sejpa ca tocuerpos quiman timiquilo.

⁷Yojque, pampa Pablo quijtuc inon, peshualoaya molaxililo lajtol in fariseos huan in saduceos, yajmo cataloaya ca se lajtulisli yehuanten. ⁸Cataya pampa quijtulo in saduceos in mijquimes amo yulilo oc sejpa, huan quijtulo pampa amo cate lanahuatinijmes pin cielo huan ijyecames cuajcuali huan amo cuajcuali. Huan quineltocalo in fariseos mochi innojen. ⁹Pampín pehuac se cualanilisli niman hué pin Lanechiculisli Hué huan cuaquinon moquetzajque sequin lamaxtinijmes hual yeje fariseos, quinmilijque chicahuac:

—Amo tiqitalo nindeno amo cuali ca in lacal. Sinda cuajnesi se espíritu

o se ilanahuatini in cielo laquetzac ca yihual, amo quichihuilfa nindeno amo cuali ipan tolajton inon.

¹⁰Huan mochihuaya in cualanilisli niman chicahuac. Pampin momajtiaya in laicanani hue pampa huejtica yahuiloaya quicocoltilo Pablo niman miac. Yojque quinmilic pa temusqui in guaches pa quiquixtililosquiaya Pablo capa yehuanten huan pa quihuicalosquiaya pin inmincalimes in guaches. ¹¹Huan mostatica pa layua nestic in Tata ca Pablo, quilic:

—Amo ximomajti, pampa tia ticnahuatia nolajtol nehual pin caltilan hue Roma quinami noje ticnahuatia pa Jerusalen.

Quichihualo se lajtulisli pa quimictisqui Pablo

¹²Mostatica quichihuajque in judios se lajtulisli pa quimictilosquiaya Pablo, molijque ilaixpan Dios, quilijque:

—Ma Dios techtilani pa ticayasqui lacocoltili sinda tilacualo o sinda tilaunilo sinda ayamo ticmictijque in Pablo.

¹³Yojque quijtujque ilaixpan Dios quinami ompuhuali (cuarenta) lacames ca se ome oc sequin lacames hual monechicujque pa quichihuasqui in lajtulisli chicahuac. ¹⁴Cuaquin uyajque pa in tiopista hue huan inminabuelojmes in judios, quinmilije:

—Axan tiquijtujque ilaixpan Dios pa yihual techtilanis pa ticayasqui lacocoltili sinda tilacuasi o sinda tilaunisi sinda ayamo ticmictijque Pablo.

¹⁵Axcan, amhuanten huan yehuanten in Lanechiculisli Hue ximachiltican inminlaicanani hue in guaches pampa anquinequi anquilajlanila Pablo mochi inon oc sejpá huan niman cuali. Xictemachican in laicanani hue pa quihualicas Pablo ca amhuanten. Huan tehuanten ticayasqui lachijchihuali pa ticmictisi Pablo quiman ajstitualas.

¹⁶Ma yoje, quicaquic inon ixolol lacal icni sihual Pablo pampa yahuiloaya quimictilo Pablo. Pampin uyajtiquisac pa inmincali in guaches capa Pablo cataya latzacuali, calaquic, quilamachiltic Pablo. ¹⁷Huan Pablo quinotzac pa hualas se ilaicanani in guaches, quilic:

—Xicuica in oquixli pa in laicanani hue, pampa quipia len pa quilamachiltis.

¹⁸Yojque in laicanani canac ixolol icni sihual Pablo, quihuicac ca in laicanani hue huan quilic:

—In latzacuali Pablo nechnotzac pa nihualas ca yihual, nechtemachic pa nimitzhualiquilis in oquixli pampa yihual quipia len pa mitzilis.

¹⁹Yojque canac in laicanani hue imajma in oquixli, huan yihual mohuicajque pa capa cataloaya inminhuian, quilajlanic:

—¿Len unca inon hual ticpia pa tinechmachiltis?

²⁰In oquixli quilic:

—Axan quichihuaje se lajtulisli in judios huan yalo mitztemachilo pa ticuicas Pablo mosta pa latzindan pa icali in Lanechiculisli Hue, quil, pa momachiltisi oc sejpá niman cuali inahuac inon hual quimotexpahuiljticate, quil. Ma yoje, islacatilo. ²¹Pampin, tehual amo xicchia quinami quinequilo, pampa cate quinami cuarenta y se, ome lacames yalo anmitzmolatililo pan ojli pa quimictisi Pablo. Quijtuje chicahuac ilaixpan Dios pa quintilanis capa cayasqui lacocoltili sinda lacualo o launilo sinda ayamo quimictije Pablo. Huan axcan cate lachijchihuali huan lachixicate pa ticchias quinami quinequilo.

²²Yojque, quilic chicahuac in laicanani hue ixolol icni sihual Pablo, quilic:

—Amo xiquili amaqui len tilamic tinechlamachiltic.

Quitilanía Pablo ca in lactal hual huelitía

²³Cuaquinon quinnotzac
inminlaicanani hué in guaches ome
laicananijmes pa hualasqui ca yihual,
quinmilic:

—Xiquinpiacan guaches lachijchihuali
pa chicnahui (nueve) horas pa layúa
pa yasi pa Cesarea. Anquinmanas
dos cientos guaches hual nejnentiasi,
setenta guaches hual lejcutiasi pan
caballos huan dos cientos guaches
hual quinpixtiasi inminteposlimes pa
moanalisli.

²⁴Noje latilanic pa
quinmanalosquiaya ome caballos pa
Pablo noje lejcusquiaya. Latilanic pa
quihuicasqui quiyahualujticate pa
mochi ojli, huan yojque ajsilosquiaya
ca in lactal itoca Felix in huelitini hual
cataya pa Cesarea. ²⁵Noje in laicanani
hué quitilanilic in lactal hual huelitiaya
se amal ca yehuanten, huan yojque
quijtuc in amal:

²⁶“Claudio Lisias pa in lasojli Tata
Huelitini Félix, nimitzpialtía.

²⁷In lactal quiquitzquije in judíos
huan yahuiloya quimictilo quiman
nihualajtiquisac ca noguaches,
niquinquixtilic yehuanten quiman
nicmatic yihual lactal romano.

²⁸Nicnequiaya nicmati in amo cuali
hual quichíac hual pampa inon
quimotexpahuililoaya. Pampín nicuicac
inminlaixpan inminLanechiculisli
Hué in judíos. ²⁹Nepa niquitac
pampa quimotexpahuililoaya inahuac
len lajtol hual quijtúa quinami
quimolancuacuetzililo inminDios.
Amo quimotexpahuililoaya ca len
monotzaya pa quimictilosquiaya o
pa quitzacualosquiaya pin calijtic.

³⁰Huan quiman nechmachiltijque
pampa quichihuajque se lajtulisli pa
quimictilosquiaya in lactal pan ipampa
lacuajcuamanalisli, cuaquín jan axcan

nictilanic ca tehual. Noje nilatilanic
pa quimotexpahuilisqui pa molaixpan
yehuanten hual quimotexpahuililo.
Xicaya cuali.”

Yojque quijtuc in amal.

³¹Yojque, in guaches canajque Pablo
quinami quinmilic in laicanani hué,
quihuicajque pa layúa pa Antípatris.

³²Mostatica yajtiajque ca Pablo in
guaches hual lejcutiahuiloya ca
caballos huan mocuetiahuiloya in
oc sequin guaches pa inminalimes
in guaches pa Jerusalén. ³³Huan
in guaches ca caballos ajsijque pa
Cesarea huan quimacajque in amal
in lactal huelitini (governador), noje
quitemacajque Pablo ca yihual.

³⁴Yojque, quiman Felix, in huelitini,
lamic momaxtic in amal, quilajlanic
Pablo pa calía lalticpan lacatic. Pablo
quinanquilic pampa cataya pin
lalticpan Cilicia. ³⁵Cuaquín Felix quilic:

—Nijcaquis len ticpías pa tiquijtus
quiman hualasi yehuanten hual
mitzmotexpahuililo.

Cuaquín latilanic pa
quilachililosquiaya Pablo pa icalí hué
hual itoca iPretorio Herodes.

24 Panujque macuili tonalijmes,
huan temujque pa Cesarea
Ananías in tiopista hué ca sequin
inminabuelojmes in judíos huan se
itoca Tértulo. In Tértulo yec licenciado.
Yehuanten quimotexpahuilijque Pablo
ca Felix in huelitini. ²Quinahuatijque
pa hualasquiaya Pablo. Hualac Pablo,
huan Tértulo pehuac motexpahuic ca in
lactal Felix, quilic:

—Lasoji Félix, pa tehuanten
unca mosehuilisli mojmosta huan
tipaquilo pampa axan mochíac
niman cuali tolali. ³Tihuelitía
cuali ca mochi huan pa mochi
cajcapa pan ipampa molajmatilisli
tehual. Ticanalo mochi inon pampa
tehual titejchiuilía. Huan pampín
timijsehuilo míac, Tata Huelitini. ⁴Ma

yoje, pa camo nimitzmaca m'iac tequil, nimitztemach'ia pa tichcaquis jan nadita san, quinami tehual mojmosta tilachihuil'ia cuali. ⁵Unca pampa tiquitajque in lalca unca quinami se cocolisli. Amo mocahua quimacatinemi tequil pa yajmo cayasi ca se lajtulisli in jud'fos cajcapa yes chantilo pa mochi in lalticpan. Yihual ilaicanani ilamaxtilisli in Jes'us hual chantini pa Nazar'et, inminlanechiculisli in nazarenos. ⁶Yihual noje motolintataya pa quijlacusquiaya totiopan hu'e huan pamp'in tijquitzquijque. Ticnequiloaya ticchihuililo quinami quij'tua tolajtol. ⁷Ma yoje, hualac Lisias inminlaicanani hu'e in guaches huan ca niman m'iac chicahualisli techquixtilic in se. ⁸Quijtuc pampa yehuanten hual quimotexpahuililoaya se quipialoaya pa hualasi ca tehual. Huan sinda ticlajlanis tehual, huil ticmati unca melahuac mochi in hual ticmotexpahuilijtcate.

⁹Huan in jud'fos hual nepa cataloaya noje quijtujque pampa cataya yojque quinami quij'tuc T'ertulo. ¹⁰Cuaquinon in lalca Felix quichihuilic lanextilisli Pablo pa lananquilisquiaya, huan Pablo quilic:

—Nikmati pampa tehual tihuelitiaya pa tolali axan pa m'iac xixihuil. Pamp'in nicp'ia paquilisli pa nimitzilis len nicchijtataya quiman nechquitzquije. ¹¹Jan quip'ia quinami doce tonalijmes san quiman nipanquisac pa Jerusal'en pa nicmolancuacuetzilisquiaya Dios. Tehual huil ticmati unca neli inon. ¹²Yehuanten amo nechitaje niquinlaxilijtataya laj'tomes, amo nechitaje nicchijtataya xahuanilisli pa niquncualantis pin tiopan hu'e huan amo pa oc sequin tiopajmes pin caltilan. ¹³Huan yehuanten amo quimatilo nindeno calica huil mitznextilisli da unca neli inon hual nechmotexpahuililo. ¹⁴Jan nimitzil'ia

neli inon, nicmolancuacuetzil'ia iDios totajtzitzi'an, nictoca iojli Jes'us, in ojli hual innojen lacames quij'tulo unca se ojli ca lamaxtilisli amo cuali. Huan niquinneltoca mochi innojen hual unca lajcuiluli pa iamames tolajtol huan pin amames hual quinmijcuilujque ilajtunijmes toDios. ¹⁵Niyuli nicchixt'ia pa Dios tejchihuilis len yihual quilic neli, yojque quinami quichialo in lacames nican. Huan yojque nicchixtica pampa Dios yahui quinyulilt'ia oc sejp'a yehuanten hual miquije. Yahui quinyulilt'ia yehuanten hual quineltocalo huan yehuanten hual amo quineltocalo. ¹⁶Pamp'in nimotolin'ia pa nicch'ias len Dios quita cuali huan len quitalo cuali lacames. Nicch'ia inon pa camo nechmotexpahuilis noyolo nindeno. ¹⁷Axan quip'ia nahui, macuili xixihuil amo nicataya pin Jerusal'en. Huan quiman niajsic nepa quip'ia doce tonalijmes, nicpiaya len pa niquinmacasquiaya nocn'ian jud'fos hual amo quipialoaya pa molacualtis. Noje niahuiaya niclali se huendi pin tiopan hu'e. ¹⁸Nechitaje pin tiopan hu'e sequin jud'fos hual chantilo pin lalticpan Asia. Nechitaje nicchijtataya innojen lachihualisli, nimochipajtataya quinami quij'tua tolajtol. Amo cataloaya lalalera ca nehual huan amo nicchijtataya xahuanilisli. ¹⁹In jud'fos asiaticos, innojen cate hual quipialoaya pa nechmotexpahuililosquiaya pa moixpan sinda quij'tulo pampa nicchihuaya len amo cuali. ²⁰O yehuanten nican ma quij'tucan len amo cuali quitaje nicch'iac quiman nimoqueztataya inminlaixpan yehuanten pa inLanechiculisli Hu'e in jud'fos. ²¹Cuajnesi quinequilo quij'tulo pampa nicch'iac len amo cuali quiman nitzajtzic nimoqueztataya capa yehuanten, niquintzajtzilic: "Annechmotexpahuilijtica axan pampa nicneltoca yalo yulilo oc sejp'a yehuanten hual miquilo", niquinmilic.

²²In Félix quimatiaya m'ac inahuac ilamaxtilisli iojli Jesucristo. Yoique, quiman quicaquic inon, mocahuac pa lajlans huan quilamic in lanechiculisli, quinmilijtica:

—Quiman hualas in laicanani hué Lisias, cuaquín annimitzilis quinami niquita anmotexpahuilisli.

²³Cuaquinon Félix quilic in laicanani pa quilachilosquiaya Pablo in guaches. Noje quilic pa quimacahuiltisquiaya Pablo pa quichiasquiaya len quinequisquiaya quichía, san amo huil quisaya pa quiahuac in cali. Huan quilic pa camo quitzacuulisquiaya ilajlasojli Pablo hual quinequiaya quipaxaluili o quichihuili len yes cuali.

²⁴Cuaquín, quiman panujque sequin tonalijmes, hualajque Félix huan isihua itoca Drusila, yihual yec judía. Quinahuatic Félix pa hualasquiaya Pablo pa huil quicaquisquiaya len Pablo quilaquetzilisquiaya pa quimatisquiaya quinami se quineltocha Cristo. ²⁵Huan quilaquetziliaya Pablo quinami lacames quipialo pa yesqui melahuac pa inminyolo quinami Dios unca melahuac. Quilaquetziliaya quinami quinequi Dios pa timotzacuilisqui pa camo ticchihuasqui in amo cuali. Quiliaya noje pampa Dios yahui quintojtoca pa quisas ilaixpan yihual yehuanten hual amo quineltocho. Pampín pehuaya momajti Félix, quilic:

—Xía nuso axan. Quiman nicpía oc se tonali nimitznotzas pa tihualas ca nehual.

²⁶Noje Félix amo mocahuac pa quichiasquiaya pa Pablo quimacahasquiaya tomin pa yoique quimacahuasquiaya. Pampín Félix quinahuatiaya m'ac tonalijmes pa hualasquiaya Pablo pa laquetzasquiaya ca yihual. ²⁷Huan yoique panujque ome xixihuili. Cuaquinon quijcuanijque Félix, yajmo yec lalac hual huelitiaya. Ja umpa quitocac yihual pa huelitis

se hual itocaya Porcio Festo. Yihual in huelitini yancuic. Ma yoje, quiman quisaya Félix pa yajmo huelitisquiaya, quinequiaya quinchihuili len hual quixtocaloaya in judíos. Pampín quicahuac Pablo latzacuali calijtic.

Pablo ilaixpan Festo

25 Cuaquinon ajsic Festo pa Cesarea, pehuac yec lalac huelitini pin lalticpan Judea huan quiman panujque ye tonalijmes, quisac nepa Cesarea pa panquisasquiaya pa Jerusalén. ²Nepa quitaloaya in tiopistas huejué huan inminhueyenten in judíos. Yehuanten quilamachiltijque pampa quimotexpahuililoaya Pablo, pehuajque quitemachijque Festo pa quinchihuilisquiaya cuali. ³Quinequiloaya pa quitilansquiaya Pablo pa Jerusalén. Huan umpa pan ojli sequin judíos yahuilaloaya quinapachilo pa quimictilosquiaya quiman panuaya. ⁴Ma yoje, quinnanquilic Festo, quinmilic:

—In Pablo yahui mocahua latzacuali pa Cesarea, huan nehual amo nía nihuejchahua pa nimocuepac ca umpic. ⁵Pampín, yehuanten hual quipialo in lahueliltilisli capa amhuanten ma temucan ca nehual pa Cesarea. Cuaquinon sinda unca len amo cuali hual quichíac in lalac, nepa ma quimotexpahuilican.

⁶Mocahuac in Festo nepa pa Jerusalén jan se ocho o diez tonalijmes san, cuaquinon mocuepac pa Cesarea. Nepa ajsic huan mostatica molalic pa iicpali hué in lalac hual huelitía, latalanic pa canalosquiaya Pablo. ⁷Quiman hualac Pablo, moquetzajque itenco moxtin in judíos hual quisajque ca Festo nepa Jerusalén huan temujque pa Cesarea. Quimotexpahuilijque Pablo ca m'ac lachihualisli amo cuajcuali huan huejué. Ma yoje, amo huil quinextiloaya yehuanten sinda

quijtuloaya melahuac. ⁸Cuaquín Pablo lajtuc pa quinnextilisquiaya pampa amo quichíac nindeno amo cuali, quinmilic:

—Amo nicchíac nindeno hual inminlajtol in judíos amo techmacahuiltía pa ticchihuasi. Amo nicchíac nindeno amo cuali pin tiopan hué, amo nicchíac nindeno hual ilajtol in hué romano amo techmacahuiltía pa ticchihuasi.

⁹Festo quinequiaya quinchihuili len hual quinnextilisquiaya in judíos pampa yihual quinequisquiaya quinquailti. Pampín quilajlanic Pablo, quilic:

—¿Ticnequi tipanquisa pa Jerusalén, pa nimitzcaquis umpa quinami tilananquilis inahuac inon calica mitzmotexpahuililo?

¹⁰Huan Pablo quilic:

—Nimoqueztica inminlaixpan in huelitini romano hual quipía ilahueliltilisli in hué nepa Roma. Unca nican capa nicpía pa niyes lacaquili huan amo pa Jerusalén. Yojque unca quinami quijtúa in lajtol. In judíos amo niquinchihuili nindeno amo cuali, quinami tehual noje ticmati cuali. ¹¹Sinda nicchíac len hual nechahuilía pa nimiquis, cuaquín amo nimonapatis, ma nechmictican. Ma yoje, sinda amo unca melahuac len quijtulo nechmotexpahuilijtcate, cuaquín amaqi huil nechtemaca ca yehuanten. Nehual nimotemacas ca Cesar inminhué in romanos, nicnequi pa yihual nechcaquis.

¹²Cuaquín laquetzac Festo ca ilacames ilanechiculisli, huan cuaquín quinanquilic Pablo, quilic:

—Ticnequi timotemaca ca Cesar in hué. Pampa inon, ca Cesar tías.

Festo quilaquetzilía in hué Agripa quinami quimotexpahuililo Pablo

¹³Panujque sequin tonalijmes, hualajque pa Cesarea inminhué in

judíos hual itocaya Agripa huan icni sihual itocaya Berenice, hualajque pa quipialtisqui in hué lalac Festo.

¹⁴Quiman cayajque nepa sequin tonalijmes, Festo quilaquetzilic Agripa quinami quimotexpahuililoaya Pablo, quilic:

—Unca se lalac latzacuali hual Félix quicahuac nican quiman quisac pa yajmo yes huelitini. ¹⁵Quiman níac pa Jerusalén, quimotexpahuilije in tiopistas huejué huan inminabuelojmes in judíos, quitemachijtataloaya pa nictilanisquiaya pa miquis.

¹⁶Yehuanten niquinnanquilic pampa tolajtol tehuanten romanos amo quimacahuiltía pa quitilanisi se lalac quinami quinequilo yehuanten hual quimotexpahuililo. Romanos —quilic Festo—, quipehualtilo in lajlanilisli quimacatica tonali pa moitasi lanechiculi yehuanten moxtin, pa cayas in se inminlaixpan yehuanten hual quimotexpahuililo. Yojque in se huil monapatía de len quimotexpahuililo.

¹⁷Pampín tihualaje ca niquic huan amo nihuejcahuac pa nicpehualtis in lajlanilisli. Cataya mostatica nimolalic pa noicpali pa la'ajuani huan nilatilanic pa canasi in lalac.

¹⁸Huan quiman moqueztataloaya in lalac inminlaixpan yehuanten, amo quimotexpahuilijque ca nindeno hual niquijtuaya yehuanten yahuiloaya quimotexpahuililo. Amo cataya len quinami se hué lachihualisli amo cuali.

¹⁹Jan quimotexpahuililoaya inahuac len quinami quimolancuacuetzililo inminDios san. Laquetzataloaya inahuac se hual itoca Jesús hual miquic, huan quijtúa Pablo neli pampa yuli. ²⁰Yojque nehual amo nicmatiaya quinami huil niclajlanisquiaya len quinami inon. Pampín niclajlanic Pablo sinda cuajnesi quinequiaya yahui pa Jerusalén, pa umpa yesquiaya lacaquili inminyampa yehuanten. ²¹Ma

yoje, quilic Pablo pampa yahuiaya motemaca ca in hué Cesar pa yihual quicaquisquiaya quinami Pablo yahuiaya monapati. Cuaquín nilatilanica pa quipialosquiaya nican. Quiman panusi sequin tonalijmes huil nictilanica ca Cesar Augusto in hué.

²²Agripa quinanquilic Festo, quilic:

—Nehual noje nicnequisquiaya nijcaqui len quijtúa in lalac.

Festo quilic:

—Mosta tijcaquis lajtus.

²³Yojque mostatica hualajque Agripa huan Berenice in omente lalaquentili cualtichin, huan quintocatihualaloaya moxtin oc sequin cualtichin se itepotzcon oc se. Calaquijque pa se calijtic hué capa monechicunijme in huejueyenten. Calaquijque ca yehuanten in inminlaicananijmes huejué in guaches huan inminhuejueyenten in caltilan Cesarea. Cuaquinon latilanic Festo pa quihualicalosquiaya Pablo. ²⁴Quiman ajsic Pablo, cuaquín Festo quinmilic:

—Hué Agripa huan anmoxtin lacames hual anuncia nican ca tehuanten, anquiztica in se hual inahuac yihual moxtin in judíos pa Jerusalén huan nican nechlaquetzilije. Quimotexpahuililoaya huan quilijtinemiloaya pampa yajmo unca iyaxca pa yultías. ²⁵Ma yoje, nehual amo niquitiliaya se lachihualisli amo cuali hual cahuiluaya pa yes latilanic pa miquis. Jan yoje yihual ihuían quinequiaya motemaca ca in hué Cesar pa yihual quicaquiltisquiaya. Pampín nimolalic pa nictilanisquiaya in lalac ca in hué. ²⁶Ma yoje, nican neli nimoitas amo nicmaztica len lajtol pa niquijcuiluilis in Tata Hué Cesar pa nicmachiltis leca nictilanijtica ca yihual. Pampa inon nicualica in se pa anmolaixpan pa anquicaquis. Huan pa molaixpan, Hué Agripa, nicualica ca niman míac lanequilisli pa yojque,

cuajnési quiman ticlajlanis yihual, nehual nicpías len niquijcuiluilis in hué Cesar leca nictilanilijtica in lalac. ²⁷Niquijtúa inon pampa niquijtúa ninesis quinami se hual amo laijnamiqúa cuali sinda nictilanis se lailpili ca in hué huan amo huil niclamachiltía ca lajtol neli leca quimotexpahuilijticate in judíos.

Yojque quijtuc Festo.

Pablo ilaixpan in hué Agripa

26 Cuaquinon Agripa quilic Pablo:

—Timitzmacahuiltiticate pa timonapatis tehual, xilajtu.

Cuaquinon quixilanic Pablo imajma, quichíac lanextilisli, pehuaya lajtu yojque, quinmilic:

²—Tata Hué Agripa, nimoiztica ca paquilisli axcan pampa tichmacahuiltitica pa nimonapatis pa molaixpan inahuac mochi inon hual nechmotexpahuilijticate in judíos. ³Huan amo in san. Noje nicpía paquilisli pampa tehual tiquinmati mochi innojen lachihualisli huan innojen lajtomes hual quinneltocalo in judíos, huan ticmati mochi hual inahuac inon molaxililo lajtomes. Pampín nimitztemachía pa tichcaquis huan pa camo tisiahuis quiman tichcactica.

Pablo quinmilía quinami yulini quiman ayamo quiximatic Cristo

⁴Moxtin in judíos —quilic Pablo—, quimatilo quinami niyulini quiman nicataya muachito huan quiman nimoscaltitataya. Quimatilo inon yehuanten hual yulilo capa nilacatic huan quimatilo yehuanten hual yulilo pa Jerusalén. ⁵Sinda quinequiloaya mitzililo, huil mitzililoaya pampa nehual nifariseo huan niyulini quinami yulilo in fariseos. Quichihualo in fariseos quinami monequi pa

quichihuasi innojen lachihualisli hual cate quinami ticmolancuacuetzililo Dios. Amo yojque m'íac quichihualo in oc sequin jud'íos. ⁶Huan axcan nechmotexpahuilijtcate. Huan ¿leca? Unca pampa nicchixtica inon hual Dios neli quinmilic totajtzitz'ían pampa yihual yahuiaya quinmaca. Huan inon unca hual nicchixtica, Dios yahui quinyulilt'ía in mijquimes. ⁷Huan inon quichixticate moxtin inminmiahuimes in doce totajtzitz'ían tehuanten hual ilacames Israel, quichixticate pampa quinequilo yulilo oc sejpa. Pamp'ín quimolancuacuetzililo Dios huan quitequipanuililo yihualitonali, pa semilhuil huan pa layúa. Huan Tata Hué Agripa, nehual noje nicchixtica Dios yahui nechyulilt'ía. Huan pampa in, in jud'íos nechmotexpahuilijtcate axcan, in nimitzil'ía Tata Hué Agripa. ⁸Huan ¿leca anquijt'ía lajtic amhuanten pampa Dios amo quip'ía chicahualisli pa quinyuliltis yehuanten hual miquije?

**Pablo quijt'úa quinami
quintojtocani in laneltocanijmes**

⁹Nehual, amo quip'ía m'íac xixihuil quiman niqijituni pampa nicpiaya pa niqinchihuilisquiaya m'íac amo cuali yehuanten hual quineltocalo Jesús in nazareteco. Nicnequiaya pa yajmo laquetzalosquiaya len lajtol inahuac yihual. ¹⁰Nic'h'íac inon pa Jerusalén. Niquintzacuac m'íac ilaneltocanijmes pa calijtic, nicanac inminlatilanilisli in tiopistas huejué. Huan noje, quiman latilaninijme pa yesquiaya lamictili se laneltocani, nehual noje niqinmacani nolajtol pa yesquiaya lamictili. ¹¹Huan pa mochi in tiopajmes cataloaya m'íac tonalijmes quiman niquincocoltini in laneltocanijmes, niqinchihualtini lahuejuecaltilisli pa quijtusi pampa Jesús amo unca Dios. Nicualanini ca yehuanten niman chicahuac, quema,

huan niahuini pa oc sequin caltilan pa niquintojtocasquiaya.

**Pablo quinquihuil'ía oc sejpa quinami
pehuac quineltocac Cristo**

(Hch. 9:1-19; 22:6-16)

¹²Yojque nicchijtinemini huan cataya se tonali niahuuiaya pa Damasco pa niqinquitzquisquiaya moxtin laneltocanijmes nepa pa niqinhuicasquiaya lailpili pa Jerusalén. Nicpiaya se amal pa nicchiasquiaya inon ca ilahueliltisli in tiopista hué. ¹³Cataya lacualispan, Tata Hué Agripa, huan niquitac se lahuilisli niman chicahuac, laixpelatiquisac pin cielo. Amo quiman huil lahui in tonali quinami in lahuilisli. Nechixpelac notenco huan quinmixpelac yehuanten hual yahuiyoaya ca nehual. ¹⁴Timoxtin tihuetzije pan lali huan nehual nijcaquic se lajtutataya ca lajtol hebreo, nechilic: "Saulo, Saulo, ¿leca tiqintojtocatica yehuanten hual nechneltoocalo? Yojque tichtojtocatica nehual. Unca len chicahuac pa tehual. Tiquinami se buey hual quitecua in latzopinijquil ca icx'ian." ¹⁵Huan niqulic: "¿Aqui tehual, Tata?" Huan in Tata nechilic: "Nehual niJesús hual tichtojtocatica. ¹⁶Axan, ximoquetza ca mocxihuajmes. Nimitzmonextilic tehual pampa nimitzljaltultic pa tichtequipanuilis. T'ía tiquinlaquetzilijtinemi lacames in quinami tichitac axcan. Noje tichitas ca oc sequin tonalijmes huan ticp'ías pa tiquinlaquetzilis lacames hual nimitznextilis umpa. ¹⁷Nimitzquixtilis pin polehuilisli quiman tiunca ca jud'íos huan ca yehuanten hual amo jud'íos pa camo mijchihuilisli len quinequisi mijchihuilisli. ¹⁸Unca ca yehuanten hual amo jud'íos capa nimitztilanis pa quimatasi len quinequi quijt'úa Dios ilajtol. Nimitztilanis pa tiquinmilis pa mocahuasi pa canasi iojli laticumac Satanás, pa tiquinmilis pa canasi iojli

Dios capa lajtica, pa camo quineltochasi Satanás huan pa quineltochasi Dios. Nimitztilanis ca yehuanten pa tiquinmilis pampa Dios quinquipuhuas yehuanten inminlajlaculisli. Yojque quipiasí in hual nía niquinmaca moxtin yehuanten hual niquinlajultía, hual nechneltochalo.” Inon nechilic Jesús.

Pablo quineltocha len quilic Jesús

¹⁹Yojque, Tata Hué Agripa, nicneltochac len nechilic Jesús quiman nechnotzac nepa pin cielo. ²⁰Jo quema, nipehuac niquinlaquetziliztataya yehuanten hual chantiloaya pa Damasco in hual niquitac. Niquinmilic pa quipalalosquiaya inminyolo pa pehuasi laijnamiqusi quinami yihual Dios huan pa canalesquiaya iojli Dios. Niquinmilic pa quichihualosquiaya len quinnextilisquiaya moxtin pampa axan quipalaje inminyolo. Cuaquín, panuc inon, niccháac yojque pa Jerusalén, cuaquinon pa mochi in lali Judea. Noje niquinmilic inon yehuanten hual amo judíos. ²¹Pampín nechquitziquije in judíos pin tiopan hué, motoliniloaya pa nechmitilosquiaya. ²²Ma yoje, nechpalehuiaya Dios nepa in tonalijmes huan axan nican. Yoje in tonali niyuli niquinlaquetziliztía in lamachiltisli cuali ca lacames tijtipichin huan lacames huejué. Jan niquinmilía san inon hual Dios ilajtunijmes huan Moisés quijtunijme pa yina pampa yahuiaya panu. ²³Quijtunijme pampa quipiaya panusquiaya lacocotilisli in Cristo, quipiaya pa miquisquiaya. Quijtunijme pampa yihual yesquiaya hual quipehualtiaya moxtin hual miquije huan mocuepaje yulije pa camo miquisi oc seja. Yojque Cristo quinnextilisquiaya in judíos huan yehuanten hual amo judíos pampa neli yulisi oc seja yehuanten hual miquilo. Inon unca in lanahuatilisli hual quinlahuilía lacames inminyolo.

Pablo motolinía pa quiyamanilis iyolo Agripa pa quineltochas Jesús

²⁴Quiman quijtuc Pablo innojen lajtomes pa monapatisquiaya, quitzajtzilic Festo ca lajtol chicahuac, quilic:

—iAmo ticpía laijnamiqulisli, Pablo, pampa ticmonexilic niman míac! iPampín axan timochíac se hual amo quipía laijnamiqulisli!

²⁵Pablo quinanquilic:

—Amo niunca yojque, Tata Festo. Neli niquijutica inon ca lajtomes hual unca melahuac hual moxtin quimatilo len quinequilo quijtulo. ²⁶Nican unca in hué huan amo nimomajtía niquijtúa inon ilaixpan yihual, pampa yihual quimati cuali in hual niquijutica. Nehual niquijtúa neli pampa yihual cajsíaya lamachiltisli inahuac in hual panuaya. Inon hual niclaquetziliztica amo panuaya capa cataya lalatili.

²⁷Tehual, Tata Hué Agripa, ¿ticneltocha len Dios quijtuc pan inminpampa ilajtunijmes? Nicmati pampa tehual ticmati in unca jan quinami annimitzilic.

²⁸Huan Agripa quilic Pablo:

—Pan se nadita ticnequi tijsulahuac pa nimochihuas se hual quineltocha Cristo.

²⁹Huan Pablo quinanquilic:

—Nictemachía Dios pa quinequis pa ticneltochas Cristo, pa tiyes quinami nehual, ma ye pan se nadita, ma ye pan míac tonalijmes. Huan in hual nictemachía Dios pa tehual, noje nictemachía pa moxtin nican hual nechcacticate axcan. Jan annimitzilía san amo nicnectica pa anyesquiaya laipili quinami nehual.

³⁰Ca inon laquisac lajtuc Pablo, huan moquetzac in hué, cuaquinon moquetzajque Festo in lalac huelitía huan Berenice huan yehuanten hual nepa cataloaya. ³¹Quiman mohuicajque, laqueztiahuiyoaya se ca oc se, quililoaya:

—Amo quichíac in lalacal nindeno hual cahuilúa pa yes lamictili, huan amo cahuilúa pa yes latzacuali pa calijtic.

³²Huan Agripa quilic Festo:

—Tehuanten huil ticmacahualoaya in lalacal sinda amo quinequiaya motemaca ca in hué Cesar.

Quitilani Pablo pa Roma

27 Quiman quilalijque pa quitilanosquiaya Pablo pa in lali Italia capa unca in caltilan hué Roma, nehual Lucas huan yihual tiajqque. Quitemacajque Pablo huan oc sequin lacames lailpili ca se laicanani itoca Julio. Yihual yec ilaicanani inminlanechiculisli in guaches itoca iBatallón Augusto. ²Tilejcujqque pan se barco hual quisaya pin caltilan Adramitio capa barcos quisalo huan moquetzalo. Amo yahuiaya huejcahua pa quisas nepa Cesarea huan yahuiaya panu pa atenco in lalticpan Asia, nepa cataloaya sequin caltilan capa calaquilo barcos. Noje ca tehuanten yahuiaya yahui Aristarco hual laticac pa Tesalónica pin lali Macedonia. ³Mostatica tiajsijque pa Sidón capa calaquilo in barcos huan nepa Julio cataya niman cuali ca Pablo, quichihuic se cuali hué. Quimacahuic pa yas capa ilajlasojli pa Sidón pa yehuanten quichihuiclosquiaya mochi hual monequiaya pa quipiasquiaya. ⁴Cuaquín quiman tiquisajque nepa Sidón, amo ijyecaya quinami quinequiaya yahui in barco. Pampín tipanujque pan norte in lali Chipre hual unca lajco pin al huejcalan. Yojque yajmo míac techpitzaya in ijyecal. ⁵Panujtiahuiaya tobarco pin al huejcalan capa amo huejca cataloaya in lalticpan Cilicia huan in lalticpan Panfilia. Cuaquinon tiajsijque pa Mira pin lali itoca Licia.

⁶Huan umpa quitac in laicanani se barco hual quisac nepa pin

caltilan hué Alejándria capa calaquilo barcos, yahuiaya pa Italia. Techlejcultijque pin barco, cuaquinon tiquisajque tinejntiajqque ca in barco. ⁷Tiyahuiloaya yulito sequin tonalijmes huan ca míac latolinilisli tiajsijque ilaixpan capa itoca Gnido. Amo techmacahuultiaya in ijyecal pa tiajtiahuilosquiaya capa ticnequiloaya. Pampín ticmalinajque in barco nadita pa tiajsisqui pa in sur in lali itoca Creta hual unca lajco pin al huejcalan. Huan tipanujque in atenco in lali capa cataya in caltilan Salmón. ⁸Huan umpa ca latolinilisli tipanuloaya pa in sur in lali Creta huan ca nadita tihualajque pa capa itoca Buenos Puertos, capa in caltilan Lasea amo cataya huejca.

⁹Axcan quipiaya míac tonalijmes quiman tiquisajque nepa Cesarea. Noje cataya cuajnesi polehuiclisli sinda tialosquiaya ca barco, pampa axcan panuc in tonali quiman mosahualo in judíos, huan quiman panuc in tonali yahuiaya pehua majcoquía míac in al huejcalan. Pampín Pablo quinlaquetzilizic pampa moitalosquiaya pin polehuiclisli hual yahuiaya panu, quinmilic:

¹⁰—Lacames, niquijtúa pampa cayas polehuiclisli huan míac xitinilisli pa in hual ticmantialo pin barco sinda tiquisasi nican. Huan noje ticayasi tehuanten pin polehuiclisli, cuajnesi timoatoctisi noje.

¹¹Ma yoje, inminlaicanani in guaches amo quinequiaya quicaqui in hual quijtuc Pablo. Quinequiaya quicaqui in hual quilijque yihual hual quinejnemultiaya in barco huan yihual iteco in barco. ¹²Cuaquín yehuanten in míac lacames quilalijque pa quisalosquiaya nepa. In caltilan capa cataloaya amo cataya cuali pa panulosquiaya in mesli quiman cayasquiaya secuisli, pampa mojmosta ijyecasquiaya huan quichiasquiaya

sehua. Pampín, sinda cuajnesi huil, yahuiloya ajsilo pa Fenece pa panulosquiaya nepa in tonalijmes quiman cayasquiaya secuisli. In cataya se caltilan capa huil calaquiloaya in barcos huan cataloaya latzacuali in ijyecames. San ijyecasquiaya pin noroeste huan pin suroeste.

Pehua ijyeca chicahuac pin al huejcalan

¹³Cuaquinon quiman pehuac ijyecac yulito pin sur, quijtujque pampa cataya in ijyecal hual quinectataloaya. Yojque quiquixtijque in teposli etic pin al, quilalic pin barco, cuaquinon techhuicaya in barco capa amo cataya huejca iatenco in lali Creta. ¹⁴Ma yoje, panuc je nadita, pehuac ijyecac chicahuac pa Creta huan cajsic in ijyecal in barco, cataya in ijyecal hual quitocayaltilo in Norestero. ¹⁵Yojque ijyecac chicahuac pan barco, pampín in barco amo huil quixnamiquiaya in ijyecal. Pampín, ticpiajque pa ticmacahuiltilosquiaya pa in ijyecal quihuicasquiaya in barco. ¹⁶Huan quiman tipanuloaya pa itepotzcon se lali tipichin itoca Claudia lajco pin al huejcalan, in lali quitzaculiaya pa camo m'ac techhuitequisquiaya chicahuac in ijyecal. Yojque huil ca tolinilisli ticajcoquijque pin barco in barquito hual tictilantiahuiloya pa tolaltepotzcon. ¹⁷Quiman ticajcoquijque in barquito, pehualoaya quilalilo paxas lachihuali ca mecames huejué, quilalililoaya lajco pan in barco pa camo mocaxanisquiaya icuahuimes in barco. Momajtiloaya pampa quijtuloaya in barco yahuiaya ajsi pa se laxitinijcal pin al huejcalan capa cataya m'ac xali, in laxitinijcal itoca in Sirte. Pampín quitemuhuijque in tzotzomajli telahuac pa camo quihuicasquiaya in barco in ijyecal pan in xali capa amo cataya huejcalan

in al. Yojque quimacahuiltijque in barco pa lanilusquiaya san, in ijyecal huan in al quihuicaloaya in barco. ¹⁸Mostatica amo mocahuaya pa quihuicasquiaya cajcapa in barco in ijyecal huan in al, pampín pehualoaya quilasalo yehuanten in lamamajquil pin al huejcalan pa mocahuasquiaya amo niman etic in barco. ¹⁹Huan quiman quiapiaya ye tonalijmes quiman tiquisajque nepa Creta, pehuajque quilasajque pa al innojen teposlimes huan cuahuimes calica tequipanuloaya pin barco, quinlasajque ca inminmajmajuan yehuanten. ²⁰Quiapiaya m'ac tonalijmes amo nesiloaya in tonali huan in luceros (silalimes), huan mochi tonali techhuitequiaya in ijyecal chicahuac. Yojque yajmo ticchialoaya nindeno, yajmo tiquijtujque pampa timoquixtililosquiaya pin polehuilisli.

²¹Huan quiapiaya m'ac tonalijmes amo tilacualoaya. Cuaquinon moquetzac Pablo lajco capa yehuanten, quinmilit:

—Lacames, cataya cuali sinda annehcaquiaya nepa pa Creta quiman annimitzilic pampa yahuiaya caya polehuilisli sinda tiquisalosquiaya nepa. Sinda amo tiquisaloaya, amo tiquinpoluloaya mochi innojen hual tiquinpoluje. ²²Ma yoje, axcan annimitzil'á, amo ximomajtican, pampa amo cayas se ca anmoxtin hual polehuis. Jan in barco san yes lapoluli. ²³Nicmati inon pampa axcan lay'úa hualac ca nehual se ilanahuatini noDios pin cielo. In Dios nehual niunca iyaxca huan noje nictequipanuil'á. Huan in lanahuatini nechilic: ²⁴“Amo ximomajti, Pablo, ticp'ía pa timoquetzas ilaixpan in hué Cesar, huan xiquita. Dios yahui mijchihuil'á in cuali hual tictemachic. Amaqui yahui polehu'ía ca moxtin yehuanten hual cate ca tehual.” Yojque nechilic in lanahuatini. ²⁵Pampín,

lacames, ma camo anmitzcocu anmoyolo, pampa nicneltoca Dios. Nicmati yes quinami nechilic ilanahuatini. ²⁶Ma yoje, ticpiasi pa tiajsisi pan se lali lajco pin al huejcalan.

Yojque quinmilic Pablo.

²⁷Huan se layúa quiman ticataloaya catorce tonalijmes ca in ijyecal techhuicatataya, timoitaloaya pin al huejcalan itoca Adria. Huan quinami pa lajco layúa momachiltijque in tequipanujquimes pin barco pampa tiajsitataloaya pan se lali. ²⁸Lalamachihuajque pa quimatilosquiaya quichi huejcalan cataya in al, huan cataya treintiseis metros. Tiajque oc se nadita, oc seja lalamachihuajque, cataya huejcalan quinami veintisiete metros. ²⁹Pampín momajtijque pampa yahuiaya molasa in barco pan capa amo huejcalan capa cataloaya teles (temes). Yojque xitinisquiaya in barco. Pampín quinlasajque pa al nahui teposlimes ej'etic pa itepotzcon in barco pa yajmo mohuicasquiaya pa itenco in lali. Momajtiloaya yehuanten, quinequiloaya pa lanesisquiaya.

³⁰Huan in tequipanujquimes pin barco quitemuloaya quinami cholulosquiaya quicajcajtataloaya in barco. Quitemuhoiloaya in barquito pin al huejcalan. Techililoaya pampa yahuiiloaya quilasalo teposlimes ej'etic pa ilaixpan in barco pa yojque amo m'ac mohuicatihuisquiaya. Yehuanten san lacuajcuamanaloaya, jan quitemuloaya san quinami huil cholulosquiaya pa camo moatoctisqui.

³¹Cuaquinon Pablo quilic in laicanani huan in guaches, quinmilic:
—Sinda amo mocahualo yehuanten pin barco, amhuanten amo huil annoquixtis pin polehuilisi.

³²Cuaquinon quicotonilijque in guaches imecal in barquito huan yojque quimacahuiltijque pa huetzis pa al.

³³Cuaquín pa cualcan quinchichahualtitinemiaya Pablo moxtin pa lacualosquiaya, quinmiliaya:

—Axcan quipía catorce tonalijmes amo anlacuaya. Amo anmocahuaya pa anmomajtis, amo anquicuaya nindeno.

³⁴Pampín annimitzilía xicnequican xijcuacan nadita, pampa monequi pa ticchihuasi inon pa yojque ticanasi chichahualisli calica timoquixtisi pin polehuilisi. Amaqui yes lacocoltili, amo quipolus jan se itzondi itzontecon se.

³⁵Quiman quijtuc inon, canac pan, quisehuic Dios inminlaixpan moxtin, cuaquin quilapanac in pan, pehuac quicuac. ³⁶Cuaquín mochichahuiltijque moxtin huan yehuanten noje canajque len pa quicualosquiaya. ³⁷Pin barco timoxtin ticataloaya doscientos setenta y seis (majlaclihuanypuhua licaxtulihuanse) lacames. ³⁸Quiman pachihuijque moxtin, quichihuajque in barco pa camo yes etic quinami cataya, quilasajque in trigo pa al huejcalan.

Xitini in barco huan moijsima

³⁹Huan quiman lanestic, amo quiximatiloaya in lali hual quitajque. Ma yoje, quitajque capa calaquiaya in al huejcalan je nadita pin lali, cataya se al tipichin ca xalipan pa in atenco. Quilalijque pa cajxiltilosquiaya in barco sinda huil pan in xalipan.

⁴⁰Quicotonaje inminmecames in teposlimes ej'etic, quinmacahuiltijque pa huetzilosquiaya pa al huejcalan. Huan quiman quichijtataloaya inon noje quitomaloaya in mecames hual quipilo in cuahuil calica quimalinalo in barco. Noje cajcoquijque in tzotzomajli telahuac pa ilaixpan in barco pa quipitzasquiaya in ijyecal, yojque pehuaya ajsi in barco pa in xalipan. ⁴¹Ma yoje, san laniluaya in barco pan capa monamiquiloaya ome alimes huejué. Nepa amo

cataya huejcalan huan ajsic in barco pa inon, nepa mosaluc ilaixpan, mocahuac, amo huil molinic. Huan ilamili in barco pehuaya xitini pampa in al quihuitequiaya chicahuac.

⁴²Cuaquinon in guaches quinequiloaya quinmictilo in lacames lailpili pa camo cholulosquiaya lanilujtataloaya.

⁴³Ma yoje, inminlaicanani in guaches amo quinequiaya pa miqisquiaya Pablo huan quintzacuilic in guaches pa camo quichihualosquiaya in hual quinequiloaya quichihualo. Quinmilic in laicanani pa pehualosquiaya molasalo pa al yehuanten hual huil laniluloaya. Yojque molasaloaya pa al pa ajsilosquiaya pan lali. ⁴⁴Cuaquín quinmilic pa quintocasqui in oc sequin pan icuahuimes huan ilajcomes in barco huan yojque timoxtin timoquixtijque pin al huejcalan huan tiajsijque pan lali.

Pablo pin lali Malta lajco pin al huejcalan

28 Quiman timoquixtijque pin al huejcalan, ticmatijque pampa in lali itocaya Malta. ²Huan tejchihuulijque cuali, techicnilijque in lacames chantinijmes nepa, pampa quipitzajque tixuxli hué huan technotzajque pa timoajxiltilosquiaya timoxtin pampa quichijtataya sehua huan quiajatataya. ³Huan quinechicuc Pablo sequin cuajtzindis pa quinsajsacas pa in tixuxli. Quiman quinlalic pan in tixuxli, quisac se cuhual pin cuatzindis pampa cataya totonqui, quiqitzquic quicuajcuac Pablo pa imajma. ⁴Huan quiman in chantinijmes quitajque in cuhual pilujtataya pan imajma, pehualoaya moililo:

—In se neli unca se lamictini. Huan mas que moquixtic pa camo polehuisquiaya pin al huejcalan, ma yoje yahui polehui, yojque unca latilanili ca capic cahuilúa.

⁵Ma yoje, quitzejtzeluilic Pablo in cuhual pa quimacahuasquiaya imajma huan huetzic in cuhual pa in tixuxli, huan amo quipanuc Pablo nindeno amo cuali. ⁶Yehuanten quichiajque pa qitalosquiaya sinda Pablo posahuasquiaya o sinda jan ajnaxcan huetzisqueiaya mictataya. Huan quiman quichiajque mfac, huan amo quipanuc Pablo nindeno, cuaquinon quijtuloaya ca oc se lajtulisli, pehualoaya moililo pampa Pablo yec se dios.

⁷Nepa capa timoutzculoaya, amo huejca cataloaya icuajmilimes inminhué yehuanten pin lali. Yihual motocaya Publio. Yihual technotzac pa ichan huan nepa timocahualoaya ye tonalijmes, tejchihuiliaya cuali.

⁸Huan cataya cocoxqui itajtzin Publio, totoniaya huan quiapiaya catzahualisli ca esli, lastataya pa ilapexli. Pablo calaquic capa cataya, quilajlanic Dios pa yihual, cuaquín quinlalic imajmajuan ipan, yojque pajtic.

⁹Cuaquinon, quiman yehuanten pin lali quimatijque inon, hualoaya in cocoxquimes huan Pablo quinpajtic.

¹⁰Pampín ca mfac lachihualisli technextililoaya quinami quimatiloaya momajtilo tolaixpan, technextililoaya quinami mfac technequiloaya. Huan quiman tiquisajque nepa ca barco, techmacajque mochi hual monequiaya pa ticpialosquiaya.

Pablo ajsi pa Roma

¹¹Quiman tipanujque nepa ye mesli, tiquisajque nepa ca se barco hual quisac nepa Alejandría capa calaquin barcos. In barco quinpiaya inminlanextilisli in ome dioses hual motocaloaya Castor huan Pólux. In barco panuaya itonalijmes in secuisli nepa pin lali Malta. ¹²Tiquisajque ca in barco nepa Malta huan techhuicatiahuiaya pa oc se lali huan yoje tiajsijque pin caltilan pa barcos

itoca Siracusa. Nepa timocahuajque ye tonalijmes. ¹³Cuaquinon ca in barco tipanujque pa itenco in lali huan tiajsijque pan se caltilan pa barcos itoca Regio, cataya pin lali itoca Italia. Quiman panuc se tonali nepa, pehuac ijyecac pa in sur. Pa oc se tonali tiajque ca in barco pa in caltilan pa barcos itoca Puteoli pin lali Italia. ¹⁴Nepa tiquitaje sequin tocnían laneltocanijmes hual technotzajque pa timocahualosquiaya chicome tonalijmes ca yehuanten. Nepa timocahuajque, cuaquín ticanajque ojli pa Roma. ¹⁵Umpa pin Roma quicaquijque tocnían laneltocanijmes pampa tihualaloaya. Yehuanten quisajque nepa Roma, hualaloaya pa technamiquisqui pan ojli. Sequin hualajque huejca pa quiahuac Roma pa in caltilan iForo Apio, oc sequin hualajque amo yoje huejca pa in caltilan Tres Tabernas. Huan quiman quinmitac Pablo tocnían laneltocanijmes, quisehuic Dios huan mochicahualtic pa iyolo. ¹⁶Quiman tiajsijque pa Roma, inminlaicanani in guaches quintemacac yehuanten hual lajlailpili ca inminlaicanani inminlachianijmes lacames lajlailpili. Ma yoje, quimacahuilic Pablo pa chantisquiaya ihuían ca se guache pa quilachiasquiaya.

Pablo quinnahuatilía ilajtol Jesucristo nepa Roma

¹⁷Panuloaya ye tonalijmes quiman tiajsijque huan quinahuatic Pablo pa monechiculosquiaya moxtin inminlacames huejué in judíos. Quiman ajsijque capa Pablo yehuanten, yihual quinmilic:

—Lacames nocnían nehual amo niquinchihuilic nindeno amo cuali yehuanten tocnían judíos, huan amo nicchíac len hual amo unca ca se lajtulisli ca inminlachihualisli totatzitzían. Ma yoje nepa Jerusalén

nechtemacaje lailpili ca in lahuelilitlisli romano. ¹⁸Innojen huelitinijmes romanos lajlanije inahuac mochi hual nechmotexpahuililoaya tocnían judíos. Quiman amo quitaje nindeno ca in calica nechmotexpahuililoaya hual nechahuiluaya pa nimiquisquiaya, quinequiloaya nechmacahualo. ¹⁹Ma yoje, amo mochahualoaya pa nechmotexpahuililosquiaya tolaicananijmes judíos. Pampín, nicpiaya pa nimotemacasquiaya ca Cesar in hué. Nicchíac inon mas que amo nicpiaya len calica niquinmotexpahuililosquiaya nocnían judíos. ²⁰Pampín nilanahuatic pa anhualasquiaya. Nicnequiaya annimitzita huan annimitzlaquetzilía inahuac inon. Annimitzilía pampa nicnemiltía in teposli calica nechilpije pampa nicneltoca in Cristo hual moxtin judíos quichixticate.

Yoje quinmilic Pablo. ²¹Huan yehuanten quinanquilijque:
—Tehuanten amo ticanaje amal hual techtilanije tocnían judíos hual cate pa Jerusalén huan amo ajsic nican se tocní judío pa techmachiltisquiaya huan pa techlaquetzilisquiaya len amo cuali calica mitzmozexpahuililo. ²²Ma yoje, tiqijtulo pampa yesquiaya cuali pa timitzcaquilosquiaya tehual pa titechnextilis in hual ticneltoca. Tiquijtulo in pampa pa mochi cajcapa ticmatilo pampa moxtin laquetzalo amo ca se lajtulisli inahuac Jesús iojli.

²³Huan yehuanten quilalijque ca Pablo se tonali huan pa in tonali ajsijque pa icalijtic míac innojen judíos. Pablo quinmaxtiaya, quinlaquetziliaya melahuac inahuac ilahuelilitlisli Dios. Motoliniaya pa quinneltocaltilosquiaya in hual Moisés huan Dios ilajtunijmes quijjtunijme pa yina quinami Jesús hualasquiaya pan lalticpan. Quinlaquetziliaya Pablo pejtataya pa huajtzinco, huan pa mochi semilhuil

pa quiman tiolactic quinlaquetziliaya.
²⁴Sequin quineltocajque in hual
 quinmilic Pablo, huan oc sequin amo
 quineltocajque. ²⁵Yojque, pampa amo
 cataloaya ca se lajtulisli innojen judíos
 se ca oc se, pehualoaya moquetzalo
 pa quisalosquiaya. Cuaquín Pablo
 quinmilic oc se lajtol san, quinmilic:
 —Neli in Espíritu Santo quijtuya len
 niman melahuac quinami catanijme
 anotajtzitzían. Quijtuya inon pan
 ipampa in hual quijcuiluc Isafas ilajtuni
 Dios, quijtuc:

²⁶Xía ca innojen ilacames Israel,
 yojque xiquinmili len quijtúa
 Dios.

Huan Dios, quil, quijtúa:
 Mas que anlactías, ma yoje
 amo anquimatis len nicnequi
 niqijtúa.

Mas que anlaxixtías, ma yoje amo
 anquimatis len anquitzica.

²⁷Noje Dios quijtúa:
 Quipialo in lacames inminyolo hual
 amo quinequilo quimatilo,
 huan inminacajmes amo huil
 lacaquilo cuali.
 Motzacuililo inmixtolojmes pa
 como quimatisqui len quinequi
 quijtúa in hual nicchijtica.

Motzacuililo inminacajmes pa
 como quicaquisqui len quinequi
 quijtúa in hual niqinmilijtica.
 Motzacuililo inminyolo pa como
 quimatisqui len nicnequi
 niqijtúa,
 motzacuililo pa como
 momalinasqui pa
 mocuepasqui ca nehual
 pa yoje niqinpaqtisqui
 niqinquixtilijtica
 inminlajlaculisli.

²⁸Cuaquion Pablo quinmilic:
 —Yojque, xicmatican inon. Dios
 quintilanilfa in lamachilitisli cuali
 ca yehuanten hual amo judíos, huan
 yehuanten quineltocasi.

²⁹Quiman quinmilic Pablo inon,
 quisaloaya in judíos molaxilijtataloaya
 lajtomes míac ca yehuanten.

³⁰Huan mocahuaya nepa
 Pablo pa ome xixihuil, chantiaya
 pan se cali hual quilaquehuac.

³¹Quimacahuiltijque pa
 quinnahuatilisquiaya moxtin
 Dios ilahuelilitisli, huan yihual
 quimaxtiaya mochi hual cataya pa
 ilajtol in Tata Jesucristo. Amo cataya
 amaqui hual quitzacuiliaya pa como
 quichihuasquiaya inon.